



龜

巢

鑿

二

十

齋



氏	泰
壘	維
彪	盛

傳

謝應芳字子蘭其先河南之開封人宋建炎閒六世祖有尉武進者因留著籍安東鄉故鄉稱東西謝莊云公生元季強記博學自所治經外旁及百家子史尤精性理之學遭時不辰隱居白鶴溪構斗室顏曰龜巢素行聞於郡辟教鄉子弟指授斐然至正閒舉公爲三衢書院長不就壬辰天下兵起公避地吳中吳人爭致館穀尊爲弟子師過吳江游三高祠故俎豆范少伯張季鷹陸龜蒙公上書饒參政蠡事越亡吳吳仇也禮不祀非族法宜去請祀太伯仲雍季子而張陸列其旁饒韙其言會亂中止過長洲見晉顧元公榮墓祠土人廁以淫祀公又抵書邑長令毀而更建迨我明江南底定公始歸來見邑北鄒忠公浩墓鞠爲茂草樵牧不禁言於郡守張公植碑表其阡又復所侵祭田若干畝哀忠公遺事爲錄達官過郡必先訪其廬公布衣韋帶與抗賓主禮議論亶亶依於古訓而於時弊民隱尤言之侃侃爲文簡縟詩溫雅時有風

刺而鋒角不露出經入傳冥會天成無繩削怨怒之態其所自得淵源蓋有本云所著思賢錄五卷辨惑編二卷毘陵先賢續志十卷龜巢彙二十卷

蜨花外史氏曰先生老於逢掖爲吾常國初耆儒著述諸篇訪問經年粹不可得意于姓氏式微付之寒煙荒燼矣所可考者加意先賢與其行事正其祀典清其墓田維世教淑人心有功後學匪淺鮮而迄今未有標其通駿者所謂不附青雲之士烏能聲施後世者是耶非耶傳出莊裕徐公問手莊裕善人也信人也獻則吾能徵之矣

道光乙巳仲春昌霖偶閱晉陵張師繹月鹿堂文集第四卷載有從祖龜巢傳一篇因補錄之景賢錄內所刊一篇係歐陽郡伯所撰大畧相同

### 原序

毗陵謝先生昔避地吳松之上予適自燕至吳子友涿郡劉子南氏嘗道先生姓名學行之懿予願見而未暇焉後十年識先生之仲子林於崑山則先生已歸隱於毗陵矣又十年婁東袁子英氏以先生年八十邀予賦詩爲先生壽繼又告曰先生之門人王著集先生之詩錄諸梓先生摘其詩之什一與之凡若干卷名龜巢摘彙復徵予敘卷端又辭以未識先生又未嘗閱先生之詩集何敢率爾從命且衰退不敏又何敢贊一辭於其閒哉予言又豈足爲先生軒輊哉然子南旣稱先生於前子英復頌先生於後况嘗與先生之子林連床累日觀其從容詩禮秀拔儒林則先生之言行可知已傳曰不知其人視其友不知其父視其子又奚必識先生之面誦先生之詩哉嘗聞先生之爲人耿介尙節義與世寡合其爲詩也非有關於風教者不爲也非有得於情之正者不爲也惜先生不少試其才於時肥遯以終身焉先生有辨惑編四卷行



於世間發先儒所未發其於後學豈小補哉予姑述所聞者如此  
先生名應芳字子蘭號龜巢云時洪武十二年歲己未前七月既  
望前浙江儒學副提舉豐城始豐山人余詮序

文章與時高下昔人有是言也有能處憂患顛沛之中不爲外物  
之所搖奪形於言辭無感迫憤懣之病有異於昔人之言者惟君  
子爲能之吾於子蘭先生之文見之矣先生蚤有俊譽嘗爲李晉  
仲俞用中諸公所知生平重然諾勇於爲義紬繹經史作爲文章  
咸有根柢與人論辯亶亶不少休在鄉里時請復鄒忠公墓寓吳  
中又請作顧元公廟世俗怵於異端邪說先生因取經傳之言作  
辨惑編以警之其襟度磊落識見雅正實爲士林所推重洪武十  
年冬先生之子林以郡府所舉至京師先生以書諭熊曰某有舊  
作學子王著欲板刻之乃爲摘數十篇以從其請子其序之庶不  
爲醬蒙矣曩先生避兵時雖漂搖逆旅中所至人欽其德望延致  
恐後巢室松江之旁講授之暇以詩酒自娛熊託交十五六年一

時倡和若楊維禎廉夫倪瓚元鎮顧瑛仲瑛俯仰之間淪落泉壤  
先生年逾八十歸隱橫山實爲後進之所景慕其著作有不期於  
傳而自傳者矣吾友中書舍人閩人張至道評先生之詩雅正純  
潔法度整齊可與傅與礪相伯仲識者以爲名言熊竊窺先生養  
之厚氣之充言行卓卓如此蓋喜聞道之者因以冠之篇端先生  
姓謝氏自號龜巢老人故名其集爲龜巢彙云范陽盧熊序

重刻序

謝君蘭生爲毘陵世家篤學嗜古工爲詩文典贍豐蔚觀者驚歎  
以爲得前人格律非時輩所能及一日攜巨冊高二尺許曰此先  
世元文清公龜巢全集也向無專刻傳鈔多譌詩文雜廁卽入  
四庫貯文瀾閣者僅十七卷非足本是集自元末至今五百餘年  
自曾祖父求之閱四世而不可得今始獲明侍御季滄葦氏所藏  
凡二十卷將剞劂以貽後世之景仰先賢者曷助爲讐校余授而  
讀之凡詩十卷文十卷釐然不紊篇目增多君復取顧俠君元詩



選及各家別本核其字句異同皆以滄葦氏爲最優更採明黃中禮所刊摘彙如方竹杖諸篇又以詠梅軒家藏本村居等詩及詩餘各類爲本集所逸者補於後余更核得百餘條其所不知者仍缺之是可爲善本矣蓋嘗論之元末以詩文鳴者鐵厓倡纖譎之體玉山侈歌舞之富其他如張玉笥劉羽庭輩或羈縻於張士誠方谷珍之官職其詩亦哀豔動人而終乏醇古之趣不足以正人心厚風俗若文清公侷乎遠矣卷中忠孝節義形於詩歌而雜文如募置十七史疏身居亂世斯文賴以不墜其功尤巨此外如置延陵季子精舍及買石題唐刺史獨孤公檜皆可補明史本傳所未詳與辨惑編相表裏正不獨修顧元公祠鄒道鄉墓作懷古思賢二錄而已至應俗諸作可考見古跡之興廢元人之姓名毘陵志乘亦有所必采者然非君之能述祖德數典不忘此集且就淹沒世又安能發文清公之潛德而如親炙之乎若謝君亦可謂賢子孫矣是亦可風也已故濡筆而爲之序道光乙巳春正月金陵

後學朱緒曾謹撰

跋

治亂世也窮達命也處亂而自省者德也際窮而常貞者學也從遠祖龜巢公生當元季不遇於時上無學校之興下無醇厚之俗豈非小人道長君子道消時乎公獨學宗宋儒功先慎獨兢兢焉崇德辨惑以端風化正人心引爲己責一時薰其氣而善良者無算此真鷄羣鶴中流柱也蘭生仰慕前賢深於寤寐不能生其世而親炙之猶幸見其集而私淑之本傳所載公有辨惑編五卷思賢錄六卷懷古錄三卷龜巢彙二十卷未鏤板余曾祖聘大父湛恩先後購得公之遺集本生父珍嗣父務滋思鏤板而未能蘭生謹按四庫提要謂詩後有文文後又有詩序次紊亂爲傳鈔之誤誠哉是言且文淵閣著錄止十七卷傳是樓書目止十八卷均非足本癸卯秋長男昌霖赴金陵試自吳門來浙由顧氏藝海樓得季滄葦侍御鈔本龜巢彙詩文二十卷卷數核與明史藝文

志相符與上元朱明府緒曾互相讐校序次割一卷數加增真善本也要之先賢遺藁雖片紙隻字亦當寶貴傳之無窮矧此已成完璧耶蓋善學古人者惟其意不惟其辭誠能取公之所以立身處世者而則效之將羹牆之際若有以詔我矣豈特其外之文哉族孫蘭生謹述

龜巢彙卷一

元謝應芳

賦

弔豫讓賦并序

予讀史遷刺客傳閱豫讓亦廁於荆軻之列也故作是賦以弔之嗟忠臣與義士兮何正氣之烈烈匪死生以抑志兮豈存亡而改節仰豫子之炳炳兮復故主之所讎感知己以滅身兮雖九死其何尤欲潛名以匿姓兮乃絕踪而滅迹爰漆身而吞炭兮雖家人而不識前詐刑以塗廁兮後伏橋而褰衣雖匕首之不利兮惟趙氏之不忘彼友不諒厥志兮哀其生之自苦曰汝才而臣之兮必近幸而釋汝計何逞而不行兮欲何求而不遂胡戕形以毀質兮乃前跋而後蹙伊賢哲之確志兮固終始而不渝旣捐生以爲誓兮肯中道而改塗身雖癩而無怨兮義不可以暫離聲雖喑而不顧兮行不可以少虧信所爲之孔艱兮忘所謀之不畏將愧人臣之不忠兮遑恤予身之見傷苟委質而求殺兮乃吾心之已貳仇



不足以報趙兮德不信於酬志念智氏之知己兮迺國士而遇予  
忽反君以事讎兮殆犬豕之弗如嗟夫子之言行兮與日月而爭  
光溯千載之遼遠兮紛郁郁其遺芳何太史之不考信兮列彼名  
於刺客夫豈碌碌之燕荆兮豈區區之軹聶士有沽譽而作善兮  
有邀利以行義苟有爲而爲之雖似真而實僞彼知瑤之旣殲兮  
及智宗之旣夷夫子之身無所託兮夫子之心爲可知乃抗節而  
效死兮豈攘名而蹈利彼太史之載筆兮胡不章而反蓋自古孰  
不有死兮貴委命之得所諒夫子匪匹夫之勇兮宜君子之所與  
雖笑貌之不可得兮氣凜凜其猶生撫遺史而歌弔兮表夫子之  
忠貞亂曰松柏之剛有時折兮金石之堅有時裂兮唯忠唯義效  
斯竭兮匪顧匪慮終吾節兮烈烈豫子勇且決兮獲正而斃復何  
說兮不有君子疇發越兮千古萬古祇刺客兮

復賦

陰陽消長之理無往不返蓋一闔而一闢者也夫斡流推旋無端

無始此天道之所以立也當其玉衡建子金鍾調律而微陽之脈  
已驗葭灰於緹室也夫剝窮上而反下則其象已具於碩果之不  
食而七日之始旋蓋其幾動於日至之日也吾嘗觀雷在地中之  
象而得其說夫雷陽也地陰也壯陰閉於九埜而潛陽昭於重泉  
則造化之至理生生而不息者也且萬物老死於坤而萌芽於復  
蓋懼春生之不蕃故以養以藏之甚密也然必自掩身而齋戒禁  
嗜欲於聲色於以待陰陽之初定存萬感於一寂也況乎無疾無  
咎而利有攸往實聖人幸君子之道長於是乎陽扶而陰抑者也  
然則復其見天地之心微至誠者亦孰得而識也且天理之復固  
有其常而人心之復亦不可逆故夫惡極必善亂極必寧柔極必  
剛晦極必明蓋以天生斯人靈於萬物者也若夫迷而未遠乃能  
遄返則若醉而得醒夢之得覺辟如夜氣之清不受乎旦晝之牴  
也信能護其萌於隱微之際則朝兢夕惕以全君子修身之大節  
也凜乎其頻復之厲裕乎其休復之吉也卓乎其獨復之勇厚乎



其敦復之實也。赧乎其迷復之凶，必自強而不自孽者也。夫惟顏子其殆庶幾，因從事於克復而得善，則服膺而弗失者也。蓋其明以察幾剛，以致決故，優優乎入聖之室也。彼聖此愚，均是人耳。增予心之惡也。君子必齊其心，而不敢放，則善端絲絲而續也。然則欲遏人欲而反天理，亦唯謹獨之念而幾微之不忽也。

斥鷃賦

維二氣之妙凝，播庶類於羣生。嗟斥鷃之至微，亦稟氣而載形。具薄質之輕儇，無華彩之煥明。味不登於鼎俎，羽不用於旗旌。既不虞於罟網，又何慮乎弋矰。於是庭除之際，藩籬之下，匪乘而游，繫匹而處。決然而躍，踰然而去。物莫能害，樂得其所。匪榮菑繫，匪薄榛莽。苟可投迹，鼓翼斯舉。匪陋麻菽，匪羨稷黍。苟可充食，俯啄斯取。夫其委命而足順理，而安欲無所。縱樂無所，盤不用賄。而致焚不藏珍，以取患不飾身。以賈禍不懷音，而見殘靜若守，而有待動若倦。而知還雖形微，而處僻任此生之自然。彼其魯雞之鬪，胡鷹

之擊，介距在身，條錠在體。鸚鵡能言而入籠，孔雀飭外而受制。或產絕垠，或生遐裔。傷伉儷之相違，哀母子之偕逝。縱僥存而幸免，亦貌慘而心悴。豈非形色之壞，材質之偉。爲世所用，爲人所貴。諒處身之不智，終有累於斯世。且夫滄溟之鵬，醯瓮之雞，均一天地。復奚累爲萬品一區，要與之齊。維茲之鷄，亦適其宜。何重何輕，何高何卑。小夫之辨，又焉能知。達人，大觀夫復奚疑。

承露盤賦

粵古漢武乾龍御天，身都富貴。心慕神仙，動出塵之遐想。訪妙道之真傳，覬長生而久視。與喬松而相後先也。爾乃氣類翕從，精神感召。祕方畢陳，至人胥造。授異術之元機，論延年之至寶。匪玉其芝，匪瑤其草。采乾坤之精爽，庶可臻於壽考。於是烹蜀道之美銅，雜麗水之良金。旣噓霆而煽電，亦穴陽而治陰。築柏梁之崇臺，卓天表而嶽崑。諒彌高而彌峻，非可計於丈尋。觀其屹若雲峯，壯如砥柱。表斷鼇以立極，懸驪龍而行雨。竊造化之功，巧有鬼神之呵。



護爾乃抗以仙掌冒以金盤詫颯輪之閃閃驚園規之桓桓騁怪  
誕於羣姓馳雄偉於千官至人進曰奇功既成吾事已濟願舉玉  
趾臨幸其地於是天子乃漱正陽含朝霞屏萬幾之思慮絕九重  
之紛華迨夫夜澹氣冲雲銷月皓澍靈滑於重霄降鮮英於清灑  
泠泠如節霏霏如膏不賴乎金丹之鍊不屑乎玄霜之擣蓋自然  
之嘉瑞真可以後天而不老遂乃屑飛璫和溥珠靈液飲麤穢除  
神漿未擬醴泉焉如卻五味以謝六塵又奚啻石髓之醍醐也既  
而形超埃壘體若羽翼趨火不焦沈淵不溼浩兮如禦寇之御風  
栩兮如蒙莊之化蝶蓋夙昔之願以遂而求仙之能事畢矣嗟乎  
吾觀漢武惑於方士既受誣於文成復見欺於五利信荒唐之邪  
說殆無異於嬴政之世彼其內嗜聲色外窮甲兵任貪夫而黷貨  
用酷吏而淫刑恣盤游而無度極土木之經營朝苦心而焦思夕  
疲神而憊精縱飛仙之有藥復何可以長生觀其建元初政赫赫  
明明罷黜百氏表章六經彌綸治道網羅羣英信一代之英主能

持盈而守成使其慎厥始終進乎明誠不玩於物不恣於情泊乎  
其無爲澹乎其太清則不必餐玉濯擢金英處方壺登蓬瀛自可  
以保真而養靜享無疆之遐齡是故至聖無欲存順沒寧使漢武  
欲效唐虞之治胡不刻斯盤以九字之湯銘

禦寒賦

有北鄰客訪於南鄰主人曰四序相催暑往寒來天時既變人事  
亦改風霜高潔冰雪皚皚敢問諸子將何以禦之哉主人對曰吾  
用吾計卿用卿策請子先陳吾爲子說客曰雄樓傑閣深閨邃房  
綺窗不啟畫閣初妝紅鑪獸炭煦若春陽此予所居之處也主人  
曰子也桑樞竹牖且塞且墜穴地作鑪火唯煨燼客曰九醞之設  
八珍之列炙鵝鴈炮羔膾鼈聚物天美咄嗟而獲此吾所食之  
味也主人曰子也蹲鴟可煨桑落可傾一罍之雲復有茗烹客曰  
狐貉之裘綺紈之服襴以文繡飾以金碧舍舊服新隨意所適此  
吾衣服之費也主人曰子也帛以爲縞卉以爲袴且縫且紐復著



以絮客曰重屏既列邃幙初張鎮帷以犀展罽在牀錦衾繡褥爛  
其有光粉白黛綠笑言芬芳此吾寢息之安也主人曰子也布衾  
如雪紙帳如雲縞綦茹蘆聊樂吾貧客哂然而笑曰子居養之異  
服御非常禦此隆冬猶未足當若子之論其亦疏矣主人曰噫是  
何言之謬也盈天地閒林林而生富兮則濁窶兮斯清分定之故  
孰敢云爭子欲爲我而不得吾欲效子亦不能胥樂其有何疏之  
稱且吾居之而安不計乎室廬之華陋服之而煖不較乎裳衣之  
麤細嗜之而飽不察乎飲食之精糲寢之而寧不論乎衾裯之鮮  
敝凡可卒歲何庸侈麗矧子所謂天和者而子固不足與於此子  
其行焉無汗吾耳客於是茫然自失默然無語汗面芒背懷慚而  
去

閒居賦

夫何予性之耿介兮與時俗之寡諧築室居於幽僻兮離喧囂與  
氛埃繫前修之可慕兮矧古道之可追何皇皇而無所止兮乃慮

往而營來羌行止之有時兮信用舍之有遇視富貴如浮雲兮豈  
馳名而驚利朝吾游於道囿兮夕吾憩於藝圃思衡門之栖遲兮  
慕考槃之窮處依灌木以結宇兮引清泉以爲池樹修竹之娟娟  
兮滋幽蘭之猗猗與禽鳥而相處兮同欣欣而忘機旣撫松以長  
嘯兮復臨流而詠詩列左圖而右史兮置前琴而後棋春吾蠶以  
爲衣兮秋吾穫以忘飢雖遯世而不吾知兮唯昭質其無虧信鸞  
鵠不可矜弋兮豈麒麟之可羈分宜雞鶩之爭食兮任駑馬之交  
馳延漁樵以論交兮美田廬以自適旣不怨而不尤兮又何喪而  
何得嗟萬鍾之厚祿兮暨駟馬之軒車徒睽爭而交攫兮紛總總  
兮焉如亦孰知信之可立兮孰知義之可服矧其方以爲圓兮揉  
其直以爲曲彼恬然以爲榮兮此赧然以爲辱諒薰蕕之不相入  
兮盍抱予之獨真譽予豈獨好異兮欲索居而離羣厭流俗之靡  
靡兮誠不能和光而同塵景顏氏之屢空兮乃樂天而知命仰仲  
憲之蓬桑兮曰唯貧而非病彼前哲之懋行兮羌與道而同符何



愚人之汨汨兮愴乎其若囚拘羞潘岳之諛佞兮拜車塵於塗側  
何亦賦此閒居兮乃論士之巧拙雖千載之遼遼兮慨有憾於予  
衷苟非拔俗而高蹈兮亦何予之能同系曰時與我兮相違審夫  
命兮何疑憂人之憂兮羌者有時樂吾之樂兮知者其誰

肺石賦

郡學堂試

昔聖人之御世兮貴上下之情通羌一視以同仁兮曾不廢於困  
窮民有長以司平兮或權衡之失中繫窮民之有訴兮阻天關之  
九重非設法以階其進兮嗟皇皇其曷從爰置石於皇都兮其色  
肺肝之與同使窮民立於其上兮得吐露其情衷心纍纍乎三日  
兮斯可見其哀恫士師從而聽決兮私一毫之靡容信尺蠖之久  
屈兮睹大明之當空脫辛苦於巔崖兮躋春臺之融融乃歸罪於  
其長兮激凜凜之清風以春生秋殺之道並行兮誰膏澤之敢壅  
睠茲石之在他山兮亦唯玉之可攻孰徵求於巖穴兮乃佐治而  
有功曰厚重而不可轉兮疑自天之來降薄京口之狼石兮聚當

世之梟雄鄙汲都之華石兮徒媚主於深宮笑佛廬之盤陀石兮  
坐枯禪以談空彼支磯之神怪兮適欺世之盲聾是皆不足以儼  
倫兮徒雕琢而磨礱惟嘉石之可配兮並見錄於周公維皇元之  
有道兮過成周之治隆俗麟趾之信厚兮由上令而下共畫衣冠  
而不犯兮將比屋之可封無一夫之不獲兮雖肺石其奚庸皦皦  
乎不知帝力之何有兮民於變於時雍

四靈賦

浙江鄉試

聖王御極至治維新修文偃武蹈德誦仁被聲教於四表畢梯航  
而來臣發陽春之厚澤布大造之洪恩何隱不顯何憂不欣何疾  
不瘳何屈不信士鄉道而游藝賈去偽而鬻真工務業於堅樸農  
務力於耕耘極中和之至德致嘉祥之效珍維龜維龍維鳳維麟  
應時畢至以彰聖神迺詠厥事耀於黎民夫麟之爲物其形不類  
匪麋匪鹿匪虎匪兕迺肉其角乃圓其趾不羣居而旅處不陷阱  
而罹咎音旣中於鍾律行復合於規矩生草不踐微蟲不履原其



德性吁嗟仁矣朝陽之鳳稟質中行九苞表瑞六德儲祥晨遊紫霧夕飲元冰發文采之粲粲動和鳴之鏘鏘臨寥廓而高峙凌雲霄而遠翔俾煙霏之閱色與日月而騰光覽德輝而來下羌出處之有常介族之長元龜實先十朋之重五色之全下夷平而法地上規隆而象天或萬年而升木或千祀而巢苓順陰陽以呼吸藏景曜於重泉斷凶咎於滋或明吉凶於未然信穹壤之奇物能鉤深而造元懿矣神龍有威有稜鉅細修短信屈降升千變萬化杳不可憑張鱗鬣之參差挺頭角之崢嶸既行雲而施雨復噓風而吸靈或躍於淵或遊在岡擬物狀以有體忽神化而無形聞之斯懾覩之斯驚益曠代而罕值實有國之嘉禎予嘗稽之傳記考之六經四物孔異久彰厥名若夫皇羲之世唐虞之廷姒禹之代姬昌之京或以成太昊之紀官或以聽簫韶之九成或以負洛書之大範或以應關雎之化行維隨時而隱見故王者以為休祥之徵矧茲昭代聖聖相承與勳華而比德眇漢唐之所稱海嶽之精藪

澤之英何祥不產何異不呈宜羽毛與鱗介總符合於文明譽予沐浴盛化歌詠隆平躬雖處於蓬室心獨向於皇局覩茲奇瑞欲默不能乃綴詞以成賦仍名之曰四靈

酒賦

有客有客一醉一醒邂逅相遇款我柴荆醉則高其曠逸醒則矜其典型劇談雄辨舌搖風霆於是醒者睨醉客而謂之曰若不聞乎禹惡旨酒夏德其昌紂為糟邱殷祚滅亡何物狂藥毒人肝腸甘之者必醜中之者必傷化慈祥為凶險變沈靜為淫荒語言龐雜氣勢鴟張或罵將軍之座或登節度之牀或吐丞相之茵或牽美人之裳或翹足沐猴之舞或俛首羣豕之場微酒之故胡然而狂甚而雙親之養不顧七尺之軀亦亡腐脅而斃遺臭無疆酒之害人也如此若何不痛絕而謹為之防醉者曰是何言哉是何言哉吾聞上古窪尊三代曷爵苟聖賢之不飲何杯棬之有作書稱麴蘖禮曰清酌鄉飲之儀獻酬交錯若近代之飲者皆磊磊而落



落晉之八達非酒何以逃亂世之誅唐之八仙非酒何以脫微官  
之縛酒之於人其德不薄變怒爲喜轉憂爲樂釋憤氣之怨爭發  
鈍口之談謔故曰痛飲吾之師不飲客之惡獨醒之原懷沙寂寞  
啜茶之同血染鋒鏑然則酒何負於人哉爾獨未知其趣而遽薄  
之也詞未既余乃從而釋之曰止止二子之說各倚一偏請折其  
衷子其聽旃往古來今酒不可無祭祀賓客日用之需但用之者  
豐不可縱儉不可拘縱失之酒拘失之愚愚乃人之所鄙酒乃人  
之所辜酒以成禮威儀秩如酒以合歡怡怡愉愉夫如是又安得  
喪於而德害於而軀亡於而國敗於而家乎二客於是蹶然而起  
負牆而立請誦惟酒無量不及亂之言庶無過與不及

龜巢彙卷一

龜巢彙卷二

詩

奉陪陳伯大先輩及趙師呂張伯啟朱月江金清夫兄弟登金牛  
臺

六龍城西呂城東奔牛古堰臥兩龍誰築高臺水中沚野有蔓草  
牛無踪河邊青苔生白骨刀鎗箭瘢猶未滅問知八十二年前戰  
死當時皆義卒鐵馬遁去劉將軍大家牽羊走燕雲三百山河獻  
明主北駝南象今紛紛登臨且喜得佳客鞠育菁菁已堪摘浮雲  
世事勿復論一醉西風眞上策

和蘇竹逸秋日還鄉

夢繞淞江太湖上舊家鄰里古魚磯長腰秔米家家熟巨口鱸魚  
箇箇肥爲客已驚絲滿鬢還鄉何待錦爲衣筆牀茶竈蓬窗下來  
往風帆數日飛  
呈趙徵士



吳姬手執金巨羅春風笑面生紅渦主人畱客長夜飲客拜主人  
辭酒多主人沈醉客亦醉客散扶歸主人睡殘杯冷炙廚頭傾鄰  
家兒有啼飢聲

江碧山千戶席上以我愛夏日長分韻得夏字

堯階舞干羽聲教溢夷夏清風細柳營長日有餘暇兵廚移竹林  
觴詠集陶謝酒傾虎頭杯盤割牛心炙佳哉醉鄉境漸入如啖蔗  
客去復相期明朝還命駕

自冬而春舉家病疫予幸獨無恙旣而疾止詩以自賀并記里俗  
之陋云

昨歲夏秋旱四國人顛連餓死非不悲病疫尤可憐甚者枕相藉  
遺骸飽烏鳶安知期月餘厲氣猶鬱然余家百餘指連屋魚貫眠  
顧我如一木支此敗屋顛上堂問湯藥下廚供粥饘鄉鄰不我過  
恐爲疫鬼纏俚俗無足怪妖巫肆訛傳所賴學之力賦命必自天  
立言斥淫祀秉志金石堅慈親今健飯孫男仍滿前我妻及女嬰

問寢相後先嗟哉黃楊木脫此厄閏年東風播陽和草木仍春妍  
鄧道士雪中遺梅花一枝詩一首酒二樽見惠館人王文甫飲余  
遐館樓次韻答詩仍要鄧晚集

欲作梅花賦才疏愧廣平一枝春到手酒香詩更新開樽對雪飲  
將詩遣童去亟請過蕭齋石鼎與聯句

栽桑

春雨牆陰手自鉏賸栽桑樹遶吾廬歸來笑與山妻說來歲春蠶  
葉有餘

九日對雨

白雨何其急青山不可登兀然無客到閒似坐禪僧盆菊數十蕊  
村醪四五升猶勝陶靖節冷眼望王弘

養鶴

西鄰主人翁養鶴如養客專童供鶴料稍慢童受責試問鶴何好  
毛羽喜潔白又能舞翩躚長鳴振金石客有鶴骨清粹然含素德

窮居以詩鳴冷面常菜色賦命鶴不如可爲長太息

送李知事赴邵武

金壇學質字竹操延祐中以詩經及第

舟車千里遠甌越萬山連舊俗名多獷孤城地極偏朝廷用儒術幕府贊承宣更喜詩三百東南可盛傳

送凌萬里絜家歸海陵

鄰居三十載奈此別離何客路秋光薄歸舟月色多雲山連海岱吳越隔江河珍重千金璞良工更琢磨

郡學西齋夜坐懷親友

客心清似水學舍冷如冰苔榻三秋雨芸編半夜鐙病多憂老母會少憶良朋麋鹿山林性悠然愧未能

送兄遊補陀山四首

蓮花已結東林社藜杖復尋東海遊千百億身黃面老化城今豈在瀛洲

飛鷲跼跼水連天行李蕭蕭客上船津吏不須勞詰問道人來禮

白衣仙

煙霧昏冥晝不開颶風吹浪雪成堆獻珠龍女應相笑何處扁舟載月來

堂上慈親老惜兒遠遊尋佛笑兒癡倚門望汝歸來日三月闌珊

四月時

寄錢塘教諭金君捷

紫鳳銜書下九天司徒今日復興賢欲知別後成何事和得陶詩百許篇

奕王伯祥二絕

昨朝相別夢初萌一夕那知隔死生蹠自永年顏自天大鈞於物信無情

傷哉郎罷客西湖匍匐歸來玉樹枯風雨高堂春寂寞忍聞長夜

泣諸孤

惠山泉和翟玄玄先生韻



青山屈曲九龍蟠一派清泉噴雪寒陵谷變遷知幾度石池洋溢  
不曾乾幽亭過客分雲液古寺閒僧煮月團莫向貴游誇絕品恐  
煩迢遞入長安

耕隱

爲蕭徵士作

蘭陵溪上梅花村世居齊梁之子孫瀕溪沃壤足禾黍教子讀書  
深閉門時人笑渠生理拙渠亦笑人多覆轍春來烏犍一犁雨歲  
晚黃精三尺雪有時獨自舞短蓑飯牛別作耕田歌長安車馬自  
塵土奈爾濯足滄浪何君不見蘇秦爲無田負郭平生不識耕田  
樂奴顏婢膝謁諸侯黃金載多禍隨作君今有田兼有書夜深鐙  
火照犁鉏只恐一朝富貴逼人去猿鶴笑人畱不住

送侄僧德無言歸靈隱

鴻鵠之志飛冲天鯤鯨入海方悠然汝生不受塵網牽作佛要在  
靈運前先人壁經汝舍旃棄家乃著牛車鞭袈裟斜擔雲半肩東  
西南北十五年邇來參得靈隱禪神鯉躍出西山顛歸來瓦瓶攜

冷泉脩以白雲歌數篇我昔西湖艤酒船曾聞老猿啼翠煙新秋  
雨洗山娟娟石頭路滑難攀緣汝今言歸磨汝磚山中之人應汝  
憐道經孤山腳下梅花邊敢煩爲我問軌林逋仙

寄金陵陳雲心先生先生少學道游寓兩浙後復歸家於金陵以  
能詩善琴終知臺閣然屢薦不起學者多從之游遠蒙惠書故

以詩代簡

先生閉戶自婆娑御史乘驄每見過白下詩名傳不朽紫霞琴譜  
訂無訛樓居臥看三山遠學子從來兩泐多一別十年還念我遠  
廬書尺問如何

送陳漢卿赴江陰州知事

玉雪風神秀雲霄志氣雄騫騰從早歲交結盡明公鶚薦無虛日  
鵬搏適順風修名今樹立令德愈磨礪清露金莖表黃流玉瓚中  
詞章追太史雕琢謝良工綸綍重恩被無裳秩漸隆雄州勞贊畫  
善政惠疲癯幕府文書簡江城草木空風濤秋浩蕩煙雨晝溟濛

退食揮塵吏忘機對海翁仕優吟更好境會意何窮離索遙憐我  
殷勤爲擊蒙

慈親年八十四首

慈親年八十言笑滿懷春衣食兒躬稼蒸嘗婦采蘋一閑殊可喜  
長健不妨貧眉壽曾孫酒黃花節物新

慈親年八十早歲歷兵戈老此太平世晏然安樂窩門前流水活  
隴上白雲多兒輩生涯好東皋雨一蓑

慈親年八十一子帶經鉏貧賤無鐘鼎辛勤有屋廬小園千箇竹  
老圃四時蔬鄰舍閒來往諸孫御板輿

慈親年八十頭鬢雪紛然安得長生術終爲不老仙平生甘澹泊  
中歲絕腥羶淨拂燒香几持經繡佛前

聞友人陳子山廷試第一喜而有作用寄乃弟子方  
紫衣使者日邊來爲道元方作大魁金闕早朝鳴佩入瑤林日宴

戴花回九天恩澤沾多士一點文星近上台愧我無成驚且喜漁

蓑獨宿舞溪隈

犇牛巡檢胡潤卿示予胡婦殺虎圖其事乃前至元七年濱州軍

士劉平之戍棗陽與妻胡俱在道夫爲虎所得胡逐虎殺之潤

卿持畫索詩因題其後

猛虎誰不畏良人吾所天眼看性命落虎口妾身雖死何足憐嗟  
哉劉郎妻力不猛於虎怒氣一奮發執虎如執鼠想當攘臂急逐  
時太山可拔城可隳呼兒取刀兒後隨刀入母手虎腹披當時若  
使遭虎齧虎口甘心作同穴嗟哉劉郎妻今古誰足擬馮媛當熊  
爲君立曹娥殺蛟隨父死嗚呼裙釵之下有君子宜爾芳名著青  
史

鮮于瑞卿還碧亭

鮮于令子平泉莊有亭翼然水中央天光雲影白日靜菱葉荷花  
清露香柳下繫船魚可釣坐中畱客酒盈觴門前漁浦接洮滂白  
鳥飛去煙蒼茫



朱逸齋先生挽詞三首

前朝士習雕蟲巧先生詞章風格老功名到手陵谷變雲霖竟作  
商山皓駢花儷葉墜秋風獨抱遺經自探討嗚呼一歌兮懷我師  
平生瓣香今爲誰

階庭桂子初芬芳盲颯怪雨俄催傷中郎賴有女傳業安然得老  
溫柔鄉平生綴輯富篇章才名不與身俱亡嗚呼再歌兮雲石裂  
斷腸猿叫黃山月

憶年十五受學經先生眷之雙眼青每隨杖履訪朋舊耳聞目擊  
皆儀刑而今先輩總淪歿黃鐘大呂吾誰聽嗚呼三歌兮涕淚零  
招魂不來秋杳冥

送秦彥明二首

美人木蘭舟春風挂帆去舟輕疾如飛可喜亦可懼浙江多風波  
越山暗煙樹孤月照蓬窗今夜宿何處

老驥千里材鹽車九折坂行行復行行伯樂遇何晚之人懷帝閭

丹霄路云遠一笑膏吾車疇能爲推挽

送趙方叔入京

去去京華八月初聖皇清暑返鸞輿五門雨洗紅塵淨九闕涼生  
碧柳疏慈母衣裳縫密綫丈夫門戶出高車翰林若見陳修撰爲  
道野夫曾寄書

贈術士楊南溪

有客有客楊南溪天文之學師重黎又讀郭璞青囊書書今不用  
如筮蹄十年湖海聲藉藉觀水觀山雙眼碧一官雖冷氣如春那  
識人間有金璧相逢林下秋雨乾高梧月落天氣寒杯酒殷勤儘  
清興作詩醉寫烏絲闌

立秋

苦熱念秋至立秋意欣欣一雨忽破塊千山淨無塵新月挂高樹  
涼風灑衣巾重束囊中書懷我堂上親丈夫苟未遇妻孥耕且耘  
胡爲苦離別低頭長傍人

和孫伯昭佛社二十韻

祭法垂明訓邦家祀有功愚氓何悖禮佞佛乃成風婦女僧流雜  
香化佛社隆三身誇悉怛千眼慕圓通金像瞻如在珍羞供極豐  
九衢迎象駕百綵製天宮窈窕閨房秀聯翩市井童莊嚴森侍衛  
游衍適西東行道駢緇素飛塵隘輓紅寶幢雲母扇銀燭水晶籠  
饒欽伶倫後袈裟粉黛中亂倫言可醜妄意福來崇廢業兼旬久  
揮金與土同盤游律有禁長吏聽如聾闔郡喧邪說同袍見直躬  
新詩來滿紙高論發羣蒙白雪無人和皇天鑒此衷不爲因果惑  
真乃丈夫雄感激徒三歎棲遲奈兩窮抗言摧佛骨所願學韓公  
贈丹陽歸真觀諸葛鍊師

鶴溪之水鳴瀟瀟九曲龍蟠護仙宅東南一望天宇寬綠埜平蕪  
接洮瀉階前老樹三十圍門列修篁數千戟綠陰庭戶溼空翠五  
月天風吹巾舄埜夫何緣飲丹井偶遇尋真羽衣客焦仙莎衣煮  
白石呂翁榴皮題素壁物換人非數百年子復幽探訪陳迹黃冠  
老師臥龍種知雄守雌室虛白說說弟子皆速省中有詩豪更琴  
僻哦詩鼓琴師亦喜一唱爲之三歎息嗟予汨沒塵土中到此悠  
然百憂釋采芝終日不盈簪曳屐長歌晚山碧

寄題蔣仲益野趣亭

陶潛歸故園日涉乃成趣迷途雖不遠已恨出門誤眷茲亭中人  
不識功名路幽居瞰洮瀉詩盟結鷗鷺杭稼湖上田花竹家後圃  
山色開畫圖波光照窗戶寒鐙課兒孫春耕了農務杖履三十年  
曾無一塵汙人生天地閒溘如草頭露軒冕渠自榮刀鋸吾無懼  
熙熙太平世千載實難遇野趣只自娛難以語童孺

代簡蔣成玉三首

往年同掣釣鼇鉤空載錢塘月滿舟從此相思不相見槐花又老  
數番秋

東風傾葢采芹亭一笑相看兩眼青老我無成今學稼荷鋤依舊  
帶遺經



春來一月苦陰雨少頃雨晴邀客嬉金斗城西芳草路水邊楊柳  
青離離

送牛季和赴旌德教諭

積雨喜新霽六合無纖埃江頭楊柳風送客征帆開把杯問青天  
天網信恢恢之人飽經術吐辭粲琉璃不居白玉堂合著黃金臺  
培風展雲翮胡爲尚低徊往矣教巖邑苑然育羣才峩峩敬亭山  
相看亦佳哉薺麥茂霜雪蛟龍候風雷秋風木瓜熟好題書後來  
慈烏

倚窗看慈烏生雛念雛飢黃口未能啄雌雄交哺之羽毛日以長  
飛飛展雙翼父母乃巢居羣雛爲求食得食能幾何入口不下咽  
去時聲啞啞歸來羽翩翩大烏能爾慈小烏能爾孝他時子爲子  
宜亦如爾報萬物人爲靈不孝誠何心我今作此歌警世還自箴

余子元御史枉駕敝廬以詩貽次韻奉贈  
奇哉古秦鏡奸邪見肝膽當日獻天子重瞳目親覽邇來匣中藏

寒月光湛湛玉臺重拂拭清輝元不減

陪全公遊仁惠觀途中酌酒賦詩予和二首

吳山相送越山迎二十年前驄馬行今日經從重遊處詩情秋色  
喜雙清

山中羽人山下迎籃輿看山吟復行松陰呼酒聽禽語一笑如見  
黃河清

邀則誠郊居小集

別多無奈苦相憶賴有尺書時往來逢人爲說烏寶傳此客合貯  
黃金臺北風塵土歲云莫南湖水波冰欲開扁舟短棹出西郭元  
日相期看野梅

同遊趙君模

荒城歲晚冰雪繁幽人校書深閉門書中樂與聖賢對門外寂無  
車馬喧年光冉冉老將至心事悠悠誰與論肯爲梅花過寒谷定  
邀高子共清樽

借丹陽諸葛用中金壇王元徽同應鄉試阻風無錫和用中韻  
船窗晝暝鉤簾坐暘谷雷鳴送雨來嘉友喜如雙鳳集清樽且對  
九龍開槐花滿眼催行色桂子吹香入酒杯黃帽怕教牽纜去請  
看風浪雪成堆

次鄧混然韻送溧陽王元仁兼簡乃父時可先生兄元德

客裏怱怱送客歸江空歲晚雪晴時父兄相見煩傳語書劍重來  
好寄詩世事兩年多反覆人情十日九驅馳雙橋東畔王猷宅杖  
履幽尋未有期

丹陽道中早行過呂城寫示諸葛用中

寒雞丑前鳴雨急風更惡吾欲遄吾車僕夫殊不樂坐待風雨休  
早出丹陽郭行行二三里風雨復交作造化小兒劇變態不可度  
雨溼衣欲冰風吹面如削前途迷遠近古堠暗摸索懷哉故人居  
不遠可依託奈此道路難咫尺進復卻之人書萬卷芸窗浸書閣  
閉門了無事臥聽簷花落吾年幾倍之賦命乃爾薄詩成往呈似

定發一大噓

全僉憲自黃州以西洋布遣騎見惠作謝

十月北風方怒號故人西布似綈袍遠勞使者傳書信笑看佳人  
落翦刀畱得海圖飛鳳鳥絕勝山芻集鵝毛歲寒冰雪空山裏千  
里相思桃本桃

除夕和諸葛用中韻

盡道王門可曳裾青山吾自愛吾廬新年且喜屠蘇酒舊業重修  
種樹書堂上弄雛慈母喜階前繫馬故人疏東風一樹梅花雪折  
得南枝報鯉魚

寄陳修撰

吾始師麟筆羣公繫馬遷欲明前代事不失後人傳紫禁煙花繞  
丹霄日月懸書成添一笑高步更聯翩  
諸葛用中邀賞牡丹痛飲終日且畱僕與陳鍊師宿成趣軒各賦

詩十二韻



金谷春風暖名花宿雨霑錦宮晴覆幄華屋晝垂簾公子開瓊宴  
仙人駕玉蟾妙年皆可畏老態不吾嫌柳雪沾衣袂花枝壓帽簷  
舞裙雲冉冉歌板玉纖纖鸞鳳鳴絲竹羔豚出釜鬻初筵猶秩秩  
終日竟厭厭客少情偏洽杯深意轉恹猖狂客阮籍謬誤怒陶潛  
大笑南柯蟻深慚竹上鮎題詩紀行樂磬折謝勞謙

次韻羅居仁閒居遣興

春近清明日花開金斗城閉門忘寵辱染翰作真行芳草自生意  
青山不世情何由過幽壑攜酒聽松聲

楊氏橘隱軒

十年走京洛衣冠混泥途脫身車馬塵竟作山澤臞開軒面流水  
坐對橘一株客來必留連手談以爲娛手談亦何好聊適歲月徂  
南風綠陰涼長日幽鳥呼寂然此樹下身如蜎甲枯千橘比戶侯  
斯亦非吾徒况彼終南山捷經爭奔趨驅車過吾里豈不愧木奴  
江浙平章夔夔公家養二鴿其雄斃於狸奴人以他雄配之遂鬪

死作義鴿詩

翩翩兩飛奴其羽白如雪烏獸忽相殘雄死雌蹶躒絕食累數日  
悲鳴聲不歇蒼頭配他偶捍鬪項流血血流氣猶憤血盡氣力絕  
嗟爾非鴿鴛失偶不再結嗟爾非雌鳩所性殊有別千人擬共姜  
之死同一轍夫何宮闈內往往少貞烈夏姬更九夫河閒不可說  
聊爲義鴿行永激婦女節

韻得茶字

白鶴溪清水見沙溪頭茅屋埜人家柴門淨掃迎來客薄酒遲留  
當啜茶林響西風桐隕葉雨晴南晦稻吹花北窗幾箇青青竹題  
徧新詩日未斜

傷田家二首

蹋蹋溪上車薿薿田中苗蹋車非不勤水盡苗枯焦人力不勝天  
奈爾秋陽驕

初春脫寒衣典來事東作歲旱穀不收且無衣可著飢寒去何之  
前途半溝壑

又二首

堯田九年水湯田七年乾保民苟無術羣黎總凋殘我農今疇依  
州縣父母官父母不我憐何從語辛酸

神農作耒耜后稷教稼穡安知後之人耕稼多乏食乏食未足憂  
山中有黃犢奈何點鄉夫州城要修築平明荷鋤去雷鳴忍飢腹  
菊泉詩爲孫嘉賦

循彼南山言采其菊爰有寒泉在彼空谷挹彼注茲有芬其馥既  
澄爾心亦瑩爾目所謂伊人溫其如玉宜爾眉壽荷天百祿賜之  
南陽爲爾湯沐

嘉定雜詩二首

黍熟湖田花鴨飛雨香秋浦翳魚肥野翁織屨街頭賣日暮裹鹽  
沽酒歸

趁潮艇子若游龍潮落橫塘日下春負郭人家星散住水邊多種  
木芙蓉

崑山

時州泊移居太倉

孤峰雲疊疊舊邑草蕭蕭覓石敲新火拏舟趁早潮沙田紅稻熟  
溪網白魚跳寂寞悲秋客蓬窗酒一瓢

寄邾仲義二首

我思垂虹橋滄波綠楊津鄂鄂棣花宅瞰此江之濱荷衣佩秋蘭  
野飯羹紫蓴一從橋上別花發三年春相思復相思爲爾歌停雲  
我思釣雪灘煙波數千頃幽人讀書罷乘風放孤艇沙頭弄明月  
水底見天影鱸魚秋自肥楓葉霜自冷釣鈎未連鰲聊此駐清景  
過太倉

楊柳溪邊繫客槎桃花雨後柳吹花東風地角環滄海日夜潮聲  
走白沙市舶物多橫道路江瑤價重壓魚蝦天妃廟下沈玄璧漕  
運開洋鼓亂撾



簡崔徵君

姚參政門人

牧庵夫子久絕筆巾笥藏書手澤存白首誓將深報國青雲多是  
舊同門去年雪裏西郊別何日花前北海樽芳草萋萋春又晚杜  
鵲聲裏憶王孫

和王文振遣興

齋居幽事頗關心晉帖時時手自臨徐孺不來常挂榻鍾期相遇  
始彈琴東風城市紅塵暗長日軒窗碧草深聖代明堂方有作豈  
容方棟老雲林

送陳縣尹之東流

東流父老候飛鳧莫遣前驅叱避途好問去年天子詔邑中差稅  
受恩無

哭全僉事

蚤歲乘驄馬當時負重名四川豺虎縛一疏鬼神驚解組歸江漢  
還家訪友生安知成永訣杯酒呂蒙城

羣鼠

羣鼠穿我墉晝出不我避蒼頭往執之赤手反遭噬號呼驚四鄰  
狸奴盡呼至羣狸視如盲鼠輩從此逝老我氣力衰長吁夜無寐

寄惠山鑿長老

字仲明號大虛

太湖之陽九龍峯金田蟄爾僧中龍山頭雲出楚漠漠石眼泉落  
聲淙淙呵冰古硯寫墨竹掃雪臨軒看碧松別來兩度歲華晚祇  
見梅花信一封

答友人問訊

官河春水綠粼粼重結衡茅近水濱膝下斑衣三稚子堂前白髮  
一慈親閉門無事足爲樂插架有書何患貧林田更喜連年熟釀  
得香醪味更醇

元日試筆

諷草堂前竹數竿歸來喜見總平安春風暖入屠蘇酒朝日光生  
苜蓿盤萬國臣鄰同受朔一年時序又更端買臣未衣還家錦庸

豎從教白眼看

送新安程以安先生入京

春雪初消楊柳黃揚雄奏賦入明光鶯啼禁苑煙花暖人著宮袍  
雨露香聖代百年周禮樂儒林諸老漢文章政須述作揮椽筆風  
月平分白玉堂

和京口張君益南園新居

鐵城如甕藏華屋金榭垂絲鎖畫橋賀廈燕來尋舊主灌園人立  
候春潮戲題花月詩皆好醉覽江山酒易消天意也應畱遠客雨  
師連日瀉天瓢

王元德別去數年連會呂城諸葛氏家寫蘭見贈且索詩送行時

予辨惑編成或有忌而謗之者因併及之

與君一別更幾霜喜君學與才俱長向來作詩多刻苦而今格律  
殊高古向來祇爲竹傳神而今復爲蘭寫真懸崖疊石足幽致古  
木寒藤有生意胸中清氣吐筆端有聲無聲俱可觀相逢莫恨無

知者縑素盈箱乞傳寫絕勝編書斥異端老我穿屋牛衣眠十年  
歲月磨硯鐵贏得羣龙爭吠雪願君爲作指南車獨行周道當何  
如

答凌萬里見寄

移家一別十年多子髮蒼蒼子若何老去情懷偏念舊向來消息  
傳訛遙憐杜甫因詩瘦欲爲揚雄載酒過稍待長江羣盜息筒  
簫吹我醉時歌

送辛明善之縉雲監稅兼簡高則誠錄事

縉雲山下水盤盤一舸夷猶七十灘如此壯遊良不惡何妨遠別  
去之官風生白苾征衫薄雨過黃梅客路乾傳語郡中高錄事小  
編求序冠篇端

題桃源圖

昔年曾讀桃源記會得陶潛言外意柴桑避世如避秦恨不山深  
絕人事借秦爲喻說桃源漁郎之遊皆寓言不然溪上山如故何



乃舟回竟迷路若令此景真在山此翁必入窮躋攀編詩不用書  
甲子姓名無復畱人間只今唐虞太平世花柳村村足佳致不須  
重展畫圖看四海桃源復何異

張子毅生日招飲以詩壽之

深山大澤生龍蛇文彩風流出故家柴桑負郭田三頃燈火乃翁  
書五車南風初結石榴子細雨微挹菖蒲花生徒樂爲君壽考老  
夫也得醉流霞

避雨

二首選一

繫馬瘦亭東郵亭似鶴籠長河飛白雨高樹灑清風州界纔相接  
鄉音便不同野人來問字錯認是揚雄

贈何敬存

歲歲九龍峯寒泉落冰雪美人此傾蓋爲我滌煩熱世途自荆榛  
肝膽無楚越憑高一長嘯清風滿林樾

送崔仲德歸錢塘

家住湧金門瀕湖五畝園梅邊童養鶴松下客呼猿頭白心猶壯  
官卑德自尊徵車未來日詩禮教諸孫  
送盛本初教諭之全椒  
淮海維揚才俊多先鞭奈爾妙年何瑀花春酒三年別滁水秋風  
一葦過聖代只今興禮樂人家是處有絃歌安書寄與南來雁時  
有新詩到薜蘿

辛至善永思亭

而家本西域而翁葬桐鄉鄉人猶永思哀哀況諸郎春雨暗宿草  
秋風悲白楊別來春復秋於焉奉蒸嘗思成見容色宛在羹與膾  
一念不少休東流水湯湯到海水未已此心未渠央貽謀子若孫  
百世宜有慶

次韻陳知遠秋日言懷

奔牛古堰頭築室俯滄洲愛客常沽酒耽書不下樓青山銜落日  
白露溼高秋最喜多兄弟雙親百不憂

諸葛用中成趣軒

幽幽小園池結屋三四楹若人青雲器乃有邱壑情涉園以成趣  
尚友陶淵明池水魚潑潑花枝鳥嚶嚶太極圖外意芳草階前生  
吾趣吾自知對客無以名欲識琴中趣且聆絃上聲欲識酒中趣  
百壺與君傾啖蔗勿遽棄佳境將來迎

李御史過訪

霜飛白簡照南臺蚤歲君門射策來獨立敢言天下事實封頻到  
御前開駢駢驄馬過茅宇戀戀綈袍念櫟材慚愧山林麋鹿性偃  
然方樂臥蒼苔

題畫鷹

蒼鷹獨立清秋樹劍翮風生欲飛去林閒燕雀同成羣海上駕鵝  
亦無數駕鵝燕雀動聲喧擊之不擊無足言快煩爲我殺鉤鵝勿  
使空人之宅曠人城

曹娥廟

死孝魚龍窟垂名簡冊香江流隨姓氏鄉土奉蒸嘗黃絹碑辭古  
青山宰木長世閒梟獍子何而過祠堂

伏日奉懷江浙高掾史次早友人黃仲德入杭以詩代簡

伏日常年苦炎熱今年伏日風雨涼官曹早出丞相府賓客高會  
湖山堂垂楊繫馬綠陰靜畫舸采蓮紅粉香應有新詩紀行樂武  
林風物增輝光

河魴

世言河魴魚大美有大毒彼美吾不知彼毒聞已熟其子小如芥  
食之脹如菽腹腴膏血多目脾頭項縮烹調苟失飪禍至不轉矚  
或言直一死輕命重口腹邇來州里閒杯羹數家哭譬諸安與史  
敢用甘顛覆溺愛多不明奚止一水族作此河魴詩逢人敢忠告  
過道鄉先生墓有感

忠公天下士夙學能慎獨平生寸心赤耿耿照黃屋元符引裾諫  
痛甚賈生哭上言正中宮下言斥當軸直道時不容除名竄荒服



建中及崇寧寵辱手番覆炎蒸嶺南地文章散清馥晚歲歸故山  
林莊竟埋玉向來望佳城鬱鬱暗松竹今爲禾黍區春雨耕穀  
翁仲知何歸雲仍困無告嗟予咕嗶生斯文賴私淑願言理侵疆  
重植宰上木愚公將移山自謂計已熟精衛欲填海可奈力不足  
傷心復傷心殘碑臥荒麓凡道鄉詩並入思賢錄內

簡吳門葛可久

東南古吳會河江沒坤軸閭門萬人海驪珠混魚目嗟爾珊瑚珠  
光彩照壑谷挺挺八尺軀便便五經腹復用岐黃書教子時共讀  
座有焦尾桐樽餘荔枝醪我室雖甚遠扁舟往來熟此別獨經年  
羹牆見鴻鵠珍重應時須抵鵲毋以玉時分省寡文武士聞可久欲應命故有末句

寄謝京口俞府判先生辨惑編序

憶昨攜檣楫往學太古音清風一揮手爲我湔蓬心言歸臥空谷  
神飛繞帷林寄來明月珠價重雙南金豈不懷報章慚愧秋蛩吟  
人生少會遇歲月何駸尋晨瞻蒜山高夕覽江水深江山渺予懷

塵土盈我襟行當駕黃鶴從遊閬風岑

瑤花行送盛克明教授歸維揚

揚州好花非不多奈爾絕品無雙何水沈香骨素玉蕊琉璃滑葉  
青瑤柯東風二月花時節二十四橋香浸月小山叢桂避芳塵東  
閣官梅褪殘雪向來名士多品題拈香御史今亦知何日移春獻  
天子不負此花天下姿

王長史代祀天妃回偶留常州爲予作辨惑編序驛亭飲別以詩

謝之

長史字叔善名餘

使者祈靈海上回蛟螭遠避漕船開入朝將進賢臣頌當路皆知  
館閣才傾蓋道邊欣邂逅羶車林下久徘徊綵毫題我蒲編去鸞  
鳳回翔燕雀猜

奉同于尚書賀高太尉承恩詩

紫鳳銜書下日邊一樽金幣禮高年天恩已見來三錫月俸猶供  
食萬錢綠墊午橋閒几杖長洲茂苑美山川舊家池館花如錦蕭

鼓春風送酒船

次韻陳心遠久雨

秋風捲蘅茆我屋漏已久春來復多雨水馬階下走人皆憂巨浸  
吾謂晴可守獨憂東海上連年聚羣醜官軍涉鯨波鼠輩未梟首  
雨疇作沮洳閒吾扶犁手何以解此憂山餅瀉春酒

喜復鄒忠公墓田詩謝兩郡侯十首

新松重植古人墳五馬同來兩使君歸我侵疆三十畝山靈慚愧

謝移文

白頭翁媪倚林莊笑指荒邱舊石羊誰料百年荆棘裏又看金紫  
奠椒漿

奕奕祠堂春雨生青山紅塔照簷楹簷前燕雀聲何喜冠蓋如雲  
爲落成

去年風雨暗桑麻今雨楸梧一望賒寄語無情梟獍子壠頭銜土  
有慈鴉

傾囊不惜購殘碑爲愛前朝幼婦詞賴有賢侯知古意從教俗士  
笑書癡

府公遺愛沾幽壤吏部文章勒翠珉寒食清明人灑飯落花飛絮  
鳥啼春

里翁猶記前朝事五馬年年上冢來白鳥能言高柱立黃楊合抱  
細花開

青山無數麒麟冢人到林莊下馬過爲問路傍楊柳樹向來興廢  
事如何

景鄒亭在稼亭東斷礎猶存草莽中羣圃何時重購築羹牆長見  
造鄉翁

千古一杯忠義土青山門戶碧溪陰溪流冷浸中宵月照見先生  
未死心

三月歸曰舍作五首

十年爲客不窺園數日還家獨閉門兒女牽衣拂塵土親朋折簡



閒寒暄江南花柳青春好淮上風煙白晝昏聞道賊渠今磔死雨窗歡喜倒芳樽

余生甘分老漁樵竹徑柴扉掩寂寥舍後薄田堪種秫門前流水喜通潮人遭歲歉餐榆粥天假春晴養麥苗早起憑高望西北楚氛猶自未全消

天開鐵網放鯨鯢甲馬歸營罷鼓鼙四海蒼生皆鼓舞三苗何物竟昏迷愁聞近日軍需急幸得新年米價低春雨壟頭耕未得桑林布穀爲誰啼

鴉鳴鵲噪總無靈庸懦譎言更莫聽萬國山河春蕩蕩一時煙霧晝冥冥官軍自足追窮寇縣吏猶勞募壯丁何日賣刀仍買犢花村雞犬共安寧

飛芻輓粟未能休嗟我鄉鄰日夜憂何事羣兇恣猖獗半年諸將擁貔貅桃花過雨紅顏老杜宇傷春血淚流堪笑腐儒無可用下帷依舊說春秋

記夢

至正十二年六月初八日夜夢於先人舊居之後堂看故兄所遺春帖有讀書傳家等語因念先人嘗言曾大父以儒名家從父領鄉薦爲校官我兄猶好學而文今其孫無有似者次兄二子皆廢學吾三子亦未成立以此感泣旣覺而涕泗交頤心甚怊惕因作詩以示兒輩

苦熱夜難寐坐久方偃息夢歸巷南宅竹樹皆歷歷伯兄手題詩猶存後堂壁余時因感傷先世本縫掖書聲今寂寥寶樹化荆棘立觀楷書字哭泣淚沾臆覺來憶詩語白月光滿室重念世澤微門衰自疇昔我方垂髫時伯父死於溺音容兩茫然了若不相識但聞能孝友風姿頗清逸四十五年遺文總狼藉題壁尙何有此夢生此夕子生雖無成多賴讀書力指劇鏡上塵積累機上識嗣續幸不泯所願能自植木也年十六林亦及二七阿森今九齡父母俱愛惜不爲樵牧童又不學稼穡螢窗與雪案寸晷宜愛惜

讀書承世業此語誠藥石汝曹能黽勉是亦尊汝伯旁觀勿相笑  
說夢等兒劇

客來

革孔頻移轉覺寬酒杯雖舉不成歡客來爲說紅巾苦窗下榴花  
亦怕看

進士馬仲達爲常州路錄事司達魯花赤監築城以詩見示余次  
韻答

風欄抱膝聽鳴蜩頗覺鄉鄰有叫囂四海百年歸一統兩階何日  
格三苗斗城新築關門早鐵騎南征去路遙年少參軍金榜客可  
無奇策上丹霄

至正壬辰十月二十二日於妻兄任氏家避亂得家兄信感歎而  
作

避地橫山下離家十日餘鴿原常在望魚素忽傳書猛虎走城郭  
腹蛇生里閭欲歸歸未得搔首獨躊躇

初度有感

十一月初六日時  
年五十五萬居任氏

我生何不辰垂白遭亂離鄉城賊滿眼咫尺不得歸百年今已半  
喘息能幾時桑蓬負初心蓼莪有餘悲慚愧未買臣富貴能自期  
男兒生無成百齡亦何爲對酒不復飲把劍空欷歔

寇退別詹魯賢

君家天台下我家瀟湖邊針芥一相投膠漆四五年倉皇避羣盜  
妻子同一船中途恐離散經旬各憂煎相見若平生相依益相憐  
橫山樹歷歷東洲水濺濺山水非不佳旌旗日紛然兩家妻與子  
一月夜不眠明發竄荆棘衣被裹囊餽暮歸客欄下耳語青鐙前  
葵心傾太陽杞國憂崩天逝將哭秦庭乞師掃烽煙臨期賊遁去  
此志終鬱然生閱明年春東風草芊芊慘別牛城下相顧猶夔竑  
重結生死交永矢金石堅

送京口劉千戶歸營

桓桓千夫長胸有萬甲兵生長太平世終日醉六經一朝著兜鍪



羅馬出益城擒賊不知數報國傾丹心臺司方論功憲節借按行  
部曲嚴武威瘡痍撫罷毗寶刀洗荆溪鐵馬歸柳營鶯花已春莫  
草樹猶血腥一雨殊足喜四野布穀鳴吳兒賣戈劍買牛事春耕  
顧瞻天地閒埃氛未全清何當盡掃除丈夫功業成  
過金陵明道書院訪友人高孟之山長適遇秩滿且有側室洗兒  
之喜作詩賀之

客來鳳臺下適見生鳳雛斑斑五色羽啾啾百尺梧眾客席上珍  
愛君掌中珠度曲紫玉簫瀉酒黃金壺起舞爲君壽試啼呼阿奴  
梅花亦解事含笑立庭隅  
過陳時舉宅畫壁

雙松歲寒姿拳石太古色我昔山中遊憩此松下石松花雪霏霏  
松葉風瑟瑟安知此清景相對復今日拏空兩髯龍乃在一書室  
主人罷鳴琴宴坐室生白客來苦炎熱傍樹欲挂幘不聞天籟鳴  
但見空翠滴煩襟頓如洗林壑幽興適經月數相過明朝有行役

黃埃赤日中令人轉相憶

孫伯昭與陳天倪用簡齋一涼恩到骨四壁事多違爲韻賦詩見  
寄余和答之

薄田西河上種穀多種秫秋雨喜甘霖牀頭釀真一我思山中人  
不見如參商蒲萄好畱客母用博西涼秋水漲百川無人洗乾坤  
堪笑閒閣下空懷報主恩東齋可談書西齋可寄傲山中儘寬閑  
俗客自不到淒淒草上霜耿耿天上月遙憐兩淮地千里照白骨  
吾生西復東徒以口腹累懷哉安樂翁不出時有四明月足可喜  
好句無用覓寒蛩爲誰悲唧唧鳴四壁殷勤語兒曹要識一丁字  
明年世清寧依然重文事主人錦氍飲客金巨羅遙憐古巖桂  
香似廣寒多持身服苦淡適口忘甘腴青雲丈夫志白首慎毋違  
哀陶堯佐 并序

至正壬辰冬紅巾陷常州驅州民攻京口不從者殺之我邑人陶  
君堯佐不幸爲賊所得且欲并驅其諸父昆弟以行君厚賂之

以一身代眾人之急從至丹陽聞官軍鼓譟聲卽倒戈刺賊渠  
墮馬因被害時吾里有識君者旣而語其事於予予以君嘗讀  
書知逆順故誠信而悲之閱二年方欲問諸水濱筆之埜史以  
暴白其難明之志其族人有爲之後者葬君衣冠予述前所聞  
作詩哀之

嗟爾練湖水不洗斯人汗冤血化爲碧春雨生苔蕪皇天有老眼  
斯人亦何辜生當太平日三世家業儒本無縛雞力苦被豺虎驅  
孰知能賈勇倒戈誅賊渠鐵石一寸心齋粉七尺軀而家旣能全  
而憤亦以舒但恨薰與猶混然骨同枯華表鶴不返竹林啼鳳雛  
衣冠藏古邱魂魄遊清都擊賊作厲鬼當與張君徒天意不可問  
愁雲畫模糊

兵後到杭馬掾史置酒見招且示以所與石處道邱長卿西湖倡  
和之什次韻一首

西湖山色冷如灰前度劉郎今又來紅粉畫船今寂寞斷橋流水

自縈回一堤寒柳風煙老兩鬢飛蓬歲月催賴有故人能慰謝綠  
樽重對晚山開

西湖曲

西湖春水綠於酒西湖女兒嬌似柳依稀二月三月閒攀折千人  
萬人手我有一索青銅錢明朝也買下湖船試歌斷臂孤兒曲湖  
上豈無人會傳

自錢塘回舟中懷馬掾史

省前山色翠欲滴幕下官曹清且閑公退每傾鸚鵡盞客來頻熱  
鷓鴣斑坐看急雨沾花席應念扁舟出柳灣白髮鄭虔甑未煖還  
家方苦路閒關

舟中懷辛至善

春草綠如許之人猶未歸江東雲度水馬上雨沾衣王事驅馳久  
家鄉信息稀多情舊時燕還繞畫梁飛

望官軍



揚子江邊羣盜來奔牛呂城飛劫灰客懷每日鬱不樂笑口幾時  
能復開東郭流離人似蟻西村格鬪鼓如雷官軍望斷無消息獨  
立斜陽首重回

示長子木

萑澤聚羣盜池魚恐遭殃喜今避地去溪上一葦杭汝妻扶汝母  
小婢攜橐囊卅角汝兩弟隨行色蒼黃僕夫偕汝畱家居謹周防  
屋後林有竹林後園有桑祖宗百家墳高樹蔭斧堂汝爲吾冢嗣  
承家奉蒸嘗興廢固有時生理忘荒但無溝壑憂可待時世康  
鄉鄰或侵陵勿與較短長韓信跨下辱自度勢莫當婁公面上唾  
不拭庸何傷彼惡汝勿爲口亦勿播揚天定能勝人善惡報乃彰  
松柏耐歲寒葵藿傾夕陽此身可齋粉此志勿改常汝幼頗諄謹  
亦嘗聞義方稍暇仍讀書慎勿弄杯觴行看太平日斯文復輝光

嚴將軍戰馬歌

并序

至正乙未春常多盜省府調兵捕之浙東宣慰司元帥嚴公來總

軍未幾無錫平移軍武進一日擣來富莊賊巢軍中失二馬明  
日賊乘之抗官軍烈塘上二馬聞金鼓來奔賊控勒不能止遂  
墮地馬立踶殺之賊眾驚潰官兵大捷故予烈塘之民咸神其  
事俾余作歌以美之

往聞齊軍夜路迷老馬前道人追隨又聞的盧躍檀溪漢業復興  
西南陞古來良驥稱有德未有驍騰能殺賊將軍兩馬馱賊來雲  
霧四起生風雷紅綃帕首爾何物霜蹄一路成飛灰軍前認主鳴  
且舞驚倒熊羆與豺虎羣兇膽落不敢追官軍凱還搥大鼓馬兮  
馬兮誠有功須知感物由元戎將軍接迹武惠功煌煌史冊書勳  
庸爾馬名亦垂無窮

姻家尹居士世居金壇尹干橋其孫可傳者子女妻之故避亂挈  
家依焉未幾寇兵自溧陽至予遂寄畱家具及古今書八百餘  
帙復回故邑作詩以別

烽火西來滿眼紅歸帆忙挂鶴溪風蛟龍劍伏豐城下科蚪書藏

魯壁中邠老自憐能世守阮生誰信又途窮一杯此夕知何夕兒女挑燈笑語同

贈花御史常待之尹晉陵

冰雪襟懷鐵面威井鄉重過思依依州官跼踖迎驄馬父老歡欣識綵衣閩越地偏滄海接江淮屋遠縞霜飛舊遊還念城東客白首持竿坐釣磯

過無錫口號

至正十五年十二月十五日丞相遠識帖穆爾公赴江浙余因感憤而作

丞相樓船搥大鼓鐵騎前驅猛於虎紛紛鼠輩敢橫行與我官軍戰河澣落日未落懸林梢一天殺氣風騷騷官軍縱火鼠入窟太湖小閻陽山高相君賢似唐裴度豈無將軍如李愬兜鍪戴雪擣賊巢一夕湖船竟飛渡我有一寸鐵願作將軍箭將軍三箭定陽山水依然淨如練

楊鐵崖先生既為應芳序思賢錄又以應芳上書丞相不報作長詩贈行是用感激賦此畱別兼謝

錢塘江上久為客光範門前三上書喜得問奇揚子宅何慚題柱馬卿車風塵瀕洞人皆恐冰雪崢嶸歲又除覓得驪珠三百顆橫山歸臥舊田廬

代簡蘇景瞻先生二絕

西門渡頭春雨生故人不來舟自橫聞道移家近湖住手栽桑柘綠陰成

布穀聲中春雨生溪頭倚杖看春耕干戈滿地人相食宜爾龐公不入城



龜巢彙卷二

小人賦

中春四上

初春六

龜巢彙卷三

詩

感興

養竹成大林頻年竹生孫美竹非不多惡竹亦已繁羣奴爲洗之  
往哉聆我言美者慎勿傷去惡必去根勿虞爾斧缺勿憚爾力煩  
宿莽蕩無餘清風仍滿園  
樹頭鴉鳴鳴農人起芸苗問之何爾忙良田莠駟駟去年耘較遲  
草蔓人力寡莠莠若不除卒以害吾稼吾聞農人語猛省天下事  
養虎當害人玩寇亦如此

移家金壇尹干橋奉寄俞用中先生

辟地金壇縣懷人鐵瓮城戰塵今滿眼憂國豈忘情北固山無恙  
中湍水最清卜居何處好爲我主鷗盟

大父卒宋末葬烈塘之東墓松合抱者數百株一旦爲鄉豪伐去  
郡縣弗能禁愬之分省亦莫敢誰何應芳痛憤於家形於夢寐

至正十六年二月廿六日也

當年掃墓寒食朝紙錢挂之松樹腰今年無樹堪挂紙豕頭插竹  
風蕭蕭孤兒抱怨吞聲哭躑躅歸來臥茅屋夜深忽夢蒼髯翁手  
足裹削頭髮禿告言淮襄荆楚閒羣凶殺人連數年名門世胄皆  
赤族梗楠豫章何足憐吾方欲問天下事鷄鳴夢破心如醉髯翁  
恐是十八公天耶人耶誰降凶

五噫歌

大明胡爲而翳兮噫大凶胡爲而裂兮噫觸邪之馬角胡折兮噫  
祥麟在郊足亦刖兮噫天乎遺黎豈至是而底滅兮噫

憶兄

八月中秋  
結友

平生愛緇侶逃難亦與俱骨肉不相顧安危竟何如銅馬從南來  
殺人成血渠一炬灰萬室九原槌含珠懷哉脊鴿原何時蓬華廬  
橫山絕高處獨立渺愁予

三五七言

角蛇啼翼虎飛百年鳳雛環五色鸚雛饑育風怪雨已連月青天  
白日空無時

歲暮獨歸

浩浩北風吹戰塵還鄉無復見鄉人四郊荒草斜陽外一樹寒梅  
野水濱偶有新詩題甲子忽驚初度過庚寅僧廬夜宿明朝別默  
念我蒿淚滿巾

西膠山雪晴

寫呈無錫州尹遂蒙  
罷吳家渡築城之役

一夜雪深二尺強石人墮指冰蠶僵猶喜金烏兩翅凍不折天明  
飛出海上之扶桑老夫晨起膠山下風景看來渾似畫連山萬頃  
玉爲田隔水數家銀作舍田中築城團義兵日高未飯饑腸鳴黃  
泥凍地硬如鐵白柄短鉏鏗有聲不辭受寒餓但恐虧工程將軍  
蹋雪來點名萬夫鵠立顛且驚馬前壯士五色棒棒頭性命鴻毛  
輕予生悔不習兵法雪夜擒吳書奏捷客欄抱膝漫悲歌奈爾義  
兵寒若何



丁亥歲旦徐達卿席上作  
主人飲客椒花酒笑語春風口角生久雨忽晴人共喜又聞周鄭  
欲尋盟

元夕寓田舍有感

憶得去年王正月錢塘風雪正頻繁馬周獨酌新豐市韓愈三書  
光範門喪亂不沾新雨露饑寒今憶舊田園埃山西畔孤村裏借  
屋篝燈過上元

贈錢夢弼

連雲第宅埃山西喬木森森與屋齊萬國熊羆方血戰一林鸞鳳  
自幽棲東風池館春如畫長日笙歌醉似泥吐酒錦茵容野客新  
年十日九招攜

丹陽陳天倪及其弟剛中奔牛陳心遠等諸羽士辟兵洞庭山寄

此代簡

洞庭林屋聚羣仙問訊曾逢賣橘船湖上白魚多滿尺山中朱果

不論錢仙家犬吠雲連屋澤國龍吟水滿天辟穀有方煩寄我吾  
將多與世人傳

陳大翁過埃山客舍情話連日追悼母氏使應芳情見乎詞翁名師可

字伯文宋常州通判之子

外家親戚唯翁在相見猶能話阿嬰三夜客窗同寂寞兩年兵火  
各流離可憐今雨窮途客誰識前朝郡倅兒前世青氈零落盡行  
囊留得數篇詩

寒食聞鄉信口占

鄰舍驚呼避蝮蛇老妻嗔怒唾烏鴉誰知昨夜三更雨又送春風  
一度花寒食清明人上冢夕陽芳草客思家愁來復遶青山去何  
處壚亭酒可賒

訪孟伯堅周履道不遇

班馬文章駕並馳雲龍追逐去何之門前流水垂楊柳屋上青山  
叫子規三月又逢修禊日一觴還憶太平時可憐潦倒無家客滿



目風塵兩鬢絲

刺促行次履道韻

刺促何刺促江上秋風破茅屋誰憐杜少陵長歌之哀甚於哭故  
山可望不可歸髑髏臺高春草綠浮雲滓日竟誰洗烈火連天勢  
難撲三農不復把犁鉏風雨荷戈城上宿於乎人生有子作征夫  
不如返哺林間鳥

題春林雨意圖

前山後山雲氣濃欲雨不雨天無風記得去年初夏裏此時船過  
瀉湖東

懷周履道

平生多朋遊窮途見交態每歌杖杜詩重念伐木廢孰謂新相知  
情如舊親愛手書辱殷勤授粲慰行邁老我無能爲執得心未艾  
秋風自搖落松柏歲寒在

狗寨謠

往聞淮西軍食人狗亦有寨屯如軍是時江南幸無事尙謂傳者  
言非真安知吾鄉今亦爾地方百里皆荆榛三村兩村犬成羣見  
人如見東郭貌跳跟大噉猛於虎坡陀高踞聲狺狺路旁青草堆  
白骨天外飛鳶銜斷筋征夫早去膽欲落冤鬼夜哭情難伸可憐  
性命葬饑腹往往多是還鄉民向來喪家狗絕食遺骸或與狐狸  
分乘時爲暴至若此此事千古同悲辛寢皮食肉不可得張牙弄  
爪何由馴虞廷九官分厥職益必掌火山澤焚犬乎犬乎胡不革  
爾心全爾身主爾主鄰爾鄰搖尾乞食仍相親毋使犬砦之名天  
下聞

壽玉山人

黃梅雨歇南風清綠槐如雲陰滿庭胡髯雪白雙眼明長日細字  
箋龍經有時忽著道士服騎鶴三天奏符籙天上神仙知姓名人  
間富貴羞馳逐翁年已耄何憂樂姪娥應授長生藥我來避地方  
卜鄰翁與談天甚爲樂酒邊卻笑磻溪翁吾年與同心不同鷹揚



未若漁釣好周家自有羣熊熊平生毛穎與親炙老去麴生尤莫  
逆白鷗之盟君勿渝門外紅塵一千尺

八月十六日顛沛中見顧玉山蒙置酒嘉樹軒相與劇談痛飲懽  
如平生且有來夕草堂之約既醉而別賦此以贈

來往東吳三十年吳人多示好詩篇片言堂下知醜蔑一笑樽前  
壽魯連嘉樹連雲秋不老桂花如雪月仍圓烽煙只隔重湖水且  
爲交歡理素絃

留別顧玉山將往杭州卜居

垂白遭多難蒼黃走四方吳人今入貢越寇復侵疆百戰山河破  
三邊草木荒軍容皆赫赫徒御亦揚揚學士思投筆農夫習臂槍  
誰令綱紀壞未改瑟琴張卓爾文章伯平生錦繡腸琴書會不廢  
軒冕迴相忘愛客座常滿耽書夜亦忙登龍嗟潦倒睹鳳與翱翔  
說項口不輟留髡興甚長百篇詩唱和屢舞酒淋浪老驥羞跼伏  
饑鷹欲遠揚憂天如杞國辟地卜錢塘丞相開新詔除官率舊章

覆蕉會有夢腐草或生光蕭颯雙蓬鬢漂搖一葦杭第慚金自躍  
何似玉能藏海底珊瑚赤松根琥珀香明朝重回首嘉樹鬱蒼蒼  
贈道傳上人

偶識廬山遠山莊借屋居撥雲分臘酒蹋雪送寒蔬門俯溪光迴  
窗含野色虛相過雨不厭燈火案頭書

送蔡伯昇避兵澱山依故人

典衣沽酒積沙頭送客攜家訪舊遊虎窟攜來桃竹杖鷗波蕩去  
木蘭舟黃楊偶厄今年閨老菊重逢九日秋覓得桃源堪辟世結  
鄰當與老菟裘

陳湖夜泊

湖平溪水清如鏡照見潘郎兩鬢斑帶箭飛來何處雁一聲哀怨  
入雲間

訪澱山因自明習無學二禪老

西風滿帆天所假扁舟過湖快如馬欲尋漁父問桃源因訪高曾



過蘭若南能北秀兩魁奇翠竹黃花總瀟灑相逢握手問流落試  
爲從頭略傾寫生居揚子大江頭老我延陵力田者羣凶西來火  
三月四境更無茅一把鄉鄰死戰血漂杵妻子生擒肉爲鮓隨波  
幸若魚漏網失窟驚如魏在野山中碧松堪療饑池上白蓮宜結  
社欲語同行有髮僧數見不辭禪板打  
懷玉山隱君并簡其子國衡

錦翮鷓鴣海上回無端鷗鷺失驚猜青山靜對機心息好客相過  
笑口開魚躍水池堪入饌蛆浮臘盃足持杯官軍赴敵忙如蟻奈  
爾重門掩綠苔

懷袁子英

疇昔尋君竹浦西芭蕉葉上姓名題別來歲晚相留戀行到窮途  
孰指迷兩鬢風霜秋颯颯一篷煙雨晝淒淒遙憐冠蓋重陽里長  
伴山翁醉似泥

懷諸葛用中

每憶君家書畫船夢魂飛繞太湖邊干戈滿地無休日萍梗他鄉  
又一年西北天高煙霧隔東南海闊水雲連何當覓得蓬萊路相  
與從遊采藥仙

至正丁酉冬玉山燕客芝雲堂適有時貴自海上來以黃柑遺之  
玉山乃分餉坐客且日吳中以連年擾攘無之今有之諸君子  
不容無詩故有是作

青巾西來人食肉逃難西來采黃獨上書不伏光範門忍饑盜負  
將軍腹玉山燕客客滿堂香柑新帶永嘉霜分金四座照人面漱  
玉三咽清詩腸山中柳瓢大如斗吳姬擘來薦春酒酒酣遙指洞  
庭山爲問木奴會貢否頻年兩浙阻兵戈黃柑陸吉不相過此時  
共享此嘉果胡不取醉花前歌漢廷傳柑還賜宴應念江南久征  
戰聖恩有詔息蠲租可奈數州人已無

贈錙元臣何士安二省郎

冬十二月一雨滂淩江水高三尺強翩翩使者傳令急肅肅官軍



赴敵忙日出山頭雲氣白春回海上柳枝黃捷書明日報樞府連  
璧少年增寵光

錢夢弼移舟過姜里後三日子往見之適夢弼臥疾董子正月賦  
此爲別

埃山之別苦倉猝甫里相逢說亂離喜見新年正玉月重瞻舊日  
漢官儀酒杯不借金魚換藥杵何勞玉兔持借問董家雞共犬有  
無祥瑞似前時

漫興十一首

甫里水東頭垂蘿繫客舟客心清似水吟鬢白於鷗詞賦知無用  
干戈苦未休篷窗三日雨農事憶西疇

五十不富貴蹉跎又六年新愁添鶴髮故國暗狼煙白帽看雲坐  
青鐙聽雨眠癡兒書懶讀翻笑腹便便

吳地方千里齊民總荷戈人生無可奈天運竟如何米市黃金賤  
沙場白骨多故山時一望老眼淚懸河

伐木燒官炭中林霹靂飛窮猿無可擇飛鵲更何依野雨生稊稗  
山風長蕨薇兒曹能采拾猶足慰年饑

吳女何多巧吳趨作楚聲市廛方易肆朱粉復傾城壓酒桃花隴  
彈箏細柳營將軍正年少相顧若爲情

闔閭城下柳誰種綠陰成樹繫浮江馬枝遷出谷鶯我朝方用武  
僧寺總屯兵猶喜湖田熟街頭米價平

田舍方東作州家要義兵瀕湖團水寨斲石甃山城柳暗村煙煖  
芹香潤雨晴荷鉏歸未得布穀爲誰鳴

盡道從軍好封侯甚不難羽書頻報捷相府卽除官北鄙煙塵遠  
東風雨雪寒腐儒人共笑白首鹿皮冠

赫赫千夫長搖搖四櫓船船輕如躍馬寇退欲歸田蓑笠松江上  
犁鉏穀雨前只愁邊報急生計又茫然

太湖三百里流血水雲腥戰鼓有時歇漁歌無處聽飄零孤雁白  
慘愴遠山青題橘音書斷令人憶洞庭

近聞哀宥詔使者又江東兵革何時息車書四海同落梅春雨後  
芳草夕陽中俛仰長流涕窮途一老翁

顧國衡萬戶席上與乃翁及元璞長老等數客把酒賦詩各成七  
言四句韻

客來寒食清明日每日春風醉玉山綵筆醉題鸚鵡賦寶香頻爇  
鷓鴣斑簾前修竹翠欲滴池上小桃紅更殷按得錦箏新製曲隔  
花黃鳥共閒關

宿壽上人山房再和金西白長老韻

春來淮楚兵方息今夜村莊犬亦寧分得梅邊半窗月借看松下  
兩函經屋山風颺茶煙白江浦雲連樹葉青來往風流似支許獨  
慚吟鬢已星星

訪積善寺貴上人適與旌德寺學無爲明月庭四人年皆五十有

六酒邊聯句共成一律既而各和一首

四人二百廿四歲通翁一日酒傾三百杯月庭醉裏不知浮世狹

無爲吟邊但覺好懷開應芳春雲冉冉連江樹月庭晴雪紛紛落

野梅通翁邂逅相逢離亂日無爲醉鄉佳境亦悠哉應芳

又和

四人二百廿四歲野老浮家僧渡杯共喜江湖春水靜適逢西北  
莫雲開神仙換骨元無藥宰相調羹自有梅旨酒正須終日醉醉  
鄉佳處亦悠哉

送梅州判之崑山

百戰歸來佐一州貂蟬從此出兜鍪山城近海金湯固市舶通番  
食貨稠下馬正逢梅子雨勸農須趁麥花秋薦賢不負尚書意治  
最功成秩更優

端午日瑞光寺西白長老方丈作

藕花池上端陽日菖歎香浮藥玉船可喜山僧能好客常容野老  
醉逃禪連宵雨漲三江水當午雲開一鏡天醉倚浮圖望鄉國橫  
山依舊暗烽煙



對雨書懷

書生得句百憂忘更喜新知共一方醫士爲焚賒藥契指顧鄰僧  
借與讀書牀指壽道傳十年鄉國煙塵暗五月江村風雨涼不用弱流  
三萬里地無豺虎卽仙鄉

次韻贈管伯齡

風塵連四海身世等一漚斯文幸未喪同類猶相求蜉蝣果何物  
敢作撼樹謀諸公新亭淚可笑學楚囚我無西園金孰問東家邱  
嗟爾一片玉產此崑山州天門九重深獻納亦末由江村茅屋雨  
湖田稻花秋門外車有轍江村水長流時無華子魚幼安誰與儔  
濯足弄雲水商歌興悠悠胸蟠五色綫唾視百尺樓鍼芥適相遇  
珠璧驚暗投酒杯接殷勤詩盟結綢繆千金享做帚猶曰不易酬  
新知如故交一笑忘百憂停杯問蒼天干戈幾時休金風雖乍起  
火雲未全收溪橋柳陰清繫我三日舟摻執不忍別相期重來游  
甫里先生

有田二頃可無官況復時危行路難丹鳳徒勞銜詔下白鳧自放  
出闌看春從顧渚隨茶竈月向淞江伴釣竿舊宅不知何處是浮  
圖樓閣倚高寒

次韻袁子英過吳江兼簡琦龍問

孤城當澤國潮撼勢如浮拄杖尋僧寺長橋繫客舟江寒楓葉落  
湖暝蝮蛇遊寄語龍問子詩盟莫負鷗

江上女和子英韻

妾生吳江上阿爺最鍾情十五嫁夫壻紅顏如舜英別來各天涯  
所共唯月明妾守江上宅夫戍邊頭城江上畏行露邊頭防斫營  
一朝義當盡性命鴻毛輕死願化葵藿雨兩心同傾

送顧玉山遊東南諸山

我愛向平子婚嫁畢兒女平生掌上珠棄置若敝屣百事不挂眼  
五岳縱遐武朝與麋鹿遊莫與泉石伍泉石初無情所喜絕塵土  
松風出林礪笙瑟音調古但聞幽鳥鳴猶勝俗人語咄彼貪墨徒



躋燈照金鴨遺臭千萬年其禍皆自賈吾知平子心夙昔慕巢許  
矧茲風雨秋摧蘭折蘅杜往哉山水窟幽期赴緇侶解纓濯滄浪  
茗花入風舞老我病江沱臨風爲延仁

和顧仲英金粟冢燕集詩

我昔過北邙立馬山之隈爲問壠頭樹皆云後人栽生前樽酒誰  
不有無人到此自對青山開屋堆黃金五侯貴難免白骨生蒼苔  
最憐吉士或枉折有如爨下焦桐材玉山先生達觀者胸次不著  
閒悲哀清秋攜客墳上飲麴車載酒山童推大笑胥魂乘白馬深  
慚絲魄化黃熊墓銘自製身自挽視身不翅輕如埃鸞翔鳳翥玉  
箸篆虎踞龍蟠金粟堆鶴羣三繞喜樹舞龜趺並載豐碑來長吟  
復短吟此興何高哉秋風無情摧萬物芙蓉亦老胭脂腮笑言他  
年翁仲共寂寞何如此時賓客相追陪功名絕愁根富貴脫禍胎  
百年能幾日一日能幾杯從茲秉燭長夜飲猶恐二蛇四鼠忙相  
摧主人爛醉客亦醉絕倒不顧旁人哈北望中州數千里人家盡

作兵前灰燼體委江郊多是賢與才忍饑自作首陽鬼獨醒誰念  
湘江纍神仙初無不死藥方士浪說尋蓬萊君不見無邊之海白  
淼淼無名之山青巍巍長鯨噓吸成風雷徐市一去何曾回

玉山以予徙居淞江設席書舫邀袁子英陸元庠恢上人用江  
東日暮雲分賦以餞予得江字用以留別

野老浮家雙目龐振柁欲度吳淞江東將入海釣濤龍玉山中  
別老龐西池之屋如舩艘左圖右史堆滿窗燈花搖搖落銀釭葡  
萄豔豔傾玉釭四簷白雨飛流淙若裂媧石銀河洛主人長歌客  
按腔翕然鐘鼓相擊撞酒酣捉筆如長杠千軍可埽鼎可扛諸公  
大才齊楚邦騷壇老將霖麾幢客來投戈乞受降乃辱贈以白璧  
雙明朝短纜擊舊椿馮夷前驅鼓逢逢海濱懷人倚石砭書筒時  
寄黃耳龍

來龜軒詩

爲顧玉山作

維歲之初兵鬪邑里我鏞其肩以辟以徙今我來思室有爾龜我



壙弗穿爾從何來委蛇委蛇爰曳其尾來龜之祥云胡不喜我戶  
伊威我牖蠨蛸嗟我婦子亦孔之勞爾其泥塗我家豈不爾  
思以名其廬瞻彼池水有蒲有蓮爾居爾游宜永其年

袁子英偕宗別傳過天慧莊因獲晤言夜語之餘口占以贈  
短髮蕭蕭雪滿簪老禪方丈挂瑤琴月明每憶許玄度歲晚同來  
支道林四海干戈猶在眼百年軒冕總無心梅花玉立西窗下相  
伴哦詩到夜深

子英與玉山顧隱君今於同里法喜寺樓居日鈔佛書至午而止  
餘暇則吟詠不輟雖親舊來訪亦不往答焉余因子英復去作

此代簡

客來喜得平安信蕭寺樓居日掩扃湖近浪搖窗影白地偏苔沒  
履痕青羣賢方結蓮花社小楷猶鈔貝葉經歲晚扁舟來甫里好  
尋漁父過寒汀

送照元明住白馬寺

老梅飛去迹猶靈七十二峯湖上青已喜黃龍新說法無勞白馬  
遠馱經六時花雨狻猊座五色雲開翡翠屏挹取寒泉同煮茗予  
將歲晚過禪扃

冬至日陪高太守坐愚隱山房讀易有感

一鼓渾沌破二氣從此分消長固有時變理亦在人云胡數年內  
濁亂暗楚氛維時當嚴冬袷衣煖如春中林竹抽萌花開雪紛紛  
陰極陽復生踐長喜茲辰蒲團踞禪榻芸窗對鑪薰筌蹄謝支許  
羹牆見義文嗒然我忘吾萬事何足云

人日懷管伯齡及杜玉泉昆仲定一上人

吳淞江頭春水生美人不來舟自橫一年又過牛羊日四海豈忘  
鷗鷺盟管寧白帽傲軒冕杜陵名家多弟兄結社香山僧更好野  
老何緣與姓名

劉景儀寓崑山永懷寺除日作詩三十韻見貽時予客薦嚴方丈  
次韻答之兼呈兩山主人



遭亂心如醉偷生鬢已華一年看又過幾度發長嗟淮海浮羣馬  
荆蠻鬪兩蛇妖氛渾不散殺氣轉相加倦客誰相顧高僧意孔嘉  
燒香談般若倚樹聽楞伽風月三生石文章五色霞階前時刻草  
坐上或拈花我下南能榻君居北秀家龕豪笑俗子歌舞擁高娃  
重費纏頭錦重敲拍板牙何如依有道樂此寂無譁法喜常親炙  
塵心亦變化濟河求巨筏出宅問三車兵火西來盛神京北望賒  
憂天同杞國賦雪擬劉叉兩寺齋鐘應孤城戍鼓搗朋遊欣密邇  
世務奈紛拏袞袞華軒鶴喧喧晚樹鴉餘生知有幾學步恐成差  
故國歸心切烽煙望眼遮衣冠無噍類戈戟亂如麻不識蓬萊路  
那逢博望槎憤秦思蹈海悲楚欲懷沙竊比君臣蟻誰憐喜怒蛙  
桃符驚節換萍迹寄天涯君憶蘇隄柳予懷陽羨茶吟篇聊侶和  
醉筆半敲斜此意方相得前言匪敢誇尙期金百鍊永保玉無瑕  
聞顧玉山芝雲堂火而所藏之書俱焚恐其不能爲懷寄詩釋之  
誰將藜燄觸羣書腹笥便便自有餘得失永須論塞馬平安聊復

問池魚草堂留客仍投轄香徑尋詩可曳裾別院海棠春滿眼重  
來燕子喜何如

和玉山初夏言懷二首

聞君久約東林老林下棲遲避俗塵蓮社不妨陶令醉非菹誰信  
庾郎貧蘇湖渺渺田皆水淮楚茫茫草没人春去百花先自落五  
更風雨況相因

四海風塵渾未息一時天道豈無知待看雨散雲收日依舊山青  
水綠時死欲便埋童荷鋪生能自挽手裁詩道人風致清如許行  
路相傳口似碑

再用前韻寄悅堂長老

松雪孤標孰與倫煙霞一室靜無塵清談每日能留客自說平生  
不患貧城郭含輝山韞玉階除聽法石如人曇花不逐春紅老信  
與東風別有因

老虎兒孫到鳳池聲名曾徹九重知鶴書天上頒恩日猊座山中



說法時寸草不忘慈母報白華無愧古人詩春秋直筆黃夫子曾  
爲東林著二碑

蹋車歌

吳田水深三尺許總是去年秋莫雨勸農使者催春耕田甲頻搗  
水車鼓江村破屋能幾家家婦姑俱蹋車蓬飛兩鬢赤雙腳亦  
有兒女雙髻了淞江太湖愁滿眼白汗沾衣足生趼車輪輓輓羊  
角轉水波翻翻龍舌卷春來十日九不晴怕聞鶉鳩呼雨聲滂沱  
纔俾片時久辛苦又加三日程當家豈無夫與子打魚日糴去城  
市城中禁米難出關田上忍饑還戽水四郊未種圍田穀三邊已  
運官倉粟安得木牛爲木龍運水疾於牛走陸西林日落田婦歸  
隤岸白煙魚虎飛詩翁獨立長太息何處青山有蕨薇

和陶菊莊郊行二首

崑山春煖玉生煙滬瀆潮平水接天行到滄洲人寂寂坐看青荇  
葉田田

十年四海暗烽煙五柳先生醉樂天芳草夕陽江上路獨憐春水  
滿湖田

梅子玉判官勸農過客舍口占以贈

婁江之南一萬家葑田水深忙蹋車喜有春禽鳴布穀幸無夜雨  
漲桃花州倅勸農頻出郭野航牽纜小如瓜白鷗也似知人意引  
領相望立釣槎

觀浴佛有感

銀盤水浴紫金身白髮禪和拜跪頻周孔豈無初度日諸生誰爲  
薦溪蘋

和顧玉山重構釣月軒

虎戰龍爭無了日他年誰是復誰非諸公圖像凌煙閣此老逃名  
釣月磯新雨一池荷葉長南風四月棟花飛我來喜聽滄浪曲欲  
挽遊絲繫落暉

夏夜作

五年兄弟各西東兄在今年七十翁戎馬此時猶塞路羈鴻何處  
或傷弓對牀夜聽空階雨擁被秋吟破屋風夢裏不知身是客覺  
來愁絕淚沾胸

陪梅州判智長老石教授陳維兄壽上人等遊姜公墩小酌梅以  
杜子美興來今日盡君歡分韻得日字

白雨洗炎熱清風灑瑟瑟梅仙約幽尋邀我杖藜出同遊得名緇  
飄然興俱逸移舟泊釣渚看竹過僧室行行陟高邱苔溪樹陰密  
崑山含玉潤巋然如卓筆羣峯太湖上雄勢爭峯嶺江平早潮回  
風急去帆疾梅仙最多喜播種農事畢青苗而吳田芳草眠爾粟  
斯民久塗炭天意諒深恤兵餘幸豐年一飽百憂失懽然各有慶  
雙榼酒盡喫安知艱虞世得此閑暇日幽情寫絲桐餘懷聊短述  
次韻贈虛中講主

三支高論久寂寞一鼓雷音號令嚴正法眼明巖下電玄機味若  
水中鹽池蓮玉立天開鏡庭竹金聲風卷簾大地政須沾化雨蹄

涪寧許老龍潛

六月廿二日愚隱和上以詩留別往磧沙寺以寓餅錫詩末句云

一聲短笛滄江暮收拾絲綸下釣臺予次韻二首送之既而懷

磧沙諸友復就韻代簡八首

一曲滄浪歌未了滿船明月賦歸來俗塵自暗人間世不著纖毫

惹鏡臺

白髮道人無住著磧沙湖上去還來湖深六月天風冷花雨吹香

般若臺

右二首送愚叟長老

誌公刀尺傳家久船子絲綸罷釣來一鏡湖光照樓閣共看明月

坐高臺

瀕湖金刹清涼境冠蓋時時聽法來刮目試看天下士幾人胸次

有樓臺

右二首寄剛中長老

長歌白雪無人和近喜碧雲禪老來龍女獻珠煙水國馮夷擊鼓

雨花臺



一牛鳴地長相憶賴有尺書時往來白馬山中人獨遠孤雲落日

在琴臺右二首寄開野兼懷照元明連日顛風吹海立幾時飛錫過湖來絕憐湖上林泉好六月清寒

似五臺右寄益以道劫火煙銷江總宅斷蓬風轉海濱來干戈未息衣冠老誰築黃金

聘士臺右寄江叔廉寄趙君綽

舊家公子老儒冠詩卷梅花共歲寒湖上月明攜客飲樓前山色

枕書看十年四海風塵暗久旱三湖水澤乾滿目天雲秋復熟敢

題尺牘問平安送扇贈趙執中

送子扇一握呼兒書八分相望湖上宅只隔隴頭雲商國多秋熱

西風有楚氛庭幃清枕席持此奉殷勤寄天章上人兼簡陶菊莊

東林花雨滿衣巾文采風流有若人留客看山常滿座開軒臨水

迴無塵娟娟烏鵲橋邊月灑灑葡萄食裏春朝夕往來陶博士應

拈醉筆賦詩頻簡西白長老

高情每向詩中見怪事今於病裏聞船子逆風牽纜去葦花飛雪

暗江瀆雁來南國邊聲遠鴉集西林野色曛笑拂袈裟歸攜李秋

風塵土自紛紛贈費克明知州

崑山之石白如玉婁江之水涅不緇試持山水比州牧厥德清白

同於斯吳儂賴公父母慈遭時艱危蒙撫綏盡令賣刀買牛犢不



山無紫芝蜚聲藉藉動藩府將徹九重天子知  
夏五聞吳門湯君說以書見寄既而茫然九月末因馬吉卿來甫  
里詢知君說仍居閒詩以代簡

不見故人逾六載會聞書札寄多時淨沈江上知何許淪落天涯  
有所思老驥未應甘伏櫪驚鳥可是別無枝欲過竹所尋袁粲每  
望山陰憶戴逵策策西風桐葉盡淒淒寒雨菊花遲幽懷每日如  
中酒世事頻年似弈棋一笑相逢期未得邊塵滿眼鬢如絲

送愚隱長老主萬壽寺

戎馬廢六籍三乘亦多魔中流屹砥柱猶能障頽波吾師雲臥久  
王公禮爲羅說法繼禪月珠林雨曼陀宏開甘露門諸根並漸摩  
一鼓氣復作天龍衛煙蘿秋空雲霧開佛日光輝多

題林泉雅集圖贈杜玉泉

泉翁愛山如愛客到處好山皆莫逆脚根不浣京洛塵面紋長帶  
煙霞色奚童抱琴翁曳履長日山中看流水萬松清籟響如絃滿

地白雲吹不起桂風蘿月秋復春野花幽鳥情相親巢由相去數  
千載黃綺以來能幾人山顛水涯風物美都在我翁詩卷裏莊周  
夢蝶蝶夢周覽是圖者周天游

寄屈時中諸友

白蠡塘南煙水村伊人辟世若桃源家家雞黍留賓客夜夜熊丸  
教子孫慈竹叢深冬筍出野梅冬煖早花繁扁舟一夕乘清興我  
亦來敲月下門

逢鄉僧昱東明

他鄉逢著故鄉人敘舊情如骨肉親猶喜吾兄存兩子俱從釋氏  
究三生煩君爲寄平安信道我今居寂寞濱何日浮杯來甫里寒  
窗燈火話酸辛

梅子玉董版築於杭城別去日久區區思懷作此以寄

錢塘江上石頭城畚鍤如雲杵雨聲兩袖西風騎馬立五更殘月  
聽雞鳴銀餅犒酒平章喜金鼓還州父老迎力盡東南非一日政



須遺愛撫孤榮

奉寄楊鐵崖先生

光範門前三上書先生曾爲發長吁畫橋楊柳藏書屋鐵笛梅花  
落酒壺偶遇故人論北海相思一夜夢西湖由來海內誇長句肯  
寄浮家野老無

寄題顏悅堂城南小隱絕句五首

爲愛城南水竹幽高人結屋近滄洲東園十畝蹲鴟熟足儂人間  
萬戶侯

門前流水與江通屋上青山與畫同文武衣冠來聽法紺園長繫

玉花驄

象龍入室動成行燕雀隨人亦自忙白髮老禪揮玉麈袈裟猶帶  
御鑪香

屋頭新植青松樹池上重栽白藕花元亮孤舟靈運屐不妨來與  
共煙霞

客來多是一宿覺我亦幸有三生緣扁舟過門清夜裏烏几燒香

繡佛前

題淵明采菊圖

一官棄如屣三徑今來歸言采東籬菊如彼西山薇秫田未熟壺  
無酒白衣攜來恰重九今年不識是何年且爲黃花開笑口非無  
小窗膝可容花前一笑樽已空衰顏得酒借春色霜染樹頭秋葉  
紅先生之貧人共惜先生之心人莫識大廈難將一木支逃入醉  
鄉聊自適

玉山邀至同里法喜寺飲別是夕酒醒夢回宿雨初霽月明可喜

卽景賦詩兼寫送別之意

風吹雨腳斷月到天心明孤鶴有清夢荒雞非惡聲南浦明朝別  
西湖幾日程杵歌人正苦莫上石頭城

寄愚隱長老

別後逢人問北山吳門第一古禪關江湖餅錫多依倚文武衣冠

數往還鐵騎解鞍祇樹下金魚換酒雨花間最憐文室雙童子捧茗燒香不暫閒

寄虎邱居中長老

初春船過百花洲不謁聞邱謁虎邱古徑入門蒼蘚合新城繞寺翠嵐浮游方每學僧行腳聽法當隨石點頭更覓西菴修竹裏寒泉一酌薦前修

和玉山排悶

寒窗誦君詩字字黃娟婦嗟君遇迤邐蛇虎嚇前後毅然能忍性不矯亦不採黃金本何物一任化烏有胸中耿耿在依舊衝牛斗大兒萬戶侯金印已懸肘小兒未強仕詩禮方授受兩娥遽奔月星橋吠天狗更憐鳳臺女先亦辭父母君能悟空幻視身等塵垢哦詩作遊戲一日凡幾首開樽飲詞客縣茵從醉嘔愛賢眼常青垂老髮仍黝逆境雖滿前百戰喜不負憧憧彼貪夫富貴爭進取力強誇拔山勢熱可炙手美新皆揚雄託孤誰杵臼龍爲堅白論

衍事雌黃口何如玉山人不失素所守愚也比方舉識馬忘牝牡傾蓋卽相知論交成耐久歲寒松柏青先零愧蒲柳鄉來九折阪此日一杯酒豪吟鬼神泣醉筆蛟蛇走萬事付忘言太山同培塿焦任道欲過壽上人山莊并與僕相見前期以詩見貽傳和之邀

僕同賦

舊說今家有墨莊新詩今見墨雲香閑來林下尋緇侶當爲牆頭喚索郎邊境日來西寇近滄江歲晏北風涼先生素識融公嬾莫怪而今不下牀

再和韻寄趙彥深

平原公子午橋莊草木當年雨露香桂樹不嫌招隱士桃花應喜識漁郎錦茵醉酒冬宵暖水檻垂綸夏月涼我亦欲拈橫玉去爲君三弄據胡牀

次韻寄杜玉泉昆仲

授書不逢黃台公采藥不遇龐眉翁杜陵名家好賓客客裾來曳



梅花風德哉若人氣沖融煥然釋我心怔忡張鐙爲展風月宴坐  
客爲展冰雪容火蛾熒煌吐星斗金鼇鼻屨移方蓬高年垂及絳  
縣老合歡要策青州功唾壺玉缺擊如意臂鞬珠脫攜歌童航船  
浪翻翠袖溼笑絕如舉驪山烽紫雲一曲歌未了陽鳥飛出扶桑  
東明朝仲氏復迎客百花潭邊收釣筒長魚斫膾白於雪葡萄新  
釀青若空高堂坐擁肉屏煖寒士無復鳴秋蛩溪山相映色俱喜  
墳篋迭奏情無窮老夫生長近吳下所恨白首方游從頻年坐我  
塗炭苦此日置身仙子宮已令沈湎恣爲樂尚論古人容折衷賦  
歸旣無田種秫獨醒敢誇衣集蓉銜杯樂聖非易得良辰美景眞  
難逢論交不以車笠異忘形且喜襟期同咄彼貪夫逐名利何異  
糞壤蜣螂蟲蠻爭觸戰更堪笑要於蝸角稱蠶叢邊隅風塵莽浩  
浩天門煙霧深重重世云酒爲知己飲可不罄爾琉璃鍾扁舟往  
還渡吳淞泗橋且喜春潮通興來徑去造竹所碧灣樹下維短篷  
祇慙詩債償未了毛穎爲我長恩恩此詩聊寄前日事此韻乃和

前年冬分柑細君與說項眉案坐對如梁鴻  
碧雲山房分韻得簷字

古寺雲林靜春宵風雨兼阿師如惠遠有酒醑陶潛海味分苔脯  
園蔬摘韭尖金蕉傳四座銀竹瀉層檐談辨情相洽醺酣意轉歡  
燭長紅未盡瓶罄綠頻添小令皆毛舉新詩各口占襟懷雖曠蕩  
格律自清嚴浪雪翻茶鼎香煙繞竹簾偶論蝸國戰因笑楚人鉗  
老去甘藏拙閑來得養恬青松知此意相對一掀髯

雨夜懷朱澤民

一天風雨夜漫漫獨爲先生發永歎杜甫數椽茅屋破鄭虔三絕  
坐氈寒鶯花紫禁回頭夢煙樹青山抱膝看最憶舊遊諸閣老別  
來零落漢衣冠

和鄒弘道諸公遊磧砂寺

錢塘形勝接蘇湖風物於今入戰圖獨爾磧砂仍似舊諸公杯酒  
不相孤遠山雲斂千峯出幽樹春來百鳥呼白髮老僧盤膝坐笑

看車馬陟危途

次韻寄路以道

笑將簪笏棄如泥出郭移家住水西芳草喜人車轍少遠山齊我  
屋簷低門前古樹慈烏集梁上新巢乳燕棲更喜東橋僧舍好桃  
花多似武陵溪

送居南山還嘉禾

攜李亭前水接天陽侯曾此洗龍泉道傍已伐將軍樹湖上今題  
書畫船滄海揚塵知幾度黃楊厄閩又今年因君與說干戈苦相  
送臨岐一愴然

題李白月下泛舟圖

青蠅觸起脫靴時飛燕嗔人鳳亦疑杯酒伴狂江海上此心唯有  
月明知

七月二日過益上人問疾因過路以道山人家飲酒樂甚詩以謝  
之

新秋去謁病維摩因與山人醉薜蘿頭戴鶡冠堪入畫手鳴魚鼓  
更能歌竹邊亭子清風細壁上詩篇好客多從此往來溪路熟扁  
舟乘興數相過

賀梅同知遷秩二首

我愛朱絲絃其音淡如平爲人滌邪穢妙理通神明良工繫錦瑟  
選練亦已精移柱喜更長白雲風冷冷

我愛青銅鏡炯如秋月圓爲人別妍媸毫髮俱了然纖塵不受汗  
光輝人共憐政須重拂拭玉臺更高懸

窈窕誰家女

窈窕誰家女依稀慕璠樹向來適良人門戶比房杜今年邁疾難  
飄零太行路風雨道傍花不失春態度珠簾十二樓燕子忍辭去  
合歡會有時無勞歎遲莫

吹韻寄呈謝杭州

金湯險據鳳凰山日月遙瞻虎豹關每見題詩懷故舊也知爲政



有餘閒慈闈一飯雙魚美衙鼓三撾五馬還細說平章親更喜黃金橫帶綵衣斑

中秋日玉山顧仲瑛邀翟明府份陸良貴仁秦文仲約等十人飲金粟冢上酒酣賦詩各成一首

憶昔辟戎馬放櫂來北山相逢適中秋展席解愁顏安知復今夕嘉讌集羣彥烽煙雖未息眼底喜不見華月出松杪靈飄散天香古稱死便埋荷鍾童在傍酒酣各哦詩其樂勝鐘鼓柱頭老令威爲作八風舞人生不飲酒杯盃空匱前寥寥數千載孰與劉伶賢贈章彥復省掾

相約攬秋色淞江來小舟留人十日雨洗耳百花洲祖述鞭方著張良箸欲籌吾廬吾自愛霜菊晚香幽

借愚隱長老重過玉山草堂次文中韻

中秋醉眠金粟堆重陽又捧菊花杯欲從南郭隱几臥爲約北山禪老來松下低頭拜奇石竹邊隨意坐蒼苔林風礪月足佳趣安

知世有黃金臺

簡嘉興天寧寺西白長老

五月中旬領報書客來兼得問何如天花亂雨袈裟地祇樹重栽瓦礫墟風月三生情分在煙波百里信音疏高秋且喜吳田熟說法開堂響木魚

玉山席上分韻得對字

勞生紛如蟻出沒茲大塊達人獨超然逍遙物之外秋高天氣清喜此良燕會蹇予顛頽容亦忝支許輩黃花有佳色青山若賓對飲者醉如泥不飲亦慶快卓彼浮屠師入俗無罣礙笑指空中雲非觸亦非背絕倒草堂翁東壁珊瑚碎

挽華亭呂輔之

諱良佐又號橫溪居士

屢卻徵車不赴官黃金多用恤饑寒銘槐西墅雲林屋釣竹前溪雪浪灘王烈能平鄉里訟龐公獨遺子孫安只今海內文章伯多憶賓筵禮數寬

寄郭義仲

霜骨棱棱七尺軀昂然獨鶴睨羣雛門前問字人攜酒船上求詩  
客送珠山色隔溪雲縹緲梅花遶屋雪模糊別來歲晚遙相憶愁  
絕荒江夜月孤

題玉山移舟月夜過客舍忽聞側室之訃卽留別一詩而去別後

和韻以訂重來之約

畫船月下過江村客舍荒涼笑語溫忽報綠珠飛墮地輕如玉斗  
碎鴻門蘭臺久約行雲夢蒿里聊傾酌月樽攜客東橋重問竹柴  
門當爲掃苔痕

代簡牛彥伊

客來爲報平安信知在長洲茂苑閒借榻眠雲僧舍靜舉杯邀月  
客窗寒無家且喜身長健玩世何妨髮已斑三度梅花曾寄否思  
君長倚馬鞍山

題王景逸所藏瘦馬圖

將軍百戰自封侯老病誰憐玉腕駟皮肉瘦來渾見骨精神減盡  
只垂頭長鳴落日青山下獨立西風白草秋猶勝駱駝三萬匹都  
隨戰士死炎州

寄張彥復

蘭省歸來日未斜閉門塵靜似山家教兒楷字謄詩藁遺客生綃  
寫墨花太伯祠前人走馬姑蘇城上樹栖鴉知君觸處多懷古忍  
聽吳趨唱小娃

和馬吉卿韻寄開天啟長老

西望天峯百餘里高僧何日共游居談禪丈室揮松塵步履長廊  
聽木魚萬壑秋聲饑虎嘯一池雲氣老龍噓更尋香徑靈巖去與  
子聊乘下澤車

贈馬吉卿

太尉初開藩府日我卿長揖與談兵快鞭自此宜先著偉器如何  
竟晚成舊菊數株荒老圃寒流一帶繞孤城草廬只在齊門裏堪



笑無人識孔明

山人家爲路以道作

先生自是青雲人歸來故山鉏白雲家徒四壁藤蘿屋頭戴一幅  
逍遙巾松根茯苓大如斗木柄長鑿常在手賸收柿葉教兒書更  
摘松花釀春酒題詩滿屋酒滿船客來無日不陶然人閒豺虎自  
鬪死雲中雞犬多成仙山人家住山林好日日晏眠無事惱笑他  
東望玉門關絕域思歸歎年老

過牛彥伊寓所對雪口占

問訊蛟龍浦來尋鷗鷺盟天風寒颺鼻冰雪歲崢嶸平日徐徐起  
清樽細細傾獨憐鄉國遠西望若爲情

龜巢彙卷三

龜巢彙卷四

詩

美崑山費知府重修學宮詩

昔侯未牧崑山州州署遠移東海頭百年鄉校風雨毀四郊戎馬  
煙塵秋州仍舊山侯下馬勸農耕桑重儒雅春秋籩豆駿奔走日  
月宮牆煥圖寫素王清廟袞龍衣博士高堂鸚鵡飛泮池芹藻堪  
采摘帷林草木生光輝時方擾攘人用武侯爲斯文扶砥柱同寮  
才並青雲器參佐功成修月斧廟前銀杏雙蓋青堂後玉峯開畫  
屏諸生揖讓秉周禮我侯言語宗六經官清只飲淞江水鱸魚自  
肥尊自美齊名常袞與文翁興學之功照青史

代道傳招路徵君益上人過西林精舍

西林新種梅花樹未有詩人爲品題樽酒小窗邀上客杖藜今日  
過前谿家園小摘金盤菜野徑初乾臘雪泥二老風流堪入畫不  
妨琴與鶴同攜

贈水西長老中伯庸兼簡承天毅剛中

禾城說法兩三年，貔虎如林護法筵。  
一片白雲閒出岫，五湖春水闊連天。  
詩堪補世方留稿，琴乏知音竟絕絃。  
賴爾峨峯堂上老，喜留賓客共杯泉。

雪中懷杜玉泉玉谿兄弟暨管伯齡

對雪僧窗憶舊游，浣花溪上草堂幽。  
弟兄愛客情懷好，賓主談時氣味投。  
揚楚兩州城近接，吳淞一帶水長流。  
興來早晚相尋去，解劍漁翁覓釣舟。

元日同趙君綽早起崑山州

烏紗白髮兩遺黎，同賦新年第一詩。  
吳下喜頒堯日曆，嵩呼重見漢官儀。  
春回南國梅先得，律轉東風柳未知。  
試向馬鞍山上望，楚氛猶自暗邊陲。

訪王景逸不遇其婿梁國傳留宿東齋作此簡景逸并允德

阿林隨我曳長裾，宿爾幽人水竹居。  
雲暗一天龍吐水，溪喧半夜

獼求魚邯鄲枕，上新年夢光範門。  
前舊日書欲與兩賢論，出處還家相見意何如。

吳生以趙仲穆所書蘇文忠公遊道場何山詩屬張天英諸人及予和之

溪流行盡穿林麓，白塔紅亭照巖谷。  
道場深處看何山，僧住山頭我山足。  
兩山雲似海瀾漫，飛路百折空中盤。  
我昔幽尋愛僧舍，亦欲卜築臨清湍。  
東坡先生不世出，咳唾珠璣落禪席。  
可憐前度厄兵燹，一踏寶幢誰再植。  
永嘉山水污歌鬢，幸無若人來此閒。  
坡詩珍重趙侯寫，使我見詩如見山。  
我衰不夢周公旦，猶夢尋山及春半。  
買花載酒約吳生，慎勿渝盟重嗟歎。

懷楊鐵崖

讀君舊日伏闕疏，喚起開禧一番愁。  
龍川狀元曾表怪，冷山使者忍包羞。  
東江風雨一斗酒，大地山河百尺樓。  
白鶴飛來作人語，道人赤壁政橫舟。



次韻楊鐵崖過李樂庵墓

胸中萬卷色絲長才出纖毫補袞裳笑脫烏冠辭柏府羞看狐穴倚椒房結庵投老林泉樂易簣遺言翰墨香鐵笛仙翁今表墓婁人當不愧桐鄉

次韻寄梅西溪

宦情吟思兩如何咫尺婁江不我過吳下土風良不惡春來花雨喜無多三農飽喫田閒飯諸將猶揮馬上戈州縣勞人宜莫厭要令襦袴有新歌

寄贈費伯謙

愛爾青年二十餘無心富貴獨耽書楊花雪落滄洲靜艾納煙銷白室虛門外自馳金腰裏案頭長對玉蟾蜍別來吟得詩多少好寄江村慰索居

簡趙執中

溪鳥忘機與結盟鄰雞解語共談經簾前花落燕脂雪樓外山開

翡翠屏無事干人腰嬾折多情於我眼偏青於今同飲長洲水只隔煙波望德星

過悅堂長老看沈香小山適見楊鐵崖所題畫像堂堂之容令人起敬因作此以贈

阿師僧中之白眉身長九尺聃耳垂金爛袈裟舊御賜鐵笛道人新賦詩貝葉手繙諸般若沈香誰琢小須彌不知門外春深淺花雨繽紛二六時

題恆上人清流堂

悠悠黃天蕩苑彼祇樹林水流過堂下一帶清且深要之源頭活澄澈無古今山僧作觀想亦以明其心停雲共徘徊游魚自浮沈三伏不知暑爽氣生綠陰水華晚色淨風柳孤蟬吟嗟哉五濁世干戈如沸鶯客來且忘言滄洲濯塵襟

懷道傳上人

海上誰知己僧中有此郎借人三畝宅留我百花莊故里煙塵暗

窮居歲月長金鍾時振乏鐙火夜分光書摘金根誤詩囊夢草香  
溪山皆杖屨花竹共壺觴每念馮唐老豈容阮籍狂五年同信宿  
十口賴歡康辟穀終無術飄蓬又遠方世情多可笑交誼獨難忘  
南國黃梅雨西林綠樹涼思君重回首湖水隔微茫

懷滄海上人

牀頭不問有金無客到山中酒必沽愛我生來心似鐵逢人爲道  
唾成珠尋梅幾處同舟去對月常時折簡呼別後合塘春水暖柳  
陰誰與看飛鳧

又自述并簡滄海

幽居頗喜俗塵無坐看諸公玉盡沾滿地楊花風捲雪一池荷葉  
雨跳珠借書日與兒曹讀鄰酒時令老僕呼山上有山曾有約何  
時雙履作飛鳧

徐伯樞初還膠山

無錫元度子

昔年歌舞送航船每日登臨對乳泉麥秀故基今雉雉花飛南國

又嗚鵑官軍尙蹀邊城血田舍初生竈突煙只恐歸雲歸未得徵  
車將到白雲邊

次韻贈徐仲剛兄弟

難弟難兄思不羣風流絕似大中君對牀夜聽山中雨辟世春耕  
隴上雲四林松樹青陰合一帶溪流野色分老我劍心猶未死尙  
攜長鋏客田文

次韻贈德謙監州

彷彿桃源古洞天幽香兩岸鬪嬋娟煙波鷗作忘機友風柳蟬如  
脫骨仙田父相過終日醉畦蔬小摘四時鮮棄官溧水歸來早羸  
得閒情樂酒邊

還珠詞寄顧仲英

三首 并序

予以玉山隱君辟地居構李猶合浦之珠徙而去焉今謝杭州當  
路於吳而州縣更化猶合浦之有孟嘗也人而珠者可不還乎  
因作合浦珠詞寄君以致招要之意詞曰



嗟爾珠生合浦川澤見光輝采珠人似雨孟嘗不來兮珠亦良苦  
鮫淚渴魚目瞽

嗟爾珠去合浦川澤失光輝龍嘖獻珠女孟嘗下車兮魚鼈率舞  
象因除吏商阻

嗟爾珠還合浦川媚仍含輝潛居水仙府孟嘗愛物兮物無違忤  
明月出夜光吐

代簡錢夢弼

六年不見埃山雲愛客情多最憶君社酒每傾鸚鵡盞燕姬屢舞  
石榴裙漁郎一去仙源隔燕子重來舊宅焚別墅於今鄰錫谷煮  
茶還許石泉分

絕句

屈原投江死揚雄投閣生一時生死計千古是非心

夏五雜詩四首

使者乘槎海上來藩臣迎詔府中開半年赤地無纖雨此日青天

忽殷雷鷓鷯聯班齊喜舞梟鴟脫網莫驚猜征西諸將橐弓矢應  
受淮夷納款回

遠客相過說帝都黃金如土米如珠內園人歇催花鼓市肆塵生  
賣酒壚河北功臣稱李郭江南租稅賴蘇湖明朝漕運開洋去幾  
日風帆到直沽

寶布初來價倍高吳鹽重權令如毛淡烹葍菜羹無鼓倒著天吳  
褐有濤風起秣陵號虎兇天連青海縱鯨鼉長洲茂苑湖山好自  
愧多憂兩目蒿

綠髮年來忽已皤尊前不樂復如何直如柳惠猶三黜醒似靈均  
漫九歌無數烏鴉爭晚樹一雙白鳥浴晴波相逢莫厭滄洲靜要  
路從前覆轍多

和徐仲剛歸田二十韻

山下室環堵門前柳數株青秧移畎畝白水似陂湖辟世方躬稼  
傳家本業儒十年躋仕路兩浙走危途熟路歸來馬高林返哺鳥

煙塵雖未息風月不虛孤松葉燒茶竈花枝挂酒壺拂塵棕鹿尾  
席地草龍須鳥雀窺窗隙漁樵來坐隅家居聊放適世路甚崎嶇  
池水魚堪養庭階草不誅眼前能自足身外更何需病鶴開籠放  
飢猴擲果呼看雲添逸興對月了詩逋田父邀皆去村童醉或扶  
不嫌鄉俗陋甘學古人迂西垓良田熟東畝小徑紆泉香雲骨髓  
花瑩雪肌膚犬吠溪雲出牛歸田野晡幽居東近海何必更乘桴  
寄甯伯讓州倅次仲剛韻

籠鶴乘軒笑衛公歸來高臥北窗風忘機鷗鷺相依久滿眼湖山  
與畫同洗馬池邊楊柳綠釣魚亭下藕花紅自知大器成須晚不  
與時人校近功

次韻寄斷雲法師

嵯峨塔廟壓長橋東望扶桑路不遙聽法龍來雲滿室傳衣人立  
雪齊腰階前祇樹黃金地石上菖蒲碧玉苗猶記昔年相見日爲  
師吹徹伍員簫

和沈啟之席上詠梅絕句

把酒花前歌竹枝看花不覺舉杯遲春來結得黃金子還有調羹

鼎鼐時

弔顧將軍墓

并序

顧榮字彥先晉散騎常侍贈驃騎將軍開府儀同三司諡元公  
其勲業詳見晉史予嘗慕其爲人今客吳門適近其墓在黃天  
蕩南地方二三里土人直以顧榮墓名之予因往弔焉

白髮吳儂說姓名將軍墓近闔閭城徵車入洛稱三俊割炙知人  
得再生江月似留麾扇影松風猶作鼓琴聲停舟一酌蘋花渚野  
鶴雙飛躑躅鳴

寄徐頤齋先生

一昨天恩頻賜帛數年國步政多難莫嫌旅舍纔容膝喜有丹砂  
可駐顏進乳吳姬香玉暖弄雛萊子綵衣斑故園松菊知誰主又  
見秋風燕子還



九日

爲客東吳年復年吳霜飛上鬢毛邊青山滿眼暗如霧白雁一聲  
哀徹天細看茱萸占老健忽聞桃杏作春妍鄰翁將謂花呈瑞邀  
我題詩展盛筵

送陳希玄入道海上

海上蓬萊知有無林泉佳趣卽仙都三朝鶴繞燒香几九轉龍蟠  
煮汞鑪滿地白雲山館靜隔溪紅樹水村孤敲門莫厭相過客要  
覓丹書古篆符

題梅竹水仙圖

羅浮美人倚修竹凌波仙子適相逢春風桃李自塵土不浣歲寒  
冰雪容

代簡倪雲林

江水西頭繫客槎漁莊遙望隔鷗沙枕書門掩三竿日題畫毫飛  
五色霞杯罍椒香仍臘味階庭蘭茁又春華雪晴我欲尋梅去尙

待東家借鹿車

贈馮縣丞二首

埜人東郭帶經鉏田畯相逢爲下車百里雷鳴元夕後一犁雨足  
五更初行庖只飲長洲水署筆頻鈔種樹書獨奈賦蛇除未得逢  
人蹙額問何如

九土荆榛七八年吳儂輓粟上青天秋風杼軸黃茅屋春雨犁鉏  
白水田農畝要令無佩犢琴堂政賴佐鳴絃停車爲說哦松意立  
盡斜陽野樹邊

題墨竹

吾聞雪堂老仙之愛竹到處敲門看漪菴爲誰寫此秋一枝葉葉  
風生清可掬恍如坐我此君軒與君相對澹忘言焚蘭金鴨綴鳳  
髓我思古人欲邁止

盧知州宜興秩滿以避亂久寓無錫視同故鄉今知崑山必有懷  
二州風物之美贈詩言情并致頌禱二首

我思陽羨茶初生如粟粒州人歲入貢雷霆未驚蟄天荒地老今  
幾年春歸又聞嘯杜鵑山中靈草化荆棘白蛇何處藏蜿蜒玉川  
先生一寸鐵欲劖妖墓救明月丹霄路斷肝腸熱還憶茶甌飲冰  
雪

我思惠山泉長流無古今瓶罍走千里煮茗清人心向來劫火炎  
錫谷神焦鬼爛勢莫撲池邊墮石亦灰飛此水冷瀉寒玉高人  
飲泉五六年一襟清氣清於泉好爲吳儂洗煩熱乘風歸報蓬萊

仙

可笑

崑山州奉省府之命例試在學  
儒人以予爲第三名故有是作

可笑秋娘已白頭也隨年少上秦樓舞腰強學春風柳不及春風

柳樣柔

顧仲英辟地嘉興幾二年聞回崑山往見不遇作詩寄之末章兼

簡西白長老

細雨清明節扁舟過玉山傳書元有誤飛舄竟無還芳草淒淒碧

落花點點斑題名牆外竹黃鳥正閒關

客來常問訊書去半沈浮兩度黃梅雨相思白髮秋樵蘇今短笠

山水古長洲寄與天寧老龜巢賦詠不

麥飯歌和徐主簿韻

太倉陳陳歲仍熟田舍嗷嗷食無粟朝來飯甌麥新炊一穗青煙

出茅屋磨旋日月吐屑霏湯湧波濤跳碎玉耕蓑樵笠隴頭歸急

雨森如瀉銀竹妻孥笑語同一飽且免飢雷鳴此腹安知列鼎五

侯家日食萬錢猶未足

和陸宗魯韻贈夏師魯

百斛葡萄贖有餘一官不換只閒居窗含雲氣虞山近門掩秋聲

栗樹疏鴻雁去來知幾度雞蟲得失竟何如丈夫高蓋非無日聊

遣閒情賦子虛

寄袁仲長

古人心事古冠裳近代伊誰有比方杜甫苦吟頭戴笠管窺危坐



膝穿牀秋風落葉多如雨老圃黃花獨傲霜我亦卜鄰依歲晚讀  
書東壁借餘光

送徐伯樞兄弟膠山耕墓田

東膠山有牛眠地西垓村連走馬塘乞與一抔藏白骨待看殘夢  
熟黃梁梅花杏樹堪懸劍寶乳寒泉可薦觴從此便令童荷鋤諸  
君疑似古桐鄉

送費伯謙之吳郡侍親

若翁清約似無官宜爾儒衣不厭寒鐙火十年勲業在湖山千古  
畫圖看冰池魚躍供調餼雪屋雞鳴起問安他日過庭煩寄語別  
來頭白臥江干

鉛上人席上作

有客有客龜巢翁鬚髯如雪氣如虹權門要路腳不到寧與山僧  
野老長遊從鉛公喜不縛禪律百榼沽來作生日雪花似亦爲人  
喜庭舞婆娑俄入室酒邊笑殺東家兒檳榔不與劉穆之尋常有

客謝無酒有時對酒還攢眉人生能得幾初度且無長繩繫烏兔  
癡兒夢夢真可嗤不識盈虛元有數君不見黃頭郎到頭餓死錢  
堆傍何如眼前有酒且爲樂毋令愁結九迴腸

遣愁二首

偶覽青銅鏡方驚白雪髭如何不飲酒猶自苦吟詩面作鞞紋皺  
腰閒帶孔移獨存方寸鐵剛似少年時

茅屋瀕湖住蕪菁借地栽一秋常苦雨十月屢聞雷岸草青青出  
牆花灼灼開埽除蠅蚋迹還有北風來

和危太僕參政韻送慶德謙治中

徐驅百騎穩如船雨露新承下九天當道故人多汲引大參佳句  
獨流傳數年華髮風塵裏一點丹心日月邊老驥只今方展足蜚  
聲當不愧前賢

留別知隱愚長老蘇昌齡先生

淞江大湖春水生湖邊白鷗尋舊盟遠公沽酒壯行色坡老題書

慰別情燕子日長書屋靜柳花風颺釣絲輕相過不負青山約一  
權夷猶兩日程

徐伯樞和韻送行予復答之

主人送客呼麴生膠山下居仍有盟締袍戀戀感君意去國遲遲  
知我情教子正須熊膽苦看花應喜馬蹏輕老夫把釣扶桑下目  
送鵬搏九萬程

挽雍處士

孝友人無閒詩書子更賢十年遭世亂三樂得天全處士星今隕  
虛堂月自圓客來懸榻在老淚爲潸然

寄謝雙楊沈仲庸并簡同席諸友

一林修竹映滄洲百榼葡萄汎玉舟送客留髡成大醉憐君小阮  
與同遊舊家燕子飛華屋滿地龍孫著錦裘宛似蘭亭修禊日坐  
中賓客總風流

朱明道等九人和前韻見貽各答一首并自述一首

新居風景似麟洲我亦頻來繫客舟山列畫屏朱萼熟湖開青鏡  
錦鱗遊疏狂不厭高陽侶凋敝應憐季子裘有酒正須開笑口黃  
河今復見清流贈朱志道

先月軒前杜若洲抱琴童子釣漁舟蝸牛有國方交戰鷗鳥忘機  
且共遊戲綵諸孫頭峙玉瀕河二頃足菟裘吟餘不接紅塵事洗  
耳無勞枕碧流贈明道

楊柳飛花雪滿洲水邊亭子小如舟四時花月供談笑千古湖山  
可釣遊有客卽呼鸚鵡蓋無衣還贈鸛鷗裘試聽月旦評鄉里侷  
儻今爲第一流贈原道

清江濯足坐中洲自喜身如不繫舟槐國功名前日夢玉京孤負  
少年遊每邀田父同雞黍已學山人製鹿裘醉後劇談今古事面  
如頰玉語如流贈趙善長

晚涼池館藕花洲郎罷呼兒放綵舟老膝尙容文度坐佳賓多與  
阿戎遊長腰米飯猶珍饌五色萊衣勝綺裘莫笑東家人諄語由



來涇渭不同流

贈華子強父子

愛君楓落吳江句有客相期放剡舟  
滿眼雞蟲從得失忘形鵬鷁共遨遊  
秋來江上鱸堪鮓歲晚山中貉可裘  
如此幽居良不惡比鄰況復有詩流

答盛彥英

鍊得身形癯似鶴江湖杯渡捷於舟  
湖邊舊宅適歸隱吳下諸山今臥遊  
學道已知磚作鏡工詩更悟冶為裘  
曹劉沈謝何零落風月平分支遁流

答惠上人

老夫衰嬾慚無學年少才華羨李舟  
好覺靈槎天上去莫攀仙桂月中遊  
踞牀我欲來吹笛換酒君當為解裘  
最喜今年秋至早涼生六月火西流

答崔彥麟

少年學士俱瀛洲老我浮家只葉舟  
每憐古調少人聽喜得新知如舊遊  
四海風塵桃竹杖十年霜雪木絲裘  
邇來同飲太湖水最喜白鷗非俗流

過吳江三高祠

三高祠前秋水波客來弔古悲且歌  
季鷹魯望桑梓敬蠡也籩豆理則那  
身為越人身相越百計吞吳吳乃滅  
眞憂烏喙將無情死狗烹肝腦裂  
飄然攜家湖海遊捧心人與同扁舟  
越人誇功鑄金像於吳孰曰非仇讎  
行裝重寶久彌厚清高之風絕何有  
奉嘗堪笑木腸兒忍睹荒臺麋鹿走  
江風蕭蕭楓葉寒扣舷折我青琅玕  
靈胥怒扶海潮起殷若雷鳴過雪灘

寄僕知州兼簡蔡教授

使君心似婁江水霜落秋高復清田  
野但知耕穫喜閭閻不識叫囂聲  
背山館舍雲連屋通海漕渠潮入城  
公退應尋蔡文學投壺置酒適閒情

病中夢徐伯樞戴時中見過既而伯樞惠詩次韻答之

病來呼酒當神接又得牽絲作釣鉤  
堪笑生爲窮谷叟不妨死作醉鄉侯  
四壁西風茅屋冷一簾疏雨桂花秋  
山童淨埽門前路數日頻迎李郭舟

中秋日觀朱明道自壽之詩次韻言懷并紀燕集

兵戈驅迫十餘年此夕珠歌翠舞閒出囊葡萄杯盞盞盤鈴傀儡  
錦班班達人不惜千金費浮世能逢幾日閒月裏嫦娥應笑我也  
將華髮對嬌嬈

追和侯良齋秋懷四首

寸絲欲補袞龍衣歲月蹉跎志願違身老江湖心未已夢遊京洛  
覺還非蕭蕭木落青山瘦浩浩西風白雁稀慚愧太湖清似鏡照  
人雙鬢短垂絲

出入都無騎從隨杖藜於我頗相宜詩成每得江山助酒病還將  
麴蘖醫杜甫眼前茅屋在陶潛心事菊花知朝來兩袖西風淚遙  
爲鄉人酒肉籬

世事無涯生有涯逍遙誰得似南華龜巢近傍三江水鷗侶平分  
半席沙稚子學書收柿葉老妻添絮采蘆花客來且共藜牀坐莫  
說金張許史家

垂蘿曲磴轉攀緣挑酒筇枝不挂錢白石路傍如虎踞青松磻底  
作龍眠一杯且詠重陽酒二頃何須負郭田風景不殊陵谷異丹  
心雪髮兩堪憐

六柳莊爲沈太守作

彭澤五株柳清風千載餘顧余心乃心修名難與俱所以樹六柳  
於焉結吾廬門前有流水樹下堪釣魚栽柳已成陰豈不懷歸歟  
人生一趨舍世事紛萬殊善學柳下惠風雨慎攸居繼迹子陶子  
亦曰姑徐徐誰其知此心南山默如愚

九月八日朱原道席上作

主人預宴重陽客老我重逢癸卯年醉把黃花簪席帽笑攜紅袖  
棹脫船洞庭山色軒窗外震澤波光几席邊不用登臨勞騎從恍  
如蓬島醉羣仙

爲吳中行題畫

老樹骨立偃蹇秋山氣勢佳鬼閒卻一江風月扁舟罷釣歸來



次韻答仲英

客僧留客古禪宮  
湯茗薰鑪對菊叢  
佛法不隨塵世變  
鄉心猶與故人同  
一林紅樹含疏雨  
半壁青天截斷虹  
早晚相尋東海上  
扁舟相趁落潮風

題春江獨釣圖

江碧山青雨過時  
輕煙漠漠樹離離  
白頭呂望鷹揚去  
獨釣滄洲是阿誰

過崑山王御史墓

宋御史王棟字彥光  
登宣和進士第  
紹興初上疏論十弊切中  
時病後告老居崑山  
逸野堂所著有春秋集傳等書  
行於世墓在州南久廢之餘  
賴知州僕公復之友人殷孝章以其事索詩  
故有是作

先生逸野堂何在  
仰止崑山有所思  
麟史立言三傳外  
鷹冠遺直中興時  
一杯難朽孤忠骨  
十弊猶存謬語詞  
過客下車翁仲立  
共

看重樹墓前碑

簡金君玉

峩峩洞庭山  
宛在水中央  
山風西北來  
微帶橘柚香  
我友山中居  
一別今十霜  
題橘宜有書  
鴻雁日南翔  
老懷多感慨  
煙火生肺腸  
作詩報君知  
湖山迴相望

聞杜玉泉臥疾以詩代簡

聞君臥讀牀  
頭易世事更新恐  
未知一國山林包錦繡  
五湖煙水照旌旗  
天寒日暮人相憶  
冬至陽生歲又移  
江柳鵝黃春草綠  
幽尋當不負前期

次韻沈啟之宴飲

柏酒春三日  
梅花信有風  
赴君雞黍約  
醉我鹿皮翁  
凍雪山頭白  
晴雲海上紅  
天高不可問  
吾道未應窮

贈慶別駕

台州別駕不之官  
煙水孤村共歲寒  
偶有濁醪留晚酌  
旋挑生菜

簇春盤三年鄰里通家好四海兵戈行路難且喜門前金色柳東風堪作畫圖看

送人妾爲尼

燕子樓中別綺疏象王宮裏學眞如秋波獨注蓮花漏春筍頻繙貝葉書十二雲峯無復夢三千沙界本來虛散花天女長圍繞觀色觀空樂有餘

路義道見訪示詩言懷予次一首

書畫船來城郭外客窗春在雨陰中一違談笑經年別又得壺觴此日同江水照人清似鏡山頭戴雪白如翁新詩屬和題青竹几杖相隨許阿戎

次鄭啟南縣丞出郊

出郭問農事哦詩思不羣犁鉏江上雨桑麥隴頭雲馴雉行相逐雄鳩語更聞野翁相勞苦飛蓋倚晴曛

上元夜賦雪

此夕何夕風作威急雪打我白板扉大如鴻鵠小鷗鷺乘風作陣橫空飛老夫起坐驚且喜窗隙壁罅皆珠璣鄰家女兒時未寢看與鐙月爭光輝夜深人靜鐙燭滅密掩姮娥爛銀闕恍如太極未分時混沌之天無日月須臾忽聽簷竹折驚動老夫方寸鐵直憂壓倒湖上山連我龜巢化魚鼈老龜縮頸牛衣中夜長如歲心忡忡鄰雞三嗷催曉發燭龍飛出扶桑東口銜火珠光燄紅萬國一照春融融客懷愁與雪俱釋青山依舊撐虛空

吳門訪路義道和古詩二首

客來上元夜筠軒照晴雪對雪飲流霞敲冰煮團月誦君詩數篇忘我衣百結一笑看梅花餘事不復說

新年到城市憂思喜一雪復覩漢官儀仍書王正月蘇州古名郡刺史得元結老我愚溪叟無勞捕蛇說

贈楊君濟縣丞

我思崑山鉏白雪高軒訪我麋鹿羣我今長洲釣明月君復過此



寂寞濱威君相知式相好與君談笑開懷抱坐分半席白鷗沙滿  
目青山淨如埽社公雨晴風作惡村北村南花自落觀農來往杏  
花村雞犬不驚田舍樂君歸哦松坐松陰我舟更入菰蒲深釣鉤  
無餌勿語人但說煙波無處尋

寄蕭舜卿兼簡虎邱靈居中長老時蕭年八十三矣

愛爾鄰居虎邱寺劍池盤石好林泉一門父子頭如雪十載兵戈  
命在天故國青山還歷歷春風芳草自芊芊生公會招賢意我  
亦來從種白蓮

達至善自錢塘過訪會徐伯樞昆仲諸友小酌以少陵春日鶯囀  
修竹裏分韻得日字

兼旬苦陰雨階蘚青入室良朋遠方來一笑百憂失闊別十載餘  
艱虞難盡述喜聞戎馬閒猶得用儒術閒關脫虎口壯志曾不屈  
歸來西湖上飲水猶食蜜中吳舊親知生存百無一龜巢酒盈樽  
聊以永今日兩兒聆我言諸孫亦繞膝殷勤問生理爲我長太息

千戈紛滿眼世事暗如漆願言慎所之終焉保貞吉

雪舟詩爲王照磨作

雪中傲兀乘孤舟千載復見王子猷吾知君欲記高興君聽我言  
當點頭男兒胸中有兵甲筆底滔滔水三峽正須擊楫誓中流雪  
外蓬婆爭蹴蹋長驅夜入懸瓠城指麾鵝鴨混軍聲生擒送豎取  
金印江梅卻尋鷗鷺盟

和沈啟之早春書懷

水光山色淨無塵滿眼東風景物新繭栗攢眠芳草地木蘭船繫  
綠楊津莫嫌頭上鬢鬆雪且盡杯中澉灑春鶴自乘軒烏自好滄  
洲鷗鷺與情親

簡錢仁山

一榻青苔對雪五湖春水流嘶欲遣長須覓酒先拈秃筆題詩

二月七日和徐伯樞排悶一首

人生百年能幾何有酒快酌金叵羅已看蓬鬢點蒼雪莫待桑田

變白波東風花外鵲聲喜落日城頭烏尾譌君詩到手客在坐擊節聽我玲瓏歌

伯樞以啟之韻作詩見贈復答一首

蕭齋孤坐席凝塵喜得君詩字字新四海交遊期管鮑一家兄弟比椿津多情燕子重來日絕色桃花不負春愧我少年書劍在白頭無復報君親

贈星術王達夫

虞廷命官非不多曆象必先義暨和義和去年數千載名與列宿俱嗟峨先生本學義和氏聊爾談星隱吳市二十八宿緯五經上繫天時下人事先生爲人推吉凶一天星斗羅心胸河圖洛書造化窟妙理貫徹精靈通齋居垂簾坐終日金鴨焚蘭煙縷碧客車載酒來問星先生舌端飛霹靂每將忠孝語臣子不惜忠言逆人耳天降災祥本在人人能轉移天亦喜君不見宋君三善言熒惑退三舍天人果相爭大咎亦可謝又不見韓退之命在斗牛身坐

箕遭讒受謗能自知怡然高詠三星詩吾儕此理或未析請從先生考星曆

和邵彥清州判暮春寓僧舍三首

治最功成解印歸春風綠髮未應稀如何拄笏禪牀下閒看孤雲倦鳥飛

沈水香銷午篆煙僧房聊借石牀眠多羅樹上頻伽語絕勝天津聽杜鵑

篋藏湘帙沁芸香手閱金經掩竹房門外不知春早晚綠陰滿地日初長

雨中寄友人

春風冷淒淒煙雨晝冥冥相望隔重湖幽事頗關情賴有小吳箋可以寫心聲心聲寫難盡況無雁南征出門泥沒膝恨不生羽翎隔窗兩黃鳥花閒語嚶嚶頽然枕書臥一榻莓苔青楊縣丞董役開白茅河晝夜辛勤以詩代簡



畚鍤如雲穿白渠客來喜得問何如行庖只飲婁江水俸米頻供  
僮石儲人起四更燒蠟燭霜飛兩袖坐籃輿殷勤左轄銀瓶酒爲  
報功成有薦書

劉旭齋過婁江客舍作詩贈之

方欲題詩寄草堂遠勞移權過滄浪十年同飲三江水一笑相看  
兩鬢霜田野無人鷓鴣種麥潮渠通海嶼輸芒逢君莫語悲秋事且  
復持杯送夕陽

玉田喪側室作詩悼之余因次韻慰之

目斷琴臺日暮雲相如無復見文君最憐機上迴文巧更憶鐙前  
教子勤繡篋熊丸香尙在綺窗鸞鏡影初分江村一月黃梅雨誰  
爲衣篝爇寶薰

五叢徑送玉田徙碧山與龜巢鄰居

傾蓋兩兩月同客天一方君今挈家去宅我龜巢傍爲聞碧山好  
宛在雲水鄉朝紳多寄寓羣髦富文章將尋鷗鷺盟與我同穴藏

老婦堪夜績東壁分餘光客至亦可留覺酒過短牆巷無車馬塵  
屋有汗竹香簾金與牀笏笑視俱亡羊惟存廣文甑讀書坐藜牀  
閉門樂吾樂蔬食猶膏粱清風北窗下懷哉古羲皇

寄劉景儀先生

杏花春雨晴時別蒲柳秋風又颯然笳鼓新城嚴警邏溪山幽館  
喜便安校書還照青藜火煮茗應斟錫谷泉近遇故交聞有信遠  
勞垂問念無甑龜巢仍寓黃天蕩龜竈今連白水田自分犁鋤聊  
卒歲可堪兵革更饑年家居食指一百廿斗米緡錢八九千瑣瑣  
旅懷言莫盡知君憐我似夔虵

寄顏悅堂長老及崑山州學諸士友薦嚴永懷二方丈

雙徑歸來舊竹邊林風礪月兩依然崑山特立煙塵外婁水東流  
渤澥邊坐有故人應念我客無此老共逃禪南能北秀煩傳語秋  
晚相過飲菊泉

杜子才掾史攜詩見訪次韻一首

白首無機心江鷗最憐我復有新相知時來與閒坐一涼初過雨  
七月正流火先鞭君已著短鍤我方荷壯君早騰鶩老我常軼軻  
鄰居幸如此數見何不可茅茨湖上居菱芡水中果後會期碧山  
合歡呼白墮更邀詩酒侶共載書畫舸中秋月如畫西溪振歸柁  
玉山顧隱君自嘉興答詩詢僕近況且云徑山禪老亦望一見故  
復用韻自述簡諸故人

琴何處覓鍾期

次韻答戴麟隱見贈

我生無他長耽書竟成癖鬚眉皆雪霜肝膽如鐵石所賴識前言  
頃步不妄適向來走風塵朝不能慮夕行囊旣羞澀家累且繁劇  
隨身一破硯百指全仰食驅馳今九載未始一日閒豈不懷故園  
松菊怡我顏長蛇及封豕出沒咫尺閒逢人問親戚野坐荆屨班

不見雁足書徒眎刀頭環遙憐金斗城如望玉門關憶昔重九時  
鄉鄰雜黍約黃花香可愛白酒味不薄東家復西家相邀總難卻  
負郭有二頃平居得三樂朋游結詩社時時共吟嘯溪澗采蘋繁  
春秋奉祀禴幾迴乘天風欲跨揚州鶴那知一顛沛江湖竟漂泊  
移家碧山下家具少於車幸君適相逢同念去國賒聚如水上萍  
散若風中花或琴教河汾或玄授侯芭交情比投漆子弟亦通家  
詩筒頻往來瞬息經兩稔壯君多志氣將衣買臣錦老我忘功名  
但就呂公枕三江五湖水共喜魚不淪莢觴了佳節藜牀且甘寢  
春日方遲遲秋霜俄凜凜好客多釀酒願作東林沈

寄丁彥誠

旌旗滿眼各西東君覓桃源我轉蓬兵後卽知還舊宅客來曾屢  
寄詩筒石田種秫梁溪曲茶竈分泉錫谷中最喜西窗山色好青  
霞不染俗塵紅

贈沈彥肅典史兼簡王景德



空山寒雲白如雪歲晚高軒過巖穴三生石上拂蒼苔一笑梅邊  
有明月牀頭釀得松花酒思與故人傾瓦缶煩君爲問王子猷剡  
舟肯棹同來不

旭齋歌次鐵笛先生韻

旭齋先生行年七十餘終朝耽書樂且孺白駒過隙莫可留欲把  
長繩繫烏兔囊無一錢任羞澀腹有羣經飽撐柱論交貴在見肝  
膽不學時人口相煦有時醉吟詩其巧猶凡注快若爬背癢十爪  
倩仙姬昔賢只讀圯上編便遇君王借前箸先生豈無策可用草  
廬未有人三顧青山白雲古畫圖筆牀茶竈今家具居吳十年食  
破硯硯田幸喜無租賦秋風籬落桑葉隕枯蔓蕭條繫寒瓠西伯  
何當獵渭濱載取飛熊後車去

次韻寄題鄒朋壽草堂并簡劉旭齋

賓主東南美溪山遶屋廬經鉏百戰後版築十年餘木落西風急  
窗明夜雨疏恍恍二三子燈火案頭書

答楊獻可見贈

憶爾梁鴻山下宅園池不減李文饒一朝猛雨鶯花去十載東風  
燕麥搖客裏相逢聊慰藉樽前一笑共歌謠君歸不負青山約好  
似淮南早見招

寄因本初講主

愛爾吳江水西寺門前流水碧於苔松花布地金無數蕉葉繙經  
紙萬枚講席每留詩客坐浴堂曾爲國王開別來雨洗秋容淨涼  
入袈裟亦快哉

寄謝楚芳

鄉城一別十五年別時玄髮今皤然無聲詩與有聲畫彼此贏得  
虛名傳君家有子爲時出且喜讀書兼讀律絕勝吾兒但筆耕三  
徑蓬蒿塵滿室老夫縮如龜穴藏思君見之羹與牆移家同飲太  
湖水尙期東壁分餘光

簡吳江朱志道諸昆季

去年長至聽填籟轉眼今年又此時棣鄂喜存兵後樹梅花早綻  
雪前枝西山近日無烽火東閣何人共酒卮兒輩比歸今問訊吳  
音變楚莫相疑

盛彥英隱居太湖之陰號具區耕叟命僕作詩以歌詠其樂云  
脫屣東華塵躬耕太湖濱桑麻接鄰里魚鳥情相親閒時讀書牛  
背上安知六國方攻秦東風三月桃花雨布穀飛來向人語一犁  
初破隴頭春黃犢去闌健如虎義農世遠莫可追南山石爛無足  
悲悲歌笑甯戚夜半猶未已人間閒是非何用污牛耳我田已耕  
春晝閒樵童隨我看青山日暮歸來一壺酒我歌鳴童拍手童  
拍手兒飯牛一天星月爛不收重捻鐵笛作三弄七十二峯俱點  
頭

臘至

臘月無多日行年六十三浮生空自老往事實多慚南國山皆赭  
東郊草未藍蕭條江郭外雲暝雪毳毳

懷閒野舟長老兼簡真本元上人

大地北風寒且嚴香疑丈室晝垂簾庭前柏樹心相契窗下梅花  
手可拈出郭鐘聲聞數里穿城塔影見重尖欲求智永千文帖煩  
說區區寄口占

偕徐伯樞訪王孟翼酌酒論詩經宿而別

舊雨客來今復來溪堂新築柳新栽風生玉塵談詩律露溼金盤  
把酒杯淮甸三邊烽火息吳山千里畫圖開相如未奏凌雲賦當  
路誰能薦逸才

劍池送曹廣文赴學士院檢討

峩峩虎邱山湛湛劍池水水深人莫測草生寒不萎世傳祖龍劍  
斫斷蒼雲根千古兩絕壁鐵花點苔痕僧廚轉轆轤陰厓落冰雪  
臨池人有語響答出林樾先生屢幽賞盥濯彈琴鳴木石俱點頭  
魚龍亦知音今居白玉堂還念青山約羣仙與重游光輝舊巖穴  
雨中懷徐草堂兼述杜掾史求詩之意



亂紅飛盡綠陰稠風雨涼生四月秋且喜三邊清似水何妨一室  
小如舟歐虞墨帖時臨寫吳越青山總臥遊肯爲杜陵題老桂難  
兄應作置書郵

和浦玉田清明日郊行六絕

湖上新隄蹋輦沙少年人面映桃花花村風物渾如舊獨欠青帘  
賣酒家

柳絲裊裊拂滄波花雨斑斑點綠莎寒食清明春又晚人生不樂  
復如何

笠澤西頭王墓村桃花水浸竹籬根年年春到清明日兒女郊行  
柳插門

一幅春雲巧似裁隔湖飛過碧山來野橋小立題詩處夾竹桃花  
爛熳開

四望青山眼欲花山光都是薄雲遮杖藜徐步歸來晚月上東窗  
恰到家

每惜春光去後思春來行樂復何辭放舟莫近吳門去諸將樓船

正出師

壽徐伯樞

碧山湖邊銀杏樹數百人家星散住中有南州高士孫借屋讀書  
深閉門豈無香醪甜似蜜好客相過方與喫朝來爛醉呼不醒蓬  
矢桑弓挂虛壁皇天有意生男兒錦繡五藏瑤瑰詞亂紅飛去綠  
陰靜菖蒲花發當何時

贈葛天民

吾聞清孝公爲君八世祖可憐遭亂離麻鞋走塵土牀頭無金何  
處索堂上雙親頭欲白五星纏度書一編江湖乃作談天客吾嘗  
閱其書心目俱茫然星辰之高四萬八千里三百六十五度分周  
天人生兩閒應列宿探索豈易窮幽玄君今自喜得其妙回視筌  
蹠成一笑萬象森羅方寸中千尺碧潭寒月照高談往往驚倒人  
黃金細載歸養親鱸魚斫膾羹紫莼菰稭五色斑衣新人家生兒

孝養有如此何必鐘鳴鼎食重華茵扁舟過我三江口留宿龜巢  
看星斗櫂槍熒惑總莫論且道酒星無恙否酒星苟無恙酒禁必  
早開娛爾白髮親酌彼黃金罍我生不願萬戶侯亦不願識韓荆  
州但願太平無事百不憂吾兒賣文君賣術得錢可以沽新筍若  
翁與我日日眠糟邱

桂宗明掾史請告之錢塘省母將徙居來時太尉丞相張公在分  
省嘉宗明之行贈錢數千緡故詩及之

丞相知君念母情金刀錯落驢君行衣冠祖帳三江口帷幔歸舟  
數日程烏鵲知人先喜信鱸魚入饌試當烹高堂若問吳門事王  
國金湯第一城

和浦玉田詠物二首

嗟爾五月菊黃花發何早平生傲霜枝乃雜半夏草趨炎真強顏  
久雨竟垂老榴裙掩人眼坤裳爲誰好忍負陶淵明秋風舊懷抱  
嗟爾六月蟾爬沙出何遲天生一腹蟠且有足奇乖時人共棄

保身自污池昨午遭磔死同類多可悲月宮老墓精居高知不知

寄陳子章申屠仲權

聽雨聽風半月餘高齋吟嘯興何如雨添泮水芹芽長風撼帷林  
杏子疏毛穎功名應立傳杜康交絕豈無書陽春白雪詞皆妙好  
寄龜巢慰索居

賀陳子經赴學士院著作

白玉爲堂置此身詩書端不負文人花生綵筆絲綸美柳染宮袍  
雨露新日過八磚趨禁署天開一國用儒紳吳淞江上漁樵客也  
爲謳歌寂寞濱

代簡崔宗明掾史二首

孤坐馳遐想羹牆見若人宮牆今畫省家世舊朱輪南國梅花早  
北堂萱草春慈顏應有喜過客總儒紳  
落葉擁柴扉吾兒日暮歸手持毛義檄身著老萊衣客路風塵久  
青雲故舊稀何當報一飯不遺此心違



壽徐主簿

昔君濯濯如春柳鞍馬日隨丞相後翩然提劍掃蠻煙欲取金印  
大如斗一鞭徑度浙河東東南滿眼旌旗紅手援赤子出塗炭慈  
谿草木生華風長嘯歸旌行復止濯髮淞江太湖水鱸魚蓴菜非  
不佳總憶家山舊桃李君今草堂宅東郊有田可耕山可樵堂上  
慈親足甘旨相知與結桑麻交金門玉堂紫薇省無復回頭看畫  
餅但愛鵝津秋水清雪色蘆花一千頃豪吟往往似謫仙但不持  
杯醉花前杯中之物時有禁煮茶多費惠山泉龜巢老翁不浪出  
遠來爲君作生日草堂此日題此詩四簷風竹吹簷葉  
申仲義錄事自杭州來議論慷慨風節可喜作此以贈  
客來試問錢塘事冠蓋都非舊日人尙喜西湖堪種柳不知東海  
欲揚塵手題王粲登樓賦頭戴陶潛漉酒巾如此江山如此客政  
須傾倒洞庭春  
和沈啟之立春作

何物淮夷久亂華東風依舊滿天涯春盤薦酒杯頻舉醉筆題詩  
字半斜無數故人俱契闊一雙老眼近昏花家貧賴有長鏡在坐  
待青山長蕨芽

徐伯樞仲剛來云鄉僧某刺血寫華嚴成好事者爲之盛集緇素  
送經置吳門無量壽菴時有人以兜羅縣拭經縣化佛手觀者  
異之贈言盈軸徐伯仲徵予詩不已故彙括佛氏作此貽之  
吾聞兩足尊化身千百億諸相卽非相非空亦非色云何兜羅縣  
變現佛手出華嚴海無量本無塵可拭隻手挽頽波正賴佛之力  
譬如水中月在處照澄碧若以色見之癡雲暗如漆由來標月指  
具眼當自識

暮春陪周明府過顧將軍祠下碑

黃天蕩上將軍樹樹下數家人姓顧行人遙指若堂封往事猶論  
麾扇渡新祠畫藻煙霧溼古木垂羅鬼神護長洲縣令枉高蓋短  
褐巢翁曳雙履海棠正落臙脂雪山餅爲酌金槃露柱頭老鶴作

人語道傍馴雉隨車駐吳趨一曲歌未了蜀魄一聲春又暮金戈  
鐵馬尙酣戰白羽清風復誰覩看碑莫怪客如雲彼君子兮真可  
慕

端午日徐伯昂過寓所以詩見示次韻一首

南湖風浪惡客至喜且驚連日雨不止明朝陰又生戈船海中歸  
戰鼓江上鳴端陽一杯酒忍聽歌霖零

簡徐伯昂

淮海十年猶亂離清江一曲自樓遲門前纔送催租吏籬下還吟  
采菊詩世事紛紜何日已襟懷蕭灑少人知卜鄰欲近蘆花渚我  
亦扁舟理釣絲

壽慶治中

日下歸來年復年之官未上浙東船人憐垂老身長健自喜居閒  
志益堅好客每呼鄰舍酒教兒不惜買書錢試看尙父鷹揚日渭  
水秋風雪滿顛

次韻寄題碧雲禪老上海縣山居四絕

青松種來過屋長松濤六月生秋涼香凝笏室靜如水道人觸法  
能相忘

住菴人似南泉老無數青山在屋頭眠鹿階前金布地西風吹老  
桂花秋

門前問話人立雪想像吾家游與楊靈禽盡得響天樂老雁獨憐  
隨稻梁

海上諸峯絕點埃浦泉流水碧於苔何當借與梅花屋我亦移家  
歲晚來

又和律詩一首

笠澤東連海好山青更多遠分苔脯供兼寄草菴歌拄錫僧方去  
攜琴客又過送迎門不出奈爾懶慵何

寄沈德齋

入城每問東林老辟地今居東海頭秋半卽嘗菰米飯冬初已著



木絲裘青衣擣藥鄰鮫室烏几燒香對層樓我欲移家相近住釣竿煩爲覓滄洲

爲源長老贈醫士單子達

老我無他技憐君正妙年父書能盡讀醫術得親傳舊隱荆溪上今居笠澤邊幽蘭初古佩采藥洗春泉鶴守燒丹室鷗隨載酒船每聞驅二豎近喜活枯禪優鉢微含笑頻伽喜欲顛卻還青玉案持去白雲篇高誼能如此時明豈舍旃政須醫國手爲我救顛連普大雲講主以紈扇畫蘭見惠作詩謝之時雲在吳江普渡院講法華經學徒甚眾

上人遣我白團扇扇上復爲蘭傳神足知清興迴絕俗更覺幽馨時襲人猊座講經雙樹下龜巢織履五湖濱明朝相約看山去不怕西風揚遠塵

寄朱原道昆季

太湖三萬六千頃流血水腥江海連幾處焚舟成赤壁有時飛礮

落青天雞蟲得失那能問鴻鴈飛鳴亦可憐若箇桃源堪共住也須容我釣魚船

臘月二日偕俞仲寬過篠徑僧舍蒙舉似近詩次韻一首

故國溪山各遠離倚樓長笛爲誰吹相逢海上三生石共惜邊風兩鬢絲客舍暫如桑下宿世途危甚劍頭炊明朝裹茗西菴去更約匡衡細說詩

勁節亭詩爲半雲講主賦

我本山林人此君與羣居頻年避戎馬出走荆棘途雙溪適相遇歲晚冰雪餘蒼顏固云老清氣方凜如儼然古君子節勁心仍虛紛紛桃李花榮樵纔斯須長松髯似戟亦作秦大夫我思首陽山竹君兩遺孤高風激頽懦氣節與君俱之人不復見見君如友于此意知者誰居亭老浮屠綠琴爲我彈碧酒爲我沽萬事付一笑嗒然我忘吾

懷徐伯樞諸友

一昨方臥病妻子呼避兵扶持上輕舟烽火照夜明問兵今遠近  
言圍闔閭城賴有風滿帆送我東南征三宿坐不寐鶴唳近華亭  
晚泊青龍江蘆葍市地青新知道相遇留我居榛溼土風頗淳朴  
地僻雞犬盜吾病日已瘳客來能送迎老叟心自憐或謂詩骨清  
比鄰兩三家情親若平生園蔬日持送酒壺時共傾對酒不能樂  
艱虞未忘情懷哉數君子雨打水上游漂搖各何許吾將尋舊盟  
賣刀買黃犢子孫共春耕奈何西枝西礮石猶雷鳴  
偕俞寬仲遊普光寺俞作詩紀行予次一首  
繞屋疏筠玉有光沒階細草翠生香林藏鹿苑雙溪曲路轉龍江  
十里強蕉葉繙經人自樂槐根做夢蟻何忙白衣二老來聽法甘  
露醍醐得試嘗

臘月廿日會林才元於普光方丈

詞氣崢嶸吐玉缸山林興與老夫同獨憐幽草來西礮共聽枯桑  
叶北風四海十年兵火後雙溪一笑夕陽中評詩爲掉樓卿舌殊

勝儀秦詔七雄

送和彥良兼簡朱端卿

移家喜得好林泉甫里先生古宅邊憂世頗添新白髮校書還坐  
舊青氈秋風茅屋都無恙臘月梅花正可憐我有故人多古意斷  
琴煩爲續朱絃

贈張孟文

青龍江水清如玉青龍故家書滿屋中有郇公九葉孫一目五行  
能盡讀科名未欲拾地芥鐙火長如校天祿有時述作繼風雅三  
國六朝車並轂手揮赤血拔鯨牙琴斷玄文裂蛇腹雙溪近傳寒  
食句又出唐人一機軸相逢說項人益多宛見清標立霜竹吾生  
愛詩入骨髓老去窮吟鬢如鶴金張許史懶折腰沈謝曹劉長在  
目江頭偶泊避風船故山將歸采黃菊金盤不必贈檳榔願覺奚  
奴珠一斛

次韻贈本蘭亭上人



庭前手植娑羅樹樹下頻繙竺國書失鹿不知秦二世葬魚那問  
楚三閭園收柿葉皆新紙林養松花當宿儲十里雙溪春水綠浮  
杯時復訪樵漁

余患癰疽適兵後無醫藥可療卽事口占并寓感歎

吮癰人在五侯家市肆都無藥可賒童子歸來風雪夜老夫愁絕

對梅花

次韻徐伯樞見寄二首

病臥碧山久愁添白髮新一冬無雨雪四海尙風塵妻子移家遠  
親朋折簡頻梅花應笑我出語欲驚人

客夜牛衣薄春王鳳曆新東南蝸角地多少馬蹏塵鼙鼓依然急  
壺觴莫厭頻君看塞翁馬得失豈由人

奉贈薛宗師及于薛二真人

論道清寧日承恩紫極天星言辭輦轂雲臥樂林泉虎衛燒丹室  
龍耕種玉田居山閒宰相行地活神仙清問時猶及玄談世共傳

春秋今近百弟子動成千入室稱于薛承歡度歲年蓬萊方丈外  
磧隩澗湖邊別墅三花盛深居萬竹連玉桃紅綻雨瑤草碧生煙  
麟脯供仙饌鸚杯舞醉筵雲璈齊上下霞袂各踟躕福地風塵遠  
壺天日月懸目光方炯炯眉壽正縣縣老我頭垂白尋師志在元  
飄零隨草芥佩服集蘭荃欲進圯橋履重來笠澤船山靈元有約  
石髓未應堅析理秋毫末研幾太極先黍珠當一照光彩徹天淵  
早春訪君立以詩見贈次韻答之

老夫藜杖病初起幽谷蘭花喜正開持酒對花留信宿賦詩題竹  
約重來一犁新水初春雨百蟄皆驚半夜雷嗟我無錢堪買犢歸  
耕心亦冷如灰

正月廿三日過許君善竹所留六日蒙置醴且出諸畫卷命留題  
焉

茅屋秋風杜陵老桃花春水許家墩連宵共翦西窗燭每日頻開  
北海樽童稚閒膺知揖讓鄉鄰見客問寒溫遲留不厭逢多雨喜

得題詩萬竹軒

余過橫塘訪趙朋南先生值回錦溪遂留許徵士家雨窗因覽元

夕之作次韻代簡

行路難行久不禁尋君欲吐別來心十年飯顆詩容瘦一病文園  
渴思深鹿浦繫船逢積雨客窗拄笏見遙岑誰能縮地仙人術共  
聽花枝快活吟

安素齋詩爲高彥舉作

羲黃世云遠淳風浸彫零紛紛慕浮華形役心靡寧惟爾達觀者  
于物澹忘情天君常泰然月白霜潭清美玉非不沾沾之價連城  
向來莘野農釋耒卽阿衡磻溪釣魚叟飛揚乃如鷹湯文苟無遇  
耕釣畢此生懷哉古之人安素斯足稱

溪西小隱詩爲許君善作

馬鞍山南三十里鹿虞浦接橫塘水桃花兩岸小橋西蘿屋數椽  
修竹裏先生頭戴烏角巾青鞋不蹋東華塵扁舟溪上釣明月長

鏡隴頭鉏白雲客來看竹呼鄰酒客去對山開北牖琴彈古調每  
橫膝筆寫新詩長在手自言得句如得官富貴卻作浮雲看青山  
有約如不爽白鷗之盟奚可寒箕山久矣人寂寞眼底誰能如此  
樂文章多樂鸚鵡洲衣冠俱上麒麟閣老夫幽懷欲與論移家今  
近西枝村風清月白憶玄度莫怪杖藜來叩門

題孫彥學所藏江貫道清江汎月圖

吾聞老郭之傳許與江山水絕筆稱無雙此夜圖景江所作彷彿  
秋聲動林壑長江澄澄月在水遠山蒼蒼樹如蟻如此江山夜放  
舟若人真是逍遙遊邇來一百四十載陵谷變遷畫圖在世無蘇  
李兩詩仙赤壁采石俱蕭然老夫此興固不少解裘亦足供清醪  
出門有礙行且休不如燒香看畫樓上頭

雪山圖

憶雪山居擁寒雪夜半讀書聲未歇長林月在挂猿枝幽谷風生  
藏虎穴十年奔老避兵塵手持一竿滄海濱適因看畫長太息青



山頭上亦如人

普講主寓普度蘭若十一月望為游軍檢括是夕以稟稽蒙首露  
坐陸氏莊埃燼中怡然賦詩予嘉其言無瞋恚和而美之  
道人心如如說法無定處無喜復無瞋亦無諸恐怖初聞戎馬來  
杖錫出普度羣氓棄家走子女多失怙或遭刀箭傷或受係累去  
或作吞聲哭或為折腰步裸跣走且僵煙塵晝如暮師時在中野  
亦值一強禦猛若歌剎王殺佛渾不顧手持霜雪刀聲發雷霆怒  
惡狀冠羣醜丹青筆難措脫我僧伽黎問我石頭路搜索祇園金  
檢括青州布區區身外物自謂無足護把茅聊蓋頭露宿吟苦句  
干戈雖未息江山喜如故相期看餘春牡丹花貴富

龜巢彙卷四

龜巢彙卷五

詩

贈邵濟民

曲塘地仙居洗藥溪水香青衣兩童子玉杵搗玄霜玄霜搗來奉  
高堂老親食之壽而康天生便便貯書腹金匱石函書盡讀東南  
海上多名山山中采藥騎青鹿歸來濯足婁江水對坐青山隱烏  
几囊探藥物不論錢但欲使人無病耳有時彈琴鸞鳳音有時拔  
筆長短吟紛紛咤痔吮癰者從教別屋堆黃金

聞雲門張先生以烏軒焦尾居名文集賦二詩以贈

慈烏乳眾雛雛大羽翼成翩翩出巢飛啞啞繞林鳴得食不自飽  
歸以飼所生紛然同類中有此骨肉情余昔養親日瞻烏常自懲  
別來今白首見之雙眼青匪謂得所止丈人屋崢嶸為時獍梟多  
見烏如閔曾王孫金彈丸慎勿令畏驚

焦桐製孤琴舉世稱異材往非蔡中郎竟作爨下灰七絃繫朱絲

徽金軫瓊瑰知音適相遇攜上高高臺一彈廣陵散絕響有餘哀  
箏琶沸新聲瓦釜亦鳴雷天機妙循環復見泰宇開爾桐朱鳳吟  
靈風揚九垓吾今洗吾耳盤石坐莓苔

芝秀軒

猗與名門夙稱五常遙遙耳孫厥德復昌於粲爾子文藻有光如  
彼朱草畦畦其英自天降祥奕葉流芳匪曰芝秀仙人之糧林壑  
爾居奇芬遠揚雍公之扁金薤琳瑯於昭彼蒼福善孔彰俾而耆  
艾家有餘慶維來維仍永言弗忘

結茅東郭歲晚言懷八首

行盡難行路歸來父母邦溪山間杖履花竹小軒窗教子知一二  
抱孫成兩雙有時城府去深愧鹿門龐  
齷齪鬪巢老蕭條鶴髮秋過眉桃竹杖方領木絲裘補世慙無術  
通家憶舊遊幸然雙白鳥能與共滄洲  
淨埽蕭齋地書床一舊氈談經雞亦解迎客犬常先流水柴門外

橫山甕牖前春秋垂八十食粥了餘年

季子躬耕地寥寥禮讓風度遼歸老鶴遵渚集飛鴻土姓多相雜  
鄉音舊不同獨憐東郭外劍井氣如虹

官塘人似蟻環堵室如蝸白髮三千丈清貧第一家地鑪寒撥火  
雪水夜煎茶好客知誰至青鐙結細花

過客應相笑衰翁未得閒酒經方補註詩稿又重刪藜杖家家竹  
籃輿處處山數朝天色冷高臥掩柴關

故國歸來晚孤城草木寒親朋皆鬼錄鄉里少儒冠寫琬金鍾失  
沈沙鐵戟殘譙門斜照裏時爲一辛酸

臘月無多日春風又一年儘添頭上雪聊適盆中天彩筆題冰柱  
青衣送酒船晚來賓客散清興更悠然

和陳貳令遊善權洞

我昔陽羨遊春山聽茶歌別來三十載重遊竟蹉跎憑高每望碧  
湖外羣峯玉立青差我善權山水最佳處我公去知清興多來時



風景溢吾目不用登臨勞我足有聲之畫勝丹青曲盡物情人歎  
服天開地闢羲皇前神工爲誰開洞天邇來一萬八千歲金堂玉  
室居羣仙飛車鸞鶴久不見春去秋來只鴻雁青山前度汚狼煙  
從此四郊荆棘遍洞前玉氣金瀾漫仙家應作瑤池觀層巖巨石  
勢欲墮過者爲之心膽寒翩翩石燕黏翠壁飛來若與人相識馬  
如龍車如水尋常貴遊無足數令公清致似名緇一代風流繼支  
許樂哉山水三日遊忘卻世間千種愁昔人名句題玉柱今公健  
筆留銀鉤寄言武陵人桃源茲可求丹砂多與鍾乳雜瑤草不知  
蒲柳秋長橋無饞蛟南山無猛虎在處可遊觀政須人好古離墨  
鉛碑篆亦奇絕似岐山石爲鼓竹姑仙子明年春山僧煮玉邀嘗  
新哦詩暇日肯同去作詩更爲山傳神

鄉飲酒詩

并序

皇帝卽位之五年歲在壬子詔天下行鄉飲酒禮明年癸丑上  
日常州府太守孫公率僚屬行之儀物品節不約不侈省部主

事宋公實在賓位僕介而下者客凡二十七人執事者倍之其  
登降揖讓盥洗酢獻靡不如矩時某年七十有七亦得以布衣  
廁諸賢士大夫之列蓋有不勝其喜者率爾口占以紀盛集云  
一統乾坤大羣生雨露新君王能建極風俗易還淳鄉飲稽蒼錄  
天書降紫宸諸侯遵令典嘉讌展良辰豐舍簪纓集珍羞俎豆陳  
主賓儀秩秩介僕色津津椒頌三陽日芹香泮水春工歌聲律古  
揚觶獻酬頻聖澤沾羣品仁風播八垠賜醑無足比置宴豈能倫  
老我溝中斷諸公席上珍叨陪聆讀法喜獲坐連茵引領瞻西日  
傾心拱北辰知恩無以報三祝效封人

謝董明府惠炭

范叔寒多正不禁烏薪重惠比烏金賒來脫粟忙炊飯留得焦桐  
好製琴環堵一龕春盎盎麗譙三鼓夜沈沈研池雲起龍香暖寫  
我梅花鐵石心  
雨中懷秦主簿

東門之東西市西人家屋頭曉竹雞新年十日九風雨二老幾時  
能杖藜

懷儲教授

錦京春宴醉簪花步出都門駕小車七里八岡山店夜一甌風雨  
宿誰家

次韻言懷八首

親朋淪落盡故國似他邦矮柱龜頭舍疏櫺蚌殼窗鵲聲簷外喜  
鸞影鏡中雙兒女俱婚嫁逃禪笑老龐

江海飄零客煙塵二十秋逝將諸犬子歸老此菟裘夜雪圍鑪坐  
春風秉燭遊樵漁時其醉何異宴瀛洲

老我龜藏穴無毛可作甌裁詩閒未得強酒醉當先茅宇城闌內  
梅花臘月前幸逢賢太守鄉飲禮高年

短日經南陸嚴寒鼓朔風遍懷知己友長覺寄書鴻世態今如此  
人心古不同青天如可問飛步躡長虹

風冷柴門閉齋居縮似蝸小橋平陸里識字老農家野飯常留客

村醪頗勝茶早梅溪上折斜插膽瓶花

貧居家事少客去跋奚閒茅屋牽蘿補蘭階擇草刪雪添南浦水

雲暗北窗山孰謂寒如許雞鳴客度關

自分馮唐老誰憐范叔寒婆婆鳩在村蕭散鷓爲冠夢筆才華減

談經喘息殘昨來初度日淚落酒杯酸

神仙無足信何藥可延年素行多違俗丹心不愧天座留談笑客

門泊往來船吟雪誰相似襄陽孟浩然

送秦宜仲主簿之京

丈夫不灑別離淚林酒聊發玲瓏歌黃楊厄閏歲已久紅杏日邊

春正多子瞻手攜鐵拄杖太白足上金鑿坡鳳臺佳景必重賦千

萬寄詩來薜蘿

送主上人兵後尋叔父歸臨江侍養

青年未焚紫羅囊竹林之遊鶴鳳翔一旦身爲苾芻草半閒屋住



菩提場安知兵甲滿天地遂令叔姪成參商桑田既變家亦毀蒲  
履欲織親俱亡某邱某水總淪沒曰祖曰禰誰烝嘗象龍駕法力  
雖猛豺獺報本情難忘崎嶇行腳求從父殷勤稽首祈空王護身  
符出虎牢險忍辱鎧染狼煙黃長洲茂苑久爭戰殘山賸水方淒  
涼相逢不覺開口笑此喜自得安心方行人歎嗟擁長道畫鷁送  
將歸故鄉孤雲飛處是玉筍把茅蓋頭猶錦堂蒲羞可助潢潦薦  
木瓢共飲曹溪香愚觀諸公發歌詠力爲吾道扶綱常惜哉僧中  
有此郎疇能爲爾加冠裳於乎疇能爲爾加冠裳

次韻袁仲徵見寄并自述二首

城陰山作讀書堆書畫船從海上回春水泮池芹小摘秋風老圃  
菊重栽明時正用凌雲筆清夜還傾酬月杯百里相忘兩相憶詩  
筒好寄便鴻來

才華減盡姓名低賴有綸竿釣碧溪衰鬢幾莖蓬綴雪關心一點  
絮沾泥江山有助詩頻賦朋舊相過酒共攜金斗城東二三里道

傍茅舍似雞栖

借韻寄蔣以忠

江上羣山翠作堆江雲與客共低回黃楊閨後餘無厄丹桂天高  
孰爲栽飽喫河豚肥似乳醉看江水小如杯延陵祠墓春申巷我  
亦拏舟訪古來

借韻寄劉小齋

白練裙輕帽屋低綠陰庭戶瞰清溪詞章落筆如翻水篆籀藏鋒  
若印泥一昨論交心共許幾重飛夢手重攜絕憐鳳穴生雛好已  
向朝陽碧樹栖

謝許克敬六月惠炭

去年臘月人凍死我亦中夜眠不起家僮赤腳令采薪日暮歸來  
墮雙指德哉故人憐我貧於今暑月遺烏薪藥鑪喜得文武火茶  
鐺爛煮槍旗春禦寒有備心膽壯故態盡除寒乞相山空歲晚雪  
復來平地不妨深一丈烏薪熬成霞燄紅藜牀坐我龜巢翁灰中

芋栗薦村酒凍梨面作桃花容齊奴爨臘自奢侈野人炙背無足  
比融融之樂度殘年重賦新詩謝知已

病中蒙董知縣陳縣丞尹主簿枉顧且有白梨瓜酒之惠既而病  
愈賦此以謝

鳧鳥飛來野老家同僚先後佩飛霞共憐敗絮多生蝨爲問疑杯  
或飲蛇月俸分將官廩粟冰壺兼餉早秋瓜相如四壁生光彩試  
握霜毫答寵嘉

常郡泮宮詩

猗昔廟學悉燬於兵我侯作之聿觀厥成巍巍素王羣賢儼如侯  
殿侯庶豆邊於師師生有廬講道在堂飲社讀法有程有章我侯  
戾止若網而綱嘉乃進修戒毋怠荒宮牆匪高丹堊非侈道彌六  
合聖有遺軌侯揚天休嘉惠士子士風還淳庶見麟趾

武邑新學詩

邑有孔廟棟橈欲墮舊亦有學溼漏且痺唯邑長貳撤而新之清

廟奕奕門庶階墀聖賢明靈陟降在茲豐宇言言齋有詩書師友  
講貫朝斯夕斯射則有圃書或臨池惟林杏壇古音朱絲顧諟廟  
學治化之基沛澤菁莪比迹蒼姬絃歌武城異世同規

雜詩四首

積陰當元冬生生已機息陽孽僅豪髮梅花獨先得若人玩化機  
於此已深識攀條摘玉蕊吟玩意莫測唯復見天心所慮羣陰逼  
閉門夫如何君子政惕夕熒熒保養閒由茲見天德

山雲忽低徊四郊紛白雨老農荷鋤歸播穀桑閒語相勸一何勤  
一鳴再三俛老翁感禽意豈憚東作苦嘉穀已涵活尙待明日煦  
小兒未解事大兒遠服賈農器已可敝耰鋤在梁栢入室唯老妻  
出汲撫嬰甌

凜秋氣忽微徂暑已云往黃花異凡木所植本因壤稜稜清霜閒  
誰復見俯仰肅殺一氣中銳氣出其上強梁固可人傲德毋日長  
志士想邱壑老驥厭道長歸來已低徊但覺青山好至樂在天倫



不必事華藻交歡能幾何及今已衰老  
至老無修行善類日已疏生知愧古人  
宴安夫如何羣處不念德  
草草復離居春遊有餘興雜花滿郊墟  
網罟不能操空羨淵中魚  
青陽既開動草木方敷榮積雪忽如此  
豈不害含生大化無停機  
生生豈有已人生偶自徂豈不害天理  
援琴一鼓之坐致羸穢除  
吾分一天地積陰夫何如

二月二日漫興

東風吹散社公雨紅白花開爛錦雲  
時俗喜逢迎富日老夫羞作  
送窮文袂衣試著寒猶怯拄杖歸來酒半醺  
爲問驛橋楊柳樹送  
人多少去從軍

送安上人歸馬跡山

插竹山中偶出遊折蘆濠上卽歸休  
踞牀獅子聲方吼踏鐵龍駒  
迹尙留花雨六時紛似雪松風五月冷  
於秋客來認得南泉斧  
七十二峯應點頭

禱雨三首

黃梅落盡雨愆期太守憂農日皺眉  
滂沛一朝隨五馬四更三點  
謁叢祠

乞雨歸來雨滿天朝衣兩袖帶香煙  
綠蓑青笠人如畫多稼亭中  
看力田

一寸丹衷徹彼蒼不勞力士篆符章  
田家雨足豐年瑞官舍風清  
化日長

寄京口俞伯鎮兼簡江教授

飛雲妙墨來前日聽雨高軒憶妙年  
杜曲桑麻幾家在章賢父子  
一經傳杖藜欲去尋黃鶴  
裏茗相攜看杜鵑竹樹樓臺江總宅  
想應新築大江邊

壽董明府

臨汝佳山水鍾英賦厥初身爲百里宰  
腹有五車書見客無官况  
休衙只獨居壽眉揚喜色瓜代拜新除

次韻答性天之長老

時師與同袍有不相能者余乃為之解朝

道人踞狴牀眼明如趙州每言西來意爰及東家已白首林泉交  
清風江海秋法幢扶未起法鼓鳴未休本來無住著聊爾小淹留  
祥麟自獨角怪鳥從九頭大道自坦夷高堂豈伊憂他山石可礪  
直木枝有樛巴蛇或吞象鼯鼠能食牛賴有佛目明洞見鬼窟幽  
萬語歸一點坐斷聞思休

病中即事二首

何物青蠅滓玉壺製鞢飢鶻攫鷓鴣病軀痛作雷鳴腹垢面愁添  
雪滿鬢敲枕臥看殘菊在下牀呼取短筇扶客來與說塞翁馬笑  
指蒼天慰老夫

天方老我心如鐵誰謂讒人口鑠金覆轍始知行路險移家此去  
入山深瓶無儲粟還沽酒爨有焦桐莫製琴且喜日來聾兩耳從  
教邱蚓作龍吟

九月朔蒙周彥美詹伯遠蘇性可攜酒殺過城東草廬時余往潞

城未回次日賦此以謝

老夫一棹尋醫去佳客三人載酒過破屋茅飛鳥豈好衡門木落  
雀堪羅交情自古陳雷少世態如今鬼域多醉帽簪花開笑口尙  
須秋晚過西河

示子

憶年二九歲之吉朝賁闖門驄馬匹柏府遄歸鶚書出烏雛戀母  
情所鍾斂翮不附高飛鴻屢閱星霜怨樹風帶經犁鉏齋壯志欲  
邇青雲竟顛躓羞與腐草枯木比東家借燈夜繼日著書泚我潛  
夫筆數載兀如僧縛律書成兩鬢秋蓬飛出門復遇鍾子期麟膠  
為續焦桐絲旁觀方笑鮎上竹吳下風塵驚滿目蕉隍夢成俄失  
鹿蒼姬訖錄寶鼎移血流四海誅鯨鯢水魚漏網亦幾希全家幸  
爾歸鄉土欲學龐公遠城府骨肉遭逢射工弩臥疴兩月悟前非  
白生虛室春熙熙茹茶味亦甘如飴朝來起坐沐且櫛炙背茅簷  
抱雙膝七十八年聊紀述



懷吳中行

老我平生頗閱人，惟公知己絕無倫。別來夢裏常論舊，只說閒中莫厭貧。湖海氣豪心似鐵，庭闈親老鬢如銀。遙憐歲晚家居好，魚躍冰池入饌新。

寄熊元修

佳兒發軔之官去，名父居閒味道腴。詩卷賸添兵後作，酒杯常爲客來沽。江湖結社鷗盟冷，遠海還鄉鶴夢孤。煙水相望遠相憶，寒雲欲凍畫模糊。

寄武城知縣趙朋南

雙鳥鳧飛下赤墀，一行鴻澤撫羣黎。昔賢過化絃歌地，今代重興禮樂時。春雨桑麻如杜曲，秋風禾稼卽豳詩。槩滄水飲持三尺製，錦功成聖主知。

寄盧公武兼問殷孝伯安信

憶言雨別去途難，喜得雲歸舊谷盤。郡乘手揮狐史筆，齋居頭戴

鹿皮冠。草生林館皆書帶，竹老溪園可釣竿。獨念咸陽殷博士，有無黃耳報平安。

送殷孝伯教諭之咸陽

遠遊自是男兒志，特立正當強仕年。衣上密縫慈母綫，擔頭輕束廣文氈。春秋三傳繼絕學，畢郢諸生得盛傳。老我也須飛夢去，振衣同陟華山顛。

護國寺對雨

去年梅熟雨蹉跎，豈意今年苦雨多。偶食僧廬苔作脯，忍聞田舍麥生蛾。山禽滑滑嗁雙樹，簷漏浪浪注九河。往事莫論魚腹恨，近來平地亦風波。

和林韻

黃梅落盡天猶雨，白日晚來風更寒。老去甚慙詩興少，病餘猶喜酒腸寬。舟中自古有敵國，李下從今莫整冠。蒲屋紙窗明似雪，政須僵臥傲袁安。

送性天之長老兼簡初士元大方厓

方坐天監古道場遽辭雲水別河梁蕭蕭木落山中雨去去孤篷  
漏上霜白雪詞高人寡和黃花秋晚自餘香南能北秀煩相問爲  
覺安心第一方

徙居橫山口號四首

爲愛橫山山水清山前築室小溪滌老夫枕石看雲臥兒輩求田  
候雨耕古井寒泉龍有宅孤村夜月犬無聲廿年兩眼風塵暗猶  
喜如今見太平

三農閭伍其煙霞數口清貧第一家瓦釜煮糜燒榭葉布裘添絮  
著蘆花交遊總覺鄉情好吟眺偏宜野景賒不見高人王八百浪  
傳仙井委丹砂

清夢尋常繞薜蘿白頭今日此婆娑窗含風路秋容淨簾捲林霏  
爽氣多浮世百年生處樂青山幾度醉時歌莫愁猛獸藏林樾郡  
有劉昆必渡河

山北山南地盡耕人家祇欠讀書聲丹楓似我衰顏醉黃鶴如仙  
瘦骨清吳越喜逢連歲稔朱陳多續舊姻盟客來莫厭貧留宿新  
種梅花好月明

次韻答袁子英見寄

萬國風塵百戰餘一襟冰雪五車書朝廷未賜延年杖鄉里聊乘  
下澤車鐵網珊瑚遺渤海玉峯瀉瀉異伊閭長門賦直千金貴詎  
信相如筆久虛

上臺官

經鉏子爲屯田去罄室翁歸擔石無八十衰顏頭戴白一雙昏眼  
淚含珠鵲寒空繞無枝樹烏餒徒生返哺雛匍匐哀鳴臺閣下尙  
期甘雨活焦枯

挽謝天民二首

細柳營中玉一株狂飈吹折暮春初杜鵑繞樹嘯紅血知爾思歸  
恨有餘



三十青年氣食牛貂蟬未得出兜鍪故園芳草春如海誰謂王孫不復遊

題鄧九淵縣丞白雲親舍圖

若人自是青雲器方爾浮遊如展驥白雲親舍作畫圖寫我思親未歸意螺山隱隱雲央央吾家宛在山之陽西天十里水天碧北堂五月松花涼堂上慈親壽觴舉堂下諸孫綵衣舞賴伊黃耳解傳書道我赤心方報主主恩方報報親恩望兒無勞親倚門直待平反歸報喜卻到青山白雲裏

和宜興鄧縣丞出郭二首

離墨山前芳草多馬蹏曾此幾經過  
國碑文字無人識風雨銷殘近若何

民有歌謠吏不譁村莊兒女簇如花  
深山處處茶煙暖小市家家酒旆斜  
楊柳陰中頻駐馬杜鵑聲裏亦忘家  
祇緣報國心殊切更喜流年鬢未華

金牛臺送長史仲埜

清明雨晴花正開折花送客金牛臺  
金牛遺跡不復見但見塵埃野馬去  
復來臺前鶴溪貫洮瀕湖綠野平如席  
臺後羣山倚大江齊梁故里迷榛棘  
登高望遠散離憂超然如在崑崙邱  
爲問堰頭楊柳樹頗常見有此客不  
五年參贊二千石飲冰滄檝持三尺  
簿書肯綮游刃餘白雪詞高人共惜樓  
船沂流出京口聞官放水蛟龍吼青苔  
絕壁爲留題名與此臺俱不朽

贈眼科醫張嘉甫

重瞳天子眞天人擇醫乃得天麒麟  
金篦不刮眼中膜家有異藥能通神  
璇霄沆瀣和玄屑洗滌靈臺煙火熱  
刀圭微入阿堵中夙養浮雲出明月  
天顏咫尺頻爲喜白金紫駟恩甚侈  
豈無太史載冊書繼美倉公上池水  
老夫一目雲模糊扶憊遠來煩掃除  
京華道上鬼挪揄爾詩將比蛇銜珠

贈周實翁

鬢鬢如戟氣如虹芳茂山前矍鑠翁可惜一雙青白眼看雲孤臥  
北窗風

兒子木蒙恩釋屯種而歸詩以志喜

老鳥失孤雛噉號驚臺前鸞鳴徹九關德澤降自天鐵籠放雛歸  
渴飲劍井泉井泉非不甘飲之不下咽念我老病烏肺肝煙火然  
返哺知幾時骨肉且生全牖戶尙綢繆羽衣復翩躚眾鳥喜聲集  
卉木回春妍援筆紀離合執徐洪武年

吳中行惠方竹杖

往有方竹杖化龍歸混茫吾知龍之靈知我力尙強今年八十餘  
舉足勢欲僵一目眇數月白日如昏黃出門多棘榛况復畏虎狼  
感君扶持意以杖遠寄將棱棱七尺軀材拔宛種良孤根斬鐵石  
老節凌風霜此叟性惡員爲爾重激昂氣類喜相得顛危賴周防  
秋風黃葉村春雨烏石岡挂我沽酒錢時與游醉鄉赤藤含赧色  
青藜失輝光覩物思故人晤言未渠央

卽事二首

方竹過眉杖單紗墊角巾室中無長物林下一閒人

北牖青山近南風未夏涼草蔬留客飯木榻似僧房

余之死欲速埋素志也今偶得小邱於橫山之陽竊而甃之余他

日蓋棺埋可速矣倚我長鑣歌以自適

枯蟬蛻殼欲化老蠶作繭自纏一笑不拘風水穴藏姑待天年

阮孚著屐未了劉伶荷鍤長隨便作松根糞土也勝兵前肉籬

次韻陳庠仲見寄

老去衡茅寒到骨兒能負米慰愁顏峽舟風打前時覆塞馬天教  
此日還冰雪泠泠龍井水煙霞隱隱鹿門山芙蓉池上鷗波闊殊  
勝雕籠鎖白鷗

贈陳谷禪老四首

雨地叢林瓦礫場法幢扶起破天荒木魚呼粥舖禪侶蔬筍香來  
八九霜



選佛場開金碧廬雲蘿煙樹一村無客來會得安心法莫向江邊更折蘆

布金人比獨園多金色山林作補陀童子畫沙成佛去蹶泐豈足擬鯨波

庭前柏樹解通禪洞裏桃花小更妍愧我梁園詞賦客鬢絲風裏煮茶煙

送孫太守奔喪歸濟南

大江之南煙水秋瀟湖船送孫常州甘棠遺愛召伯去黃楊閨餘  
丁母憂五年組綬忽縈經四郊襦袴多歌謳兒童騎竹忍相送父  
老杖藜爭欲留孤雲宛在長白外清濟如瀉銀潢流北堂護草秋  
寂寂西風落木寒颼颼堂前稽顙獻蘋藻壠頭灑淚沾松楸誓言  
永佩阿嬰訓酒戒不受傍人咻蜚英久矣徹斧屐展鸞鳳暫爾棲林  
邱潁川太守已台鼎碧山學士皆瀛洲政須大木成巨室豈容野  
水橫孤舟君親俱報志願足几杖卻歸封素侯

送源無竭回金山

龍游堂前獅子牀坐分風月今幾霜千金一壺有妙用三吳百越  
聊逢場黃花鬱鬱秋雨爛白雲悠悠江水長重摩松頂作受記毋  
令黛色參穹蒼

復愁

茅茨數家黃葉村霏雨一月溪水渾慈鴉種麥日未暝猛虎下山  
人閉門

江陰陳漢廣爲北平府指麾使司知事隨例免官

黃金臺上古賢士竹帛垂名世稱美碧油幢下今幕賓風雲際遇  
與同倫清冰玉壺炯胸臆鐵箸鑪灰妙簷畫殷勤報國傾丹衷雪  
花如席不知寒扶搖方展雲鵬翼翩然退飛隨六鷁且喜高堂慰  
老親毋勞黃耳寄書頻澄江如練山如掃金菊芙蓉秋正好人生  
三樂古難全熊魚兼得真自天塤篋迭奏壽觴舉綵衣褊褊膝前  
舞富貴故鄉朱買臣風流鑑湖賀季真一經已勝千金產况有牙

鐵三萬卷應笑龜巢鶴髮翁小兒只作識字農脫身顛厓猶自喜  
殫力犁鋤供菽水尙期東壁借餘光讀我兔園書滿箱  
重遊虎邱寺

不謁閭邱謁虎邱幅巾藜杖興悠悠飄蕭白髮三千丈來往青山  
八十秋寶地近曾爲戰壘劍池今復屬禪流老松知我題詩意也  
學生公石點頭

過吳門

二千年外興亡事試爲吳儂問老天西子曠眉眞可醜東門抉目  
竟何愆荒臺走鹿巖花笑殘膾成魚野史傳買得綠樽堪晚酌且  
將吳水煮湖鮮

次韻答姜天定二首

白首歸來山澤臞山行依舊不須扶十年兵革遺黎少幾處沙場  
戰骨枯癩去效顰隨醜婦安知起甕到浮圖求詩雖厭雞林賈猶  
勝門前吏索租

詩筒寄自清秋晚書印封來白絹斜一子幸能歸負米雙瞳可奈  
翳生花居貧不病知原憲弔古能文愛李華何日細論今古事荒  
村獨樹老夫家

送任叔正歸上海

猗與子任子唾珠腹琅玕一登龍虎榜卽著獬廌冠陞辭蒙主恩  
家居奉親懽行囊負祿米歸佩紉幽蘭秋月釣龍江春雲耕鳳山  
藥室費長房木榻管幼安逍遙烏皮几神仙紫金丹爲時療民瘼  
於親駐童顏葵心抱忠赤萊衣舞斑爛棲遲雲林下放浪湖海閒  
訪舊過滬浦尋幽出吳關退鷁翅方斂盟鷗心共閒樂哉壺中天  
虛白泰宇寬

送董經歷奔喪歸太原

清風蓮幕諸侯客白雪麻衣喪母還扇枕未能償素志倚門無復  
見慈顏四千里外迢迢路一片雲邊莽莽山只恐鶴書催入覲又  
隨鶴鷺造朝班



西宿丁堰贈江陰王主簿

五月六月涼如秋昨夕今夕雨不休屋山雷撼黑風起漕渠水溢  
黃河流河濱之陶萬夫聚誰其董之暨陽簿羹牆祇見烏曹磚飲  
冰食槩忘情苦老兵擊柝天未明隔水又聞搏埴聲扁舟與盡不  
往見惡詩聊寫來時情

夏五之初偕江陰張希尹等過鄒忠公墓卽事口占以寓感慨并  
促郡守張侯弔墓之行

青山門外羊腸路走謁道鄉夫子墓向來滄海變桑田翁仲漂零  
竟何處麗生之碑高十尺頽若銅駝臥荆棘牧童敲火未足悲正  
恐瓜分擣衣石使君五馬來何時摩挲細看黃絹詞五丁一呼爲  
扶起隴頭草木皆光輝予方與客酬清沽白鶴飛來作人語使君  
爲表鄭公鄉專美那容孔文舉

代簡張希尹

余生寡諧俗老去得知已晤言固已晚莫逆良可喜聯翩諸侯客

寂寞著書事夜分青藜火晝並烏皮几幾回論班馬一笑觀亥豕  
煙雲揮灑外風月吟嘯裏蚺杯酌流霞獸鑪熱沈水佳哉水調詞  
清我塵俗耳朱絃聽者希白雪和能幾別來懷合簪夢見承倒屣  
帷林大江邊瓢巷橫山趾秋風落梧葉甘雨熟菰米相望不三舍  
相過堪一葦詩筒繼元白通家猶孔李沉於阿戎談亦與諸任齒  
尙友古之人厥德薰晉鄙

雨中懷任義甫

十日秋霖未肯晴石尤風作虎嗥聲東門父老應相問何事龐公  
也入城

蚺杯

溝南老仙出杯孔奇酌言詢之杯從何來匪兕而觥匪玉而卮不  
瑯不鏤不覆不斂謂爲蚌耶鷓胡弗持謂爲蛤耶奚爵而爲測海  
之蠡其殆庶幾老仙笑言子宜背窺瓦壘之文匪蚺而誰水族之  
秀實生天池昔逢羽人觀乃朵頤麴蘖爲糧華陽同歸轉客我者



廿年於茲如李白氏杯鸚杓鵠醜風酬月朝斯夕斯夫亦何幸數  
從宴娛百憂俱忘是用作詩

次韻管伯齡見寄三首

笠澤臞儒比列仙菊潭秋月解延年每懷遠送江頭別喜得安書  
雁足傳赤米白鹽瀕海地香橙紫蟹早霜天客來賸說幽居好日  
日題詩思湧泉

滄洲舊隱宅江東白首忘饑似海翁金菊晚開香澹澹玉山孤立  
勢崇崇通家子弟連年別愛客情懷往日同歲晚欲尋安道去扁  
舟當趁落潮風

郇公五朵雲天風送來前憐我落巢兒覆盆重見天三復誦佳句  
一如飲甘泉金篦刮吾眼華津生吾咽重念謝公險毛骨仍凜然  
金鑲雖被毀璧歸猶幸全兩鬢雪飄蕭雙袂風褊褊寒蛩語音喜  
秋花笑容妍答詩報君知今年勝前年

贈刊字闕士淵

憶昔趙文敏公之寫天下碑鐫字獨稱茅紹之紹之之妙在何許  
八法靡有秋毫遺嗟哉文敏不同世抱藝如茅誰品第斬蛟橋下  
溪水清鐵筆淬來鋒甚銳篆隸真行章草書銀鉤鐵畫寫璠璣天  
然筋骨見顏柳假手補戈真是虞文章太守眼如電語重兼金數  
稱羨青年正可爲時出山居聽泉何足戀羣公將勒燕然銘中郎  
要令傳石經老夫爲伊雙眼青鐵筆於今錚有聲

寄盧公武舍人

投老鶴溪垂釣緝遙憐鳳池掌絲綸鞞霜待漏朝會早墨雲染翰  
詞頭新石麟自是天上物金薤散作人間春尙須鼓吹振六籍蹴  
蹋班馬追楊荀

送魏同知陞遷安慶郡太守

郡守坐分金斗月朝鞞今滿玉階霜一襟耿耿留遺愛五馬駢駢  
被寵光官誥疊承恩渥重御屏新錄姓名香可憐八十龜巢老尙  
欲攀轅立道傍



送史宗儒歸省親

北風浪號霰撒粟洮湖白浪高於屋游子扁舟歸省親行囊賸有新珠玉舟行到家除夕前高堂守歲開長筵斑衣捧酒爲親壽河清復見昇平年相門出相今非昔文采風流還藉藉一賦可值千百金貧似相如永岑寂窮居我亦四壁空吾兒鉏經走西東煩將此意問若翁名教之樂將無同

寄金華府尹經歷

方伯方宣化賓僚喜得人幕中勞贊畫胸次有經綸劇郡征輸夥清朝紀律新轍魚須救涸尺蠖正求伸月湛雙溪水風生七邑春簿書雖雜還矩矱自持循耿耿存虛室昭昭對大鈞宦成防小怠德立豈無鄰遠別長相憶前言敢重陳菲葑如可采薑桂有餘辛白首龍鍾老滄洲寂寞濱歸鴻書可寄千里見恣恣

送田副使父憂歸

若人自是青雲器九萬扶搖尙垂翅高秋沆瀣生碧霄搏入詩脾

作清氣頻年坐此塵土場纖埃不滓芙蓉裳豪吟接迹李太白柳金梨雪揚芬芳詩成落筆蛟蛇走多入雞林賈人手今朝送別毘陵城折盡西門道上柳東風雨晴花錦香京華到時春正長上林一枝栖鳳凰鳳兮鳳兮鳴朝陽

送張常州奉旨入覲

白髮田舍翁清曉何跚跚送侯入朝覲扳轅吐哀丹去年穀半熟藜藿度歲寒春來理農事豈憚稼穡難采薪供陶冶四境空榛菅執柯涉重湖荆南斫青山非無犁鉏具靡暇畎畝閒烏曹事未已綠野多荒閒願侯念冰兢爲民徹天關樵斧容暫息農晦力可殫民歌岐麥秀古今兩張堪侯策五馬還並載青史看

送王起東御史丁憂起復赴京

君親恩重生當報忠孝情移義與俱冠豸威名傳舊日攀龍寵渥拜新除玉階雲集來儀鳳錫谷人稱返哺烏折盡驛橋飛絮柳親朋相送喜何如

送陶孝思赴召

夙學多才思崇文際盛時鶚書騰日下鵬翮奮天池發軔青雲路  
承恩白玉墀泥塗龜曳久阿閣鳳巢宜繩準持三尺絲毫畏四知  
佩韋遵古訓介石蹈良規比德雲暉草同誠向日葵往哉行所學  
動必慎其儀器作璠璣美文成黼黻奇遺芳流汗竹無負故人期  
張知府命子送祖考墓碑還鄉

名門父子傳一經儼如韋賢有玄成從親宦遊養親志念祖喜蒙  
封贈榮潛德幽光恐磨滅伐石南山鐫墓碣宋公文章踵韓柳史  
公法書追褚薛龜趺螭首重摩挲舟車載去勝橐駝四千里外薄  
炎海佳城埋玉山蹇我墓前翁仲看石立面帶煙霞含喜色九原  
精魂斯焜煌百世雲仍益輝赫八月九月秋風清綵衣褊褊趨鯉  
庭悅親細說鄉里情老夫亦來堂下聽

和賈教授還鄉

試看一簣可爲山千里程從跬步閒奴印正須金斗大還家未入

玉門關泮芹過雨香堪摘壇杏無風意共閒我欲中秋聽琴去扁  
舟艤棹後河灣

寄賈教授相期詣鄒墳祭埽

題詩郡圃景鄒亭澆酒林莊下馬陵白草西風秋莽莽青山北郭  
路登登柱頭且看誰爲鶴驥尾何慚我附蠅坐待秋涼行有日老  
夫扶憊策烏藤

道鄉祠堂詩送張縣丞

道鄉祠前松柏蒼清氣凜然知幾霜伏蒲一疏吐肝膽汗竹千古  
傳芬芳此去長安日月近且喜高秋風雨涼立朝願學子鄒子他  
年使作知恩堂

題許別駕雪山圖

南山雲起連北山樂天賦詩心共閒東方月出照赤壁子瞻倚歌  
情甚適今公畫圖誦雪峯託興應與雲月同瓊林玉樹絕纖滓蓬  
婆城外山相似羣邱角立白龍堆饑寒喜無桃與哀蹇驢滑澗山



前去絕似灞橋人，覓句公餘展卷巖。  
電流襟懷化作水，壺秋楊家  
冰山無足倚，何如坐對茲山隱鳥几。

同友人祭鄒墓各賦詩一首

先生高冢麒麟臥，令子峩冠獬豸威。  
汚玉青蠅除穢迹，銜書紫鳳賜恩輝。  
八千里外甘泉竭，三百年來世澤微。  
瀉我一杯寒澗綠，臥碑扶起立斜暉。

送楊通判知蘇州府

延陵父老攀轅別，吳郡兒童跨竹迎。  
功覆斯民推德厚，秩遷藩府重恩榮。  
五湖秋水清堪比，三讓遺風俗易成。  
遙望虎邱山下月，餘光還可到柴荆。

寄張熙載問疾

溝南隱者敦同姓，每說相知見肺肝。  
名似項斯詩句好，腰如沈約帶圍寬。  
一江雪浪潮平岸，十日秋霖雨作寒。  
珍重齋居足怡悅，玉枝無汗竹平安。

和賈教授詠懷

兩袖西風獨倚樓，一天秋色斷虹收。  
水村霜葉紅於染，山市煙嵐翠欲流。  
眼底看來興廢事，胸中銷盡古今愁。  
莫嫌苜蓿盤無味，喜有葡萄酒可篋。

重九次韻

石潭無菊比南陽，老我三千白髮長。  
九日正須多買酒，一錢何必用看囊。  
自憐身健茱萸紫，更喜盤餘苜蓿香。  
早起東窗拄吟筇，坐看紅日上扶桑。

又和寄秦宜中

高堂燕客似高陽，醉筆題詩興味長。  
戀戀多情舊紗帽，滔滔無底老書囊。  
銀瓶萸酒舫船滿，玉杵橙齋蠓斗香。  
應笑陶潛空抱菊，西風繞屋叫枯桑。

贈辛彬甫

有客有客雙眼青，婁江山水鍾其英。  
十年足不出戶庭，手披韋編

不暫停案頭照盡練囊螢先天後天見日星百家喧囂無足聆九  
師亦以蠡測溟著蔡之妙窮杳冥語人吉凶影隨形滿庭書帶生  
香馨一簾秋色風泠泠去年抱琴來野亭古操爲我作水伶我方  
采樵如負苓相與劇談洗心經呼吸沉澁食楚萃一掃世味羶與  
腥有時醉我蘆花汀客來買卦呼不醒惜哉鳳雛五色翎翩裊何  
日儀虞廷鳳兮鳳兮請試聽黃河水清三千齡

上錄囚官

淵水沄沄其類始夷孰恤株連維皇念茲曰子憲臣風紀是任擇  
賢貳之皇命是欽繡衣煌煌我鷹有章有秩其儀生人之望相彼  
圓扉胥靡孔多滅耳弗戒君子謂何國有著令慮讞以時炎風方  
興輶車載脂緬維而初鍛鍊以成文致則有使君明明三木弗加  
其隱在子嗟爾長人相彼爰書相彼爰書吏或並緣若人何辜冀  
爾生全既易我心聰以聽汝汝則吐實曾莫我以獄無大小我必  
以情匪子汝私天子好生天子好生恩柔爾肌懸象在魏曾汝莫

知明明使君既安且和編人稱平是用作歌  
婁曲書堂

汨彼婁水東連於海爰有幽貞居婁之匯蜚舟岸泊婁人紛拏幽  
貞有子劬書厥家晨雞既鳴汎埽室堂羞我甘輒奉持趨蹌我經  
我史如耕如桑我服其勞罔敢怠荒黍稌有田魚亦有梁味道之  
腴游藝之場曰父與子欣欣樂康其樂維何匪人伊天憧憧往來  
誰其語旃

烈婦歌 并序

婦周氏吳郡太倉人至正丙申其父以義兵元帥貪暴將殺之  
謀泄而舉家被害帥之子悅婦少艾誘爲妾不從痛罵而死鄉  
人義而哀之爲之構祠立碑會稽楊公廉夫爲文且屬江西陳  
季子索詩以著其事

陳君手持烈婦碑勸我爲作烈婦歌人生自古孰無死烈婦之死  
名不磨本是東滄小家女粉黛不施眉目嫵父憐母惜忍利離納



壻於家半年許阿耶從軍氣頗麤欲殺不義奔京都手持芒刃機  
不密身落禍坑家乃屠繡衣郎君元帥子少年絕愛傾城美願言  
攜手與同歸卽免梟首尸諸市郎君滿屋堆黃金安知難買烈婦  
心耳邊言逐飄風過腹內怨含滄海深罵聲不絕郎君怒馬上揮  
刀斫頭去雙鸞羞靚青銅鏡全家甘赴黃泉路娟娟肌體嬌如雪  
烈烈肝腸堅似鐵一團冤血注婁江至今流水聲嗚咽男兒讀書  
峩冠巾偷生或忍忘君親奴顏婢膝曳朱紫得不愧此裙釵人嗚  
呼得不愧此裙釵人

寄倪元鎮

時辟兵吳江

詩中有畫畫有詩朝川先生伯仲之襟懷不著一事惱姓名唯恐  
多人知竹籜裁冠晨沐髮蓮蓬洗硯晚臨池數年同飲淞江水明  
月清風有所思

淵明采菊圖

晉室之危一木叵支我思古人孤竹夷齊彼薇西山我菊東籬薄

言采之可以樂飢秋日淒淒卉木具腓匪菊之芳吾將曷歸

倪元鎮過婁江寓舍因偕智愚隱遊姜公墩得如字

秋暑賈餘勇懷抱方焚如故人江上來風雨與之俱遂令沸羹鼎  
化爲寒露壺幽尋陟崇邱飄飄素霞裾同遊得名緇吟嘯興不孤  
大樹倚高蓋小酌歡有餘三江五湖上羣峯開畫圖獨憐我鄉土  
煙塵尙模糊安知艱虞世得此暇日娛一笑百慮忘松風奏笙竽  
和陳維寅蘇杭懷古各三首

幽尋度香徑遐思倚琴臺烏喙嘗膽日雉妖捧心來春風煽濃豔  
滅國輕於埃

憑高望潮海白馬還來無一杯弔忠魂江風爲號呼悲哉抉眼地  
碧血化苔蕪

丹青讓王宮松柏季子墓黔黎奉烝嘗春秋幾霜露胡爲今之人  
無復繼高步

寶鼎移炎祚降王赴幽都遂令虎林人斯免馬邑屠可憐金盃出

嘯殺稽山鳥

輦路土花碧金門芘芻關浮海兩龍馬一去不復還蕭條鳳凰嶺  
過客忍躋攀

襄樊怕人問威福得專行九重倚師相十年誤蒼生銅駝臥天街  
今雨淚縱橫

遣興和馬公振韻

馬圖無怪出河遲世事方如理亂絲蓮葉有巢龜已老竹花無實  
鳳仍飢簾邊艇子供垂釣林下樵童許看碁苜蓿一盤三丈日山  
妻白首案齊眉

顧仲瑛臨濠惠書詞甚忼慨詩以代簡

濠上人來書數行開緘如對語琅琅酒杯已辨弓蛇誤藥杵無勞  
玉兔將少待天公舒老眼賸收雲母束歸裝舊家池館花狼藉春  
水依然綠漫塘

邱氏節孝詩

君山削蒼珉江水清若空爾姝生其閒山水秀所鍾八鸞鳴蹶里  
桃李正春風楚楚繡羅襦娟娟玉芙蓉蒼黃走煙塵竟作秋霜蓬  
浮苴樓海壖賴有良人從良人遽永訣跪乳遺兩踵還家依二親  
親室四壁空黽勉薪水役辛勤機杼工十年守孤鐙朝夕滌灑供  
粢居親所憐苦志恐莫終微言示鸞膠慚憤面發紅鬢鬢落霜刀  
誓言死吳淞慈親乃噬臍肝膽照秦銅陵谷一變改故鄉歸路通  
扶攜還里居失怙抱哀恫復爲銜土烏埋玉掩斧封服勤奉慈闈  
愈久情愈隆手和熊膽丸課子學業攻其姜柏舟後志節誰與同  
德哉文定公世澤源無窮

祭顧仲瑛詩

嗚呼玉山翁先世吳右族生逢全盛時當路屢推轂辭榮樂蕭散  
竟蘊石中玉早持萬金產轉手授家督不爲五嶽遊家園蒔花竹  
讀書數千卷旁覈聃與竺非無酒如澠過客佳乃肅徒見駟馬車  
未若一儒服緇黃粲然者待遇情亦篤常言性嗜詩雋永過梁肉



興來挾雲漢毫端注飛瀑詞林采英華琬刻播芬馥詩名滿朝野  
嘯傲心自足世故一變更十室九顛覆幽棲綽山下人擬王官谷  
時余避難來顛顛如病鵠踵門通姓氏一見已刮目夜飲嘉樹軒  
明朝杯又續高堂桂花秋金釵翦銀燭雙歌掉舫船洗我愁萬斛  
一留兩月餘坐客常五六寫圖紀觴詠墜水亦有曲連牀可詩齋  
清話屢同宿擇鄰爲移家歲晚安且燠奈何鼙鼓聲又若雷震屋  
婁人悉驚散我亦猿失木萍漂甫里東賣文如賣卜感翁數相過  
餽問慰窮蹙翁亦客構李遠避賦蛇毒山川鬱相望詩筒時往復  
陵谷復一變翁歸理松菊松菊理未能茨藜俄困辱余舟傍笠澤  
訪舊宿西塾夜深屏輿隸促首話心腹春風舊池館荒煙秋草綠  
朝廷更化初召役事重戮挈家赴臨濠星言去程速送行愧鄒游  
口占謝龜縮詩去秋復春客來書滿幅念我及兒輩舉室蒙記錄  
因言多疾疢經年在牀褥鬱憂屢驚嚇使我長齧鯨尙須手顛定  
親札寄篇牘安知踰月餘遽爾聞不祿初疑傳者僞細問淚盈掬

嗟余老異鄉知己失鮑叔蕪詞敘疇曩悲吟甚於哭神交死如生  
歆此杯中醪

題杜拾遺像

國破家何在窮途更暮年七歌同谷裏再拜杜鵑前胡羯長安滿  
騎驢短褐穿畫圖憔悴色猶足見憂天

遣悶

乾坤如許大老我此江濱無酒可留客青山應笑人幅巾方竹杖  
芳草落花茵賣得長門賦相如未是貧

聽雨宿縣學齋舍

客來帷林候漁父鬢舍坐聽三日雨諸生讀書喧兩廡商羊飛來  
立當空雨聲書聲雜蛙鼓蚓歌似亦諧宮呂青苔上階菌生柱敗  
壁淋漓籀文古齋僮不敢開戶牖風撼庭柯嘯飢虎南山石爛成  
糞土天漏誰能爲天補去年旱魃走吳楚田家什九悲魚釜麥秋  
一飽方自許莫教又作飛蛾舞

雲文閣爲鄒伯常作

光範門前人似蟻君獨幽棲微不起西窗拄頰看青山東閣垂簾  
熱沈水非煙非霧非霞氛欲斷復續何氤氳若有龍眠博山底海  
嶽清氣噓成雲香凝燕寢清晝寂庭竹森如列修戟白衣蒼狗從  
變改天上人間迴相隔咄哉權門銅臭兒臍鐙將然恬不知何當  
招之入爾室三薰三沐聆吾詩

古鼎歌

蘇州萬壽寺舊藏古銅鼎識者奇之其識有周康穆公冊錫寶  
用鄭伯姬等語大德中任陽謝氏嘗欲以玉杯易之時住山默  
翁師不從後謝氏爲構佛殿乃予之至正丙申謝遭兵鼎因失  
去甲辰夏四月愚隱智公復得於軍人之手耆舊聚觀皆曰我  
山中故物也既而出鼎見示并述其由索詩以紀之

碧雲師著金伽黎空王殿前龍象隨當階一卒送古鼎狀若獻寶  
波斯兒羣緇聚觀方丈室中有老僧前致詞云是山中舊時物立

誦款識能無遺惟有臣寰紀君賜用顯厥考鄭伯姬文詞詰屈錯  
盤詰字體隱伏蟠蛟螭蒼姬訖錄世屢改不知何代來於斯謝家  
寶樹修佛刹巨構賈與連城齊鼎兮鼎兮什襲去歲經六紀今來  
歸師聞此語重太息兵火連年炎九域金鐘大鏞棄道傍總若沈  
沙銷折戟珠歸禪月獨無恙護持信有天龍力摩挲兩鉉溼煙霧  
錯落丹青映金碧光如摩尼含五色高比珊瑚長一尺嗚呼羲軒  
之鼎莫可求禹鼎亦已淪東周世所用者非爾儔或膨豕腹仍包  
羞調羹爾無與覆餗爾不憂歸來兮歸來北山兮菟裘汾陰自有  
爲時出切莫放光驚斗牛

戲綵堂

宜興主簿許克敬念曾祖法曹公爲堂奉母夫人馬氏相國馬  
公廷鸞爲大書戲綵二字名之至乃翁復巨構以奉其母今克  
敬念斯堂與親俱亡哀思有詩且持卷以求紀載按許氏家譜  
自南唐紫金光祿以下擢科第者三十餘人克敬亦洪武進士



南唐故家世軒冕歲久雲仍益蕃衍樂平山中戲綵堂碧梧鈞翰  
攜華扁當年甲第連青雲過庭趨踰俱鳳麟二母高年俱近百兩  
朝紫誥金花新累稠列鼎鳴鐘鼓綵衣福禔堂上舞架書連屋笏  
滿牀折桂多從廣寒府昨來海變桑田日四海狼煙暗如漆山中  
舊宅化焦土孤兒歸來淚如雨八珍之味肉臺盤何如啜菽盡親  
歡千金之裘走南北曷若斑衣戲親側肯堂肯構固不難去家千  
里方居官出門羞見羔跪乳故篋尙餘熊膽丸老夫知公念親意  
不爲高堂燕雀計願言長佩蓼莪詩圭爵榮寵繼先世

兵後過季子祠

延陵采地荒榛棘延陵遺廟成瓦礫延陵野老歸弔古獨立斜陽  
長太息塵埃野馬紛滿眼城郭人民總非昔共惟泰伯吳鼻祖三  
讓高風冠千古周衰列國俱戰爭卓爾雲仍踵遐武去國躬耕江  
上田日附子臧非浪語天倫義重情所鍾屹立狂瀾見孤柱此義  
孰可比采薇西山孤竹子此情知者誰獲麟老筆十字碑德音寥

寥二千載陵谷幾番經變改江南近代淫祠多梁公不作可奈何  
於乎祠堂之毀還可屋禮讓風衰較難復漢家兄弟歌布粟唐家  
兄弟相屠戮何當大化一轉轂於變澆漓作醇俗九州八荒春穆  
穆泰伯延陵斷絃續芳也未死當刮目

劉龍州墓在崑山慧聚寺後楊鐵崖借應芳及諸士友弔祭而作  
目光如電氣橫秋北望龍沙萬里愁匡主首陳天下養和戎深爲  
國人羞獨園埋骨黃金地上界修文白玉樓一代人豪今寂寞春  
風蘆葉自汀洲

送慶德謙知州漕運之京兼簡陳子山學士

十三萬斛葑田珠一帆南風到直沽天上夔龍應爲喜海中蛟鱓  
近來無山林久臥頭垂白雨露重承紱已朱寄語玉堂陳學士楚  
狂顛悴老東吳

簡淨慈寺顏長老

時浙省丞相達失帖木兒公以師禮事之

南屏樓閣照西湖湖上雲林勝畫圖丞相頗來談般若老禪端坐

結跏趺獨園重布黃金地雙樹新栽碧玉株我欲稽山探禹穴木  
杯堪借渡江無

崑山陳伯康築亭山巔楊鐵崖扁曰玉山高處且爲賦詩邀予及

郭義仲劉景儀殷孝伯盧公武同賦

神仙中人鐵笛老爲爾玉山雙眼青玉山高處拄手板鐵笛醉時  
圍肉屏天生丹穴鳳爲石東望黑洋鯤出溟一代風流有如此齊

名西蜀子雲亭

小至

森遭難滕州  
兩年而回

九年至日悲流落一笑今朝醉醅兒子歸來雙足健老妻歡喜

兩眉開密雲濃似金壺黑飛雪輕於玉管灰咫尺故園兵火隔一

枝誰寄臘前梅

寄鮑孚仲提舉

風雨蕭蕭五月涼階前書帶草應長心傳千古文章印名重諸公  
翰墨場官舍看山閒拄笏齋居埽地靜焚香野夫別後遙相憶一

榻青苔兩鬢霜

除夕

姑蘇城外小湖邊寂寞僧房借榻眠詩藁寫成丁卯集脣頭看盡  
甲寅年中原喋血人爭地南國噉飢水拍天起坐夜深如守歲屋  
山風雪灑寒甍

楊提學過千墩寓舍出示吳淞道中所作予次韻酬之

酒溼宮袍逸興多馮夷擊鼓舞蛟鼉一江星月光搖動八極風雲  
氣盪摩不學山陰回雪棹肯來林下訪煙蘿陽春白雪知音少爲

我臨風一再歌

代簡及以中

前任徑山爲妄人所沮既雪其非復  
主法席子欲勸之謝事故有是作

重攬凌霄絕頂秋歸來笠澤繫孤舟青山何處無黃犢滄海相知  
有白鷗六合雲開天蕩蕩百川風靜水悠悠試聽漁父滄浪曲江  
上蘆花亦點頭  
西野草堂爲儲希崇教授作



龜巢集五  
南山虎去人無患西野堂成心更幽拄笏朝看山氣爽讀書夜聽  
樹聲秋賢人在坐酒一斗奴輩當階橘幾頭想像碧雞坊外路野  
梅官柳接林邱

書露筋廟碑後

斷臂孤兒事可憐露筋孀子死尤奇裙裾不受紅塵污膏血盡充  
白鳥飢野燐照人魂斷處田家妻嫂睡濃時瑤瑰香骨天應惜鐵  
石貞心世莫知宿草和煙霾古冢幽花帶雨泣叢祠碑存米老春  
秋筆詩有歐公絕妙詞風化實能裨禮俗天書宜爲表門楣世間  
多少青雲士不恤衣冠作夏姬

龜巢集卷五

